

ESUS CHUIBENEQUIDON NAID

Esus aton Papan abuc indote

1 ^{1,2}Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuiapanëdash aton Mayanën tantianubi. ³Cuesten dectanac unësash uincuenshun: “Uincuenobique. Is,” quequin Esusën utsi-utsien ismebapanëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choauqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash. ⁴Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. ⁵Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitidi menendac —quepanëdash Esus.

⁶Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses chuiquid dapa icpeque? Tantianu. Chui

—capanëdash Esus chuiquin.

⁷Adoaquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec. ⁸Aden chuishumbic: —Aton Mayan Nuquin Papan meniac aidënquio tantiamequin pausunac ëbi chuibenequidquio mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, ademibidi nidaid utsi-utsiec yacnoshontsen ademibidi ëbi chuibanendac —quepanëdash Esus abëd icquido chiec.

⁹Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpanëdash.

¹⁰Adec Esusbëd choboedo isec tabadnubien dashcute ushumbocquid dasiuidquid daëd choash tabadec: ¹¹—Nidaid Cadidia caid yacnoësh choquido, ¿atotsi quiaash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanëdash ushumbocquid dasiuidquid abuc isbededquido chiec.

**Matias Esus chuibeneta quequin
iccuededquidon chiaid**

¹²Aden Esus abuc indosho isash abëd macuësh Odibos caid yacno choboedo Edusaden caid yacno nidoapanëdash. Chonoadtemaid ushë nec, quec aidtionsëqui capunëdash. Aido Edusaden yacno choash abuc quënë yacno abi tabadbocno decatoash tabadoapanëdash. ¹³Aid quënë nuntan Esusën ëbi chuibeneta caido nëidted icpanëdash: nëidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembo namequin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidedi Esusën ëbi chuibeneta caido aid quënë nuntan tabadnubi ¹⁴utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiacbimboec onquecuededpanëdash. ¹⁵Adashic Esus tantiaquid 120ted iccuedednubi nënantanquio nidtoshon Esusën ëbi chuibeneta caid abentsëcshun Petedon naden chuipanëdash: ^{16,17}—Udas pado chuibanu. Tantiata. Esusbëd icquin piucquid dayun uaquid icquimbi Esus chieshënuquido Udasën Esus bedmepondash. ¹⁸Aden Esus bedmeshun ambi piucquid bedboed menequin aton tiedëmpi bedashic aid tied nantanuësh tëtaniadash pobidisquish paëdec aton pucu tishidpac caondash. ¹⁹Pucu tishidec intac chiuidaid tied icsho tantiaquin Edusaden yacnocquidtedishun Aquedama cain aton onqueten cuëmbededpondash. ²⁰Adembidi ëndenquimboshë Udas pado

tishabincuc chuiquin Nuquin Papan Mayanën tantiamiacpadomboen tsusedpa Dabid caidën Udas cuidte tantiec cuëdënte Sadmo caid naden dada uapampic:

“Ma adequi aton shubu
mosadpanuna ma aidbidi aton
matses nibëdquid shubu
icpanuna.”

Aden Udas pado cuidte chuiquin cuëdënte Sadmo caid utsitsen naden Dabid Padon dada uaoapampic:

“Aidën icsain nacpaden
tanenquiocquin ma utsin
bëdamboen napanuna,”

quequin Dabid padon dada uapampic —quepanëdash Petedo. ²¹Aden chiaschic abi onquec: —Udas pado nibëdnuc Esus chuibeneta quequin abentsëc nuquitedishun chuinuna. Nëid quënë nuntan nuquibëd capuquido dada dadpen iquec. Nuqui Esus chuibeneta caid nadquid ictiad. Chuinu. Tantiu. ²²Esus Uan padon acten mentosho isash niamëdenquio yec Esusbëd capucueneshun Esus indosho isquidquio icsho, Esus chuibeneta, quequin nuqui chuitiad. Adoac Esusën ëbi chuibeneta caidobëdtan Esus uincuemiaid chuibantiad —quepanëdash Petedo iccuededquido chiec.

²³Aden Petedon chuibanac daëd istuidash Petedobëd iccuededquido, Petedon chuibocpadquid nëid daëd iquec, quequin chuipanëdash aidon. Ambi istuidaid abentsëc Ose cashun Badsabas cashumbic Ustus, quequin cuënaid nepanëdash. Utsibic, Matias cuëmëdquid icpanëdash. Nëid daëd Petedon chuibocpadquid nec, qesho tantishun: —Nënantanquio tabadec cho —cac abi daëdi choash tabadsho isash ²⁴Nuquin Papa chiec nadec iccuededquido onquepanëdash: —Nënantanquio chomeboed nëid daëd

iqueque. Is, Papa. ¿Mitsicquidimbi Esus chuibeneta, cape? Ēbitedi tantiamē, Papa. ²⁵Udas pado tauitdiadpambo chian anēdēnquiagno nidboedēn naidaid namenu, quequin mimbi bēdamboen isaid abentsēc ēbi isme. Papa. Aden mimbi ismiac ma aidēntsen Esus chuibenepanuna —quepanēdash Nuquin Papa chiec. ²⁶Aden chuitanquimbic aid daēd abi cuēmēdquid abentse-abentsen dada uatempin dada uashumbic tēchun sandoshon cadotaniac dada uatempi abia puduenaid istanquin, Matias cuēmēdquid nec, quequin isbededboshic, Esusēn ēbi chuibeneta caido onseted icboedi nēbi Matiasbēd doseted yanosh, quequin chuibededpanēdash nuntan iccuededquidtedishumbi.

**Aton Mayan Esus tantiaquidtedi
menebanaid**

2 ¹Adashic isadaidbon ambi aton tiedēn caniquid abia ēshēaid bedaid tantiaid ushē chotsēc nubi Esus tantiaquidtedi shubunuēshi iccuededoapanēdash. ²Ambo iccuededquimbi badedquio shubu nuntan cunquequid dapa choec natiambo cunquiabimboecsho abitedishun isbededpanēdash. ³Aden aid isbedednubi cuēte dētsisidacimboecquid budec mais-maisec Nuquin Papan Mayan matsadtocuededpanēdash abi isquidtedi. ⁴Nuquin Papan ma aidobēd tabadnueshun aton Mayan Esus tantiaquidtedi menebanac matses utsi-utsiec onquetenquio onquecuededpanēdash ambi matsadtomiaidotedi.

⁵Aden Nuquin Papan aton Mayan menenubien isadaidbo utsibo Edusaden yacno cho-choash dadpen

tabadpanēdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoēsh Edusaden yacno cho-choapanēdash.

⁶Ambo cho-choash tabadnubi Nuquin Papan aton Mayan

meniaid-meniaidquiec nēmbobi choquidon onqueten-onquetenquiec onquesho tantiahs nēbi cho-chobedo utsi-utsiec: ⁷—iPadtec!

Dacuēdanquiopaic. Ēbipadquiecshenda onquepec. ¿Onquequidotedi nidaid Cadidia yacnocquidoda nepec?

⁸¿Mitsipaden con onquete bedash onquecuededpec nec? ⁹Ēbitedi nidaid utsi-utsiec yacnoēsh cho-choquido nebi. Padtia yacnoēsh choquido; utsibic, Media yacnoēsh choquido; utsibic, Edan yacnoēsh choquido; utsibic, Mesopotamia yacnoēsh choquido; utsibic, Udeya yacnoēsh choquido; utsibic, Capadosia yacnoēsh choquido; utsibic, Ponto yacnoēsh choquido; utsibic, Asia yacnoēsh choquido; ^{10,11}utsibic, Pidiquia yacnoēsh choquido; utsibic, Pampidia yacnoēsh choquido; utsibic, Equipito yacnoēsh choquido; utsibic, Dibia Sidene uidictsēcūesh choquido; utsibic, shubu dadpen icquid Doma caid yacnoēsh choquido; utsibic, acte nēnantan nidaid nacnēdquid Quideta caid yacnoēsh choquido; utsibic, Adabia caid yacnoēsh choquido. Isadaidbobēd isadaidbopadquio icnuequido Edusaden caid yacno tsusedpabon chiampicpaden nanuec cho-chobedo ēbitedi nebi. Ēbibimboec onquequidtedishun Nuquin Papan naid chuibansho tantiembi. ¹²¿Mitsipaden tantiaquin oncamiaquien adec onquepec? —quepanēdash Edusaden yacno cho-choquid.

¹³Adnubien: —¿Bēdamboec onquepequida onquec? Paēmboecquid

cubudquin acshun tantienquiocquido
nepanui —queoapanēdash utsibo.

Iccuededquido Petedon chuibanaid

¹⁴Adec onquesho tantiashun Esusēn
ëbi chuibeneta caido cho-choquin
Petedon niddoshon tantiamenu quequin
naden cho-choboedo comapenec
onquequin chuipanēdash: —Mimbi
icsamboen tantiaid chiembique.
Tantiata. ¹⁵Ushē abuctotsēcnubi
ëbitedishun paëmbocquid
acamboccombi. ¹⁶Utsin-utsinquiec
onqueten onquesho mimbi tantiaid
Nuquin Papan ëndenquimboshē
chiampicpadec onquec nebi. Tsusedpa
Oedēmbi Nuquin Papan ma matsesbēd
tabadnueshun aton Mayan menenun
chiaid naden aidēn dada uampic:

¹⁷‘Nëid nidaid naimbudnubi
Con Mayan matses utsi-utsien
menendambi.
Aidon madobobēdtan aidon
champibontsen ëmbi yuecquio
icshun nanun chiaid
chuibanendac.

Adembidi caniabontsen ushquin
ëmbi chiapaden isendac.
Adembidi tsusiobontsen ushquin
ëmbi chiapaden isendac.

¹⁸Aden con Mayan meniac ambi
tantiacpadomboembidi ëmbi
chuiquin namiaidon dadan
chidobēdtan
ëmbi yuecquio icshun nanun
chiaidquiobidi chuibanoindac.

¹⁹Adembidi, con Mayanēn tantiamiac
ëmbi yuecquio icshun nanun
chiaid matsesēn chuibanubien
abucuēsh uinsadpamboctequid
icnubi
nidaidēnshun ismete
intac bimboctequidbēdtabi
nēdēnquetequid cuēte
pushudquidbimboctequid

abembi pushudquidbēdta
adquidtedi mibi ismendambi.

²⁰Adquid icnuc badiadēn ushē
chēnquenquiocnoc
inchēshac bimboctequid inchēshēn
ushē piu-piupambo yec
intac bimboecsho mimbi
isbededendac.

Ëmbi ismiaidtedi icambi matses
cuidte ushē choendac.

²¹Ismequimbi con Icbombo nec ëbi
caquidquio mēnchiquendambi,
quequin Nuquin Papan chuimiapaden
Oedēn dada uapampic.

²²“Adembidi Nuquin Papan chomiaid
chiembique. Tantiata, isadaidbo.
Nasaded caid yacnoēsh choquid, Esus,
Nuquin Papan chomiaid icquin
nadatiambocquin nabanquin
ismebansho mimbi isondac. ²³Aidi
Nuquin Papan tantiampicpaden Esus
bedshun mimbi isadaidpembu chuquid
menequin, Unēs uata, cac cuesten
dectanquin Esus unēs uapanēdash.
²⁴Aden mimbi nac unēsacsho icsaisa
chococacno yuec ictiapimbo iquec,
queshun Nuquin Papan Esus
uincuemapanēdash. ²⁵Adembidi
ëndenquimboshē tsusedpa Dabid padon
Esus chuibanquin naden dada uapampic:

‘Con Icbo abuc nidec bëyucanquid
ëbēd tsadac bimboecsho isec nebi.
Aidi con dayun tsadquid icsho
isquin natiaic cametequid
dacuēdēnenquio iquendambi.

^{26,27}Aid unēsash uincuenendabi, Papa,
quec cuēdēnec bēdambo iquebi.

²⁸Nuquin Papa yacno tabadacpadec
nidaidēn tabadquin ismiac
mibi yacno nidash mibēdi tabadec
bēdamboshē iquebi mimbi
camiaid iquendabi,’

quequin Esus tantiaquin Dabid padon
dada uapampic.

²⁹“Adomboen tantiaquin dada uash Dabid unēsacsho chococapampid nēbi shēcūē iquec. ³⁰Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshē yash mibi ēndenquimbo unēsampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. ³¹Aden Nuquin Papan nanun chiaid tantiaquin Esus uincuenta isacimboen dada uaquin, Nuquin Papan Chomiaid unēsacsho chococaqui aton nami chodquenuio yec uincuenendac, quequin chuiampic Dabid padon. ³²Ai, Dabid padon chiampicpadembi Nuquin Papan Esus uincuemeapanēdash. Aid uincuemiasho isondaid icquin mibitedi chuibanec nebi. ³³Aid uincuenash Nuquin Papan dayunquio tabadendac nēbi. Ambo choacsho matses tantiaquin Nuquin Mayan ma aibēd tabadnueshun matses mimbi meneta, aton Papan cacpaden abi tantiaquidtedi menebanquiac onquete utsin-utsinquieic onquesho nēbi mibitedishun tantiec. ³⁴Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquio icshun nanun chiaid naden Dabid padon chuibampampic:

‘Nuquin Papa Ico Dapa icquin abipadquid icbo cain: Nēbi ēbēdi tsadec cho.

³⁵ Mibi chieshēnquido dēniacquidquio mibi icmenun nabono. Chiata,’ quequin Nuquin Papan nanun chiaid Dabid padon dada uapampic.

³⁶“Aden tantiaquin Dabid padon chuiampid Esus mimbi cuesten dectanquin unēs uaid uincuemequin matses icsaid bedshunash abided cuidadquid Nuquin Papan icmepondash.

Adoac ēmbi chiaid abimbo iqueque. Esus tantiaquidquio icta, isadaidbo —quepanēdash Petedo.

³⁷Aden Petedon chuisho tantiash iccuededquido abi icsaid tantiec unēsquio yec: —Esus tantianuequin ŷatotsi nuqui nape? —quepanēdash utsi-utsiec Petedobēdta Esusēn ēbi chuibeneta caid utsibo chiec.

³⁸Adoquien Petedo: —Mibi icsaid ēnshun, Esus con Icbombo nec, quequin abimbo tantiaquin acten mentometa ma ēbi icsaid Nuquin Papa bēpiscudnu queshun. Adoacsho aton Mayan mibi menendac. ³⁹Adembidi tantiasho isun min tsyuecquidtsen menendac. Adembidi nidaidtedi yacnocquidēn tantiasho isun aton Mayan meneoaindac ambi chiampicpaden —quepanēdash Petedo Esus isquidquio.

⁴⁰Aden chuibanequi: —Mimbi icsamboen tantiaid ēnta. Aden ēnash Esus tantiaquidquio icta —quequin chuibudquin Petedon ēmanēdash.

⁴¹Aden chuisho tantiash, Tantiaquiembi, quepanēdash utsi-utiec. Aid ushēmbi dadpenquioshē tedes midted Esus tantiaquid yampanēdash. Adquid icsho isun acten mentobampanēdash.

Esus tantiaquido iccuededaid

⁴²Adashic, Esus tantiembi, queboedo tantiabenabi iquec Esusēn ēbi chuibeneta caidon Esus chuibansho tantiec tabadequi Nuquin Papa chiec onquedenepanēdash. ⁴³Adec tabadcuenedsho isash: —iPadtembo! Dacuēdampambo iquec —quec utsibo tabadpanēdash. Adnubien Esusēn ēbi chuibeneta caidon nadatiambocquin nabampanēdash. ⁴⁴Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na

cusadenquiocpanēdash. ⁴⁵Aton na menequin piucquid bedshun utsin na nibēdsho isun menepanēdash.

⁴⁶Adecbidi

badiadquidēn-badiadquidēnquie

Nuquin Papa tabadte shubu uashunaid yacno nidash iccuededpanēdash.

Adecbidi shubu utsi-utsiec yacno nidash iccuededquin Esus unēsaid tantiaquin panēmpi cuēsh-cuēshun

peded-pededpanēdash. Adembidi bundoshon pebededoapanēdash.

Adobanequi ēbi icsaid bedshunash Esus cuidadaid tantiec bēdambo iquebi, quec

⁴⁷Nuquin Papan naid chiec

cuēdēncuededpanēdash. Adec tabadsho isash, Bēdamboquido nec, quec

utsibotsen Esus tantiaquid yanash abi tantiaquid utsitedibēd

iccuededpanēdash.

Caputiapimbo icquid bēdamiaid

3 ¹Adnubien abi nidteniacpadēn ushē budec 3 yanuc Petedo Uambēd

Nuquin Papa tabadte shubu uashunaid yacno Nuquin Papa chiec nidpanēdash.

²Ambo nidnubien caputiapimbocquid aid shubu shēcuē Bēdaidquio caid yacno

utsibon buampanēdash. Anin tishacchobi yec caputiapimbocquid

icpanēdash. Aidi

badiadquidēn-badiadquidēnquien

buandenequin aid shēcuē cuēmano nanded-nandedac uequimbi cho-chosho

isun: —¿Adabi piucquid menetsia?

—cabampanēdash. ³Ambo Petedobēd Uan chosho isquin: —¿Adabi piucquid

menetsia? —capanēdash

caputiapimbocquidēn uequin.

⁴Adoquien Uambēd nidtuidash

nidquin Petedon: —Ēbi daēdi is

—capanēdash caputiapimbocquid

bēisquin. ⁵Adoquien, Ēbi menepashun, quequin abi daēdi isobien, ⁶Petedon:

—Piucquid con na nibēdec. Ēmbi

tantiaidēn ēbi tantiamebocpaden

naimbique. Nasaded yacno iccondaidēn

Esusēn bēdamiapadec bēdanash

nidtoash nidec nid —capanēdash. ⁷Aden

chuiquin caputiapimbocquidēn mēdante

abiucquio bedtanquin Petedon

nidtomiad badedquio nidtopanēdash

caputiapimbocboedi. ⁸Bēdambo yec

nidtoash capupanēdash. Adec bēdanash

Petedobēd Uan chedobēd capuashic

Nuquin Papa tabadte shubu

uashunaidēn puduedash, Nuquin Papan

bēdamioshi, quec

pudundotan-pudundotanec: —Cuishon

—quepanēdash. ⁹Adec capusho

isquidon nadobededpanēdash:

¹⁰—Nuquin Papa tabadte shubu

uashunaid shēcuē, Bēdaidquio caid

yacno uetsequi, Piucquid ēbi

menepashun, queboedi capueque. En is.

iAdpaidie. Is! Tantiadempamboctequid

nec —quequin isbededpanēdash.

¹¹Adec capuequi Petedobēdta Uan

mēdinec Sadomonēn tacpan quēnē

uabicquid yacno puduednubien

iccuededquid tsibanash anotsen

tantiadempambo yec tabadoapanēdash.

¹²Adec tabadsho isun Petedon naden

chuibampanēdash: —¿Atotsi quiash

padtec quequin ēbi daēdi comapenen

bēise? ¿Ēbi daēdshun nacta nēid

capupadic? ¿Ēbi bēdamboquid

icquindambi nadio? Padenquio. Nuquin

tsusedpabon Papa caidēn bēdamiaid

nec. ¹³Aidi Abadauan padon Papa caid

nec. Aidbidi Isac padon Papa caid

neoaic. Aidbidi Acobo padon Papa caid

neoaic. Aidon Papa caidēmbi ambi

nidaidēn chomiaid Esus nēbi aton

Papabēd tabadoaic. Aton Papa yacno

nidoabichsho Esus bedshun Pidato

meniaquien, Nēid dada icsaisa neque.

Nidmenu, quequin tantiaquin Pidaton

chiaqui, Icsambocquid nec. Unēs

uauimbien ictiad, quequin

mibitedishun chuipondac. ¹⁴Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. ¹⁵Abia uincuentequid mibi chuiquid daba mimbi unēs uacshobien Nuquin Papan aidi uincuemepondash. Aid uincuenacsho ëbitedishun isondambi. ¹⁶Esusën ëbi bédamepec, quequin tantiash nëid taë icsacboedën Esus tantiash capusho mibitedishun isec.

¹⁷“Utsibo, Nuquin Papan chomiaid nec, quequin tantienquiocquin mibi chuiquidobëdtan mimbi Esus unēs uamiondac. ¹⁸Ëmbi matses chuiquid daba icmenu caid matsesën mëyanaid iquendac, quequin ambi chuimiaditdi Nuquin Papan dada uamiampicpaden mimbi naondac. ¹⁹Nëbi mimbi icsamboen tantiaid ënquin Nuquin Papa tantiata ma mibi icsaid bëpiscudpanuna; adecbidi ma abëdi tabadebi, quequin tantiec mibi bëdambo icpanuna; ²⁰adecbidi ma ambi chuiquid daba icmiaid Esus mibi bedmenuen chomepanuna. ²¹Nuquin Papan abitedi icsaisa icmete ushë choabicnuc ambi chiampicpadequi nëbi Esus abuc aton Papabëd tabadec. ²²Adembidi chuiquin Moisesën dada uampid nad iqueque. Tantiata:

‘Chuiquid Dapa ëbipadquid ambi chuimiad utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bëdamboen nabanta.

²³ Ambi chiaid tantiesa Nuquin Papan nësecaindac,’ quequin Moisesën dada uampic.

²⁴“Adomboembidi Samuedën chuibampampic. Adomboembidi Nuquin Papan chuimiad utsibon chuibanoampic. ²⁵Nuquin Papan

chuimiadon tsyuecquido mibitedi nec. Tsusedpa Abadauanën tsyuecquidobidi mibitedi neoaic. Aidon tsyuecquido icscho Nuquin Papan Abadauan chiampicpaden chuioid mibitedi nec. Naden Abadauan Nuquin Papan chuipampic:

‘Mibi ëndenquimbo unësampin aton matsesbëdta matses utsi-utsien min tsyuecquidën bëdambo icmendac.’ ²⁶Nuquin Papan Abadauan chiampicpadece aton tsyuecquid choacsho mimbi unēs uapondac. Aidi Nuquin Papan uincuemiac ma isadaidbomba abi icsaid ënsho ma ambi bëdambo icmiaid icpanuna —quepanëdash Petedobëd Uan.

Ambi naid Petedobëdta Uan isadaidbo tsusiobon chuibamiaid

4 ¹Aden Petedobëdtan Uanën chuibanubien isadaidbo tsusiobo cho-chopanëdash. Utsi-utsiec Nuquin Papa tabadte shubu uashunaid yacno cho-choquid bëdamboen tabadmequidquo icnubi utsi-utsiec saduseyobo icpanëdash. ²Esus unēs uacsho Nuquin Papan uincuemiacpadembi matsesten unēsacsho uincumeoaindac, quequin Esus chuibenequidon chuibanubi chopanëdash aido. ³Choshon Petedo Uambëdta bedash: —Inchësheque. Badiadshun nëidën chiaid tantianush nidnu. Nid —quianec puduanquimbi Petedobëdta Uan quënë navedmepanëdash isadaidbo tsusiobon. ⁴Aid daëdi bedabicnuc Petedobëdtan Uanën chuibansho tantiaquido Esus tantiaquid dada dadpen sinco midted yampanëdash.

⁵Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoësh

iccuededpanēdash. ⁶Nēidtedi icpanēdash: ancanquid dapa daēd Anasbēdi Caipas icpanēdash. Nēidic aton shubun icquido abipadquido: nēidic Uan, utsibic Adecandedo, aiddedi cho-choash iccuededpanēdash.

⁷Iccuededshumbic Petedobēdta Uan bēmeshun nēnantanquio nidtomesun: —¿Tsutsi chuiquin caputiapimbocquid bēdamio? —capanēdash tsusiobon.

⁸Adoquien Petedo Nuquin Papan Mayanēn comapenen tantiamiac nadpanēdash: ⁹—Caputiapimbocquid tantiaquin bēdamiaid isec ¿mitsipaden nao, quecta mibitedi tabadpe? Ancanquidbēdtabi chuiquid utsibo isadaidbo utsibo mibitedi chiembique. Tantiata. ¹⁰Caputiapimbocquid Esuquidistu Nasaded yacno iccondaidēn bēdamiaid niosh. Mimbi unēs uacsho Nuquin Papan uincuemiaidēn nac nēid caputiapimbocboedi nēbi nidtoash capusho mimbi isec. ¹¹Aid bēdamequid mimbi tantienquio yaid Nuquin Papa yacno yuedanquidquo nec. ¹²Nuquin Papa yacno yuedanquid utsi nibēdec. Nuquin Papa yacno tabadte bunec aid tantiaquid icta —quepanēdash Petedobēd Uan.

¹³Adec Petedobēd Uan dacuēdenquio yec comapenec onquesho tantiasb tsusiobo: —Aid daēdi tsusiopenquio iquequi adecbidi Nuquin Papan chiampid tantiabenabicquid iquequi Esusbēd icquid aid daēd icquin ¿mitsipadomboen caputiapimbocquid bēdamepashba? —quec tantiadempambo yec tsusiobo tabadpanēdash. ¹⁴Aden ambi bēdameboed aidbēdi icsho isash, Icsamboen mimbi naoc, quetiapimbo tsusiobo tabadpanēdash. ¹⁵Adshun Petedo Uambēdta nidmiash, Tantanu, quec onquecuededec tsusiobo: ¹⁶—¿Mitsipadomboen aid daēd nuqui

napeba? Nadatiambocquin nasho Edusaden yacnocquidtedishun isbededposh. Ad icnuc, Caputiapimbocquid bēdanambo iquec, ēbitedi quetiapimbo iquebi.

¹⁷Dadpeshun tantianushe queshun, Esus padpiden chuibanoainda, quequin aid daēdi chuinuna

—quecuededpanēdash tsusiobo.

¹⁸Adshun Petedobēdta Uan chomeoashun: —Padpiden Esus chuibanoainda. Aidēn chiaid chuiquin tantiamenda —capanēdash tsusiobon.

¹⁹Adoquien: —¿Mitsicquidēn chiaid ēmbi natequid icpec? ¿Nuquin Papan chiaid niacquindambi mimbi chiacpaden nadi? ²⁰Nuqui isboed nuqui tantiaboedbidi chuitequidquo iquendac —quepanēdash Petedo.

^{21,22}Adoquien: —Ēmbi chiacpaden nainquiocsho isun mibi daēdi mēyantsiambique. Baded nid cueschitomane —capanēdash tsusiobon. Abi tishaid seta 40ted icquid caputiapimbocsho bēdamepanēdash. Aid Nuquin Papan bēdamiacsho isash utsibo cuēdēncuededpanēdash. Adsho tantiasb Petedobēdta Uan mēyantiadquiocboedi adotiapimbo yec tabadpanēdash tsusiobo.

**Isadaidbo tsusiobon chiaid
Esus tantiaquidon chuioaid
Nuquin Papa chiaid**

²³Tsusiobon nidmiac nidash iccuededbocnombo choash puduedshun tsusiobon chuiboed Petedobēdta Uanēn chuioapanēdash. ²⁴Adoac abentsēc onquiacbimboen naden Nuquin Papa chuipanēdash: —Con Icbombo mibi nec. Abubēdta nidaid acte chedo uashun aidēnquio icquidtedimbo mimbi uabampampic. ²⁵Adembidi ēndenquimboshē mimbi tantiapaden min Mayanēn tantiamiac mimbi

chuimiai, Dabid padon naden dada uapampic:

“¿Atotsieshumbini ëbi
dëniactiapimbo icquidombi
isadaidpembo comapenec
nëishash ëbi dëniacte
buncuededpec? Adquiecbidi
¿Atotsi quiaash ëmbi chomiaid
icsamboen nanushbimboec
isadaidbo onqueuidoapec?

²⁶ Ancanquidobëd chuiquid utsibo
ëmbi chomiaid aton Icbobi
mëyanuec iccuededec.”

²⁷ Ai, mimbi Dabid pado dada
uamiampicpadembi ënabi Edusaden
yacno isadaidpembo ancaquid daëd
Edodesbëd Ponsio Pidato icnubi
isadaidbo chedo iccuededquin mimbi
Chomiaid icsaisa Esus icsa uanuec
onquecuededpondash. ²⁸ Mimbi
tantiampicpadembi unës uapondash,
Papa. ²⁹ Adquidën Petedobëdta Uan
chushcasha mimbi tantioc.
Cuesambocquid ëbitedi icmequin mimbi
chiaid ëbi chuibame, Papa. ³⁰ Icsaisan
Esusën bëdamiacpaden
nadatiambocquin naban, Icho
—quepanëdash Esus tantiaquido
Nuquin Papa caic.

³¹ Adoac abi iccuededacno
ishcudpanëdash. Adec ishcudnuc
ambocquid Nuquin Papan Mayanën
comapenen pausunac
dacuëdenquiocquin Nuquin Papan
chiaid chuibampanëdash.

Abentsëc yacbmboec tabadaid

³² Aden chuibanequi abentsëc
onquiacbmboec tabadec Esus
tantiaquido, Con na nec, quenquo yec,
Nuquin Papan na nec, quec
tabadcuenepanëdash. ³³ Adequi
tabadcuenequimbi dacuëdenquiocquin,
Esuquidistu uincuenacsho isombi,
quequin chuibenepanëdash. Adec Esus

tantiaquido tabadsho utsibon
bëdamboen isbededquin aidën
chuibansho bëdamboen tantiapanëdash.
^{34,35} Adembidi nidaid icbo
utsin-utsinquien aton nidaid menequin
piucquid bedshun Esus chuibenequido
menepanëdash. Adembidi, shubu icbo
utsin-utsinquien aton shubu menequin
piucquid bedshun meneapanëdash.
Aden meniac aton na nibëdquid icsho
isun Esus chuibenequidon menebanac
bunenquo tabadpanëdash. ³⁶ Adecbidi
ambo acte nënantanquo nidaid
nacnëdquid shubu uaidëshun Chipide
caid yacnoshon tishaid Edusaden yacno
choash Ose tabadpanëdash. Aidi,
Bëdamboen mimbi naoque. Adobanta,
quedenesho Bednabe cuëmpañdash.
³⁷ Aidëmbi aton nidaid menequin
piucquid ambi bedaidtedimbo Esus
chuibenequido meneapanëdash.

Ananiasbëd aton chido Sapida muaid

5 ¹ Adnubien dada utsi Ananias
cuëmëdquid aton chido
Sapidabëdta aton nidaid menequin
piucquid bedpanëdash. ² Bedshun aton
chidon isnubi musucbanshun ambi
musucaid utsi dayun uash Esus
chuibenequido yacno nidshun abitedi
meniacbmboen menepanëdash
Ananiasën. ³ Adnubien, Piucquid abitedi
meniacbmboen Ananiasën mua uaposh,
quequin Nuquin Papan Mayanën
tantiamic naden Petedon Ananias
chuipanëdash: —Satanasën tantiamic
icquin çmitsipaden tantiaquin Nuquin
Papan Mayanën isnubi mua uaqin ëbi
menio? ⁴ ¿Min nidaid meniabi icnuc
mitsanapenquioda nediosh? Mitsana
niosh. Adecbidi, ¿aidi menequin
piucquid bedaid mitsanapenquioda
nediosh? Aidtedi mitsana niosh.
¿Mitsipaden tantiaquin piucquid abitedi
meniacbmboen meniano? Aden bëquin

abimbo chienquiocquin Nuquin
Papambobi mimbi mua uaboc

⁵—Petedo qesho tantianec Ananias
unésequi uebudpanēdash. Adsho isash
Esus tantiaquidtedi dacuēdpanēdash.

⁶Unēsacsho isun dashcute cuēshēn
dataneshun buanshun caniabon
chococatampanēdash.

⁷Bēnē chococambic ushē abuctoan
unēsboedēn chido aton bēnē unēsaid
tantienquio yec choapanēdash.

⁸Choasho isumbien: —¿Ada min nidaid
menequin nēidtedi piucquid bedo?
—Petedo qesho tantiasien:

—Ai, aitedi bedombi —quepanēdash
Sapida.

⁹Adoaquien Petedo: —¿Nuquin Papan
Mayanēn ēbi muasho tantiapec, quequin
tantienquiocquina min bēnēbēdtambi
min piucquid abitedi meniacbimboen
meniano? Nēbi min bēnē
chococaboedon mibitsen buanendac
—Petedo quenubic ¹⁰Petodon tayumbi
uebudec Sapida unēspanēdash. Aidsen
unēsacsho buanshun aton bēnēbēdtabi
chococatampanēdash. ¹¹Adoac aid daēdi
unēsaid tantias Esus tantiesatedi Esus
tantiaquidobēd comapenec
dacuēdcuededpanēdash.

Bē-bēaidtedi bēdanaid

¹²Adashic Sadomonēn tacpan caid
yacnoēsh Esus tantiaquido iccuedednubi
Esus chuibenequidon nadatiambocquin
nabampanēdash. ¹³Adomboen nabansho
isash Esus tantiesabo dacuēdec tacpan
yacno chotiapimbo yequi: —Esus
tantiaquido bēdambohē iquec
—quecuededpanēdash. ¹⁴Adec
tabadequi utsi-utsiec dadpen dadabēdi
chido Esus tantiaquido yampanēdash.
¹⁵Adec Esus tantiaquid yanshun,
Daicsaido Petedon bēdamepec, quequin
tantiaquin daicsaido bē-bēshun Petedo
capuacno nambededpanēdash.

¹⁶Adembidi dēuequidon Edusaden
yacno daicsaid bē-bēnubi mayan icsan
mēyanaido bē-bēoapanēdash. Aden
bē-bēaidtedi bēdampanēdash.

Esus chuibenequido tsusiobon quēnēn nauedmiaid

¹⁷Adnubien isadaidbo ancaquidbēd
tsusio dapa utsibo saduseyobo caid isec
otacquo tabadboedi matses dadpen
Esus chuibenequido yacno cho-chosho
isash nēishcuededpanēdash. ¹⁸Adec
nēishcuededshun Esus chuibenequido
bedmeshun quēnēn nauedmepanēdash.
¹⁹Aid inchēshēmbi Nuquin Papan uaid
mayan bēda choshon quēnē shēcuē
bētashaid bēcadoquin abitedi
puduemec: ²⁰—Mibi puduemiombique.
Nuquin Papa tabadte shubu uashunaid
yacno nidtan. Ambo puduedshun Esus
tantiaquid uincuentequid chuibanoata
—quepanēdash Nuquin Papan uaid
mayan bēda.

²¹Badiadnuc Nuquin Papa tabadte
shubu uashunaidēn puduedshun Esus
tantiaquid abi uincuentequid
chuibanoaic tabadoapanēdash aitedi.
Chuibanubien isadaidbo tsusio dapan
abēd icquidobēdtambi tsusio utsibotedi
cho-chomeshun: —Esus chuibanquido
bedtan —cac ²²quēnēn nauedaid
puduenushe quequin isquido chuiquid
nidshun isquien Esus chuibenequido
nibēdec. ²³Adsho isash choaquin:
—Quēnē shēcuē bēdamboen bētashquin
quēnēn nauedaid puduenushe quequin
isquido shēcuē cuēmāno capusho
isombi. Shēcuē bēcadoash puduedshun
isaquien ēnden puduen-puduenac
—quepanēdash quēnēn nauedaid
puduenushe quequin isquido chuiquid.
²⁴Aden chuisho tantias isadaidbo
tsusiobo: —¿Atodain nechitec?
—quepanēdash Nuquin Papa tabadte
shubu uashunaid isquido chuiquid

chiec. ²⁵Adnubien dada utsi choshon:
—Mimbi quënën nauedboedon Nuquin
Papa tabadte shubu uashunaid
yacnoshon chuibanoasho tantiombi.
¿Ada tanto? —capanëdash.

²⁶Adoquien quënën nauedaid
puduenushe quequin isquido chuiquid
capitan caidën ambi namiaidobëdtan
tantiec nidshun bedtanquin
bëoapanëdash. Matsesën cuënoten ëbi
se-senushe qeshun mëyanenquiocquin
Esus chuibenequido bëoapanëdash.

²⁷Aden bëquin Nuquin Papa tabadte
shubu uashunaid nuntan tsusiobo
iccuededacno yuedpanëdash. Bësho
isash tsusio dapambo: ²⁸—Esus
chuiabenenda, quequin
chiambocquidëmbimboen Esus
chuiabanquin Edusaden yacnocquidtedi
mimbi tantiamebanoc. Adoquimbic,
Esus unës uaid tsusiobon naid nec,
quequin mimbi chuibanoc
—quepanëdash tsusiobo. ²⁹Adsho Esus
chuibenequido utsibon tantianubi
Petedonuidi: —¿Matsesën nata
caidodabi nedi? Nuquin Papan nata caid
icquin nabanembi. ³⁰Mimbi cuesten
dectanquin unës uaondaid Esuquidistu
Nuquin Papan padpiden
uincuemepanëdash. Nuquin Papa caid
tsusedpabon Papa caidquio nec. ³¹Esus
uincuemeshun aton dayunquio
tsadmequin matses bëyucanquin
Chuiquid abi yacno matses
Puduedmequidquio icmepac. Aden
nabanaid isadaidbo aidi abimbo
tantiaquid icpashun ma abi icsaid
Nuquin Papa bëpiscudpanuna.
³²Esuquidistun nabansho
isbempondambi. Adembidi abi unësash
uincuenacsho ispondambi. Nuquin
Papan Mayan icsaisan Esuquidistu
tantiaquidobëd icquidëmbi adomboen
ëbitedi tantiameoaic —quepanëdash
Petedo.

³³Aden Petedon chuisho tantiash
tsusiobo: —Icsambo iquec —quiash Esus
chuibenequido cuesunete bumpanëdash.

³⁴Adnubien isadaidbo utsi padiseyobo,
Nuquin Papan Moises dada uamiampid
chuiabanquin tantiamequid utsibon
bëdamboen isaid, Camadied
cuëmëdquidën: —Chiata. Bëboedtedi
buantan —cac ³⁵buanambic:
—Icsamboen nanushe qeshun
bëdamboen tantiaquiota. Aido
cuesunete mibi bunque. Cuesunenushes
chiata. ³⁶Ëndenquio utsi Teyudas
cuëmëdquid icpondash. Aidi tsusio dapa
icnuequin chuisho tantiash dada dadpen
400ted abëdi capupanëdash. Teyudas
cuesuniacsho isash abëd icboedtedi udi
nidaniacsho padpiden isenquio
icpanëdash. ³⁷Adashien matses
tambanta caid ushëmbi utsi Udas
cuëmëdquid Cadidia yacno icnëdaidbëd
matses dadpen capupanëdash. Udastsen
cuesuniac abëd icnëdaidtedi padpidec
choenquio yec adecbidi udimbo
nidanepanëdash. ³⁸Adec umanuc
buamboedo chuiquid nibëdanaque.
Aidbëd icboedo mishenda.
Cuesunemenda. Aidën
chuiabanaidbëdtabi ambi naid matsesën
naiduidtsëqui icnuc badedquio
ënëdendac. ³⁹Aido Nuquin Papan
namiac chuisho mimbi ëmetiapimbo
iquendac. Nuquin Papa chieshënushe
qeshun aido nidmeta.

⁴⁰Aden Camadiedën chiac: —Adonona
—qeshun: —Buamboedo bëoata —cac
bëacsho cueshcanten cuesmepanëdash.
Aden cuestanquin: —Esus
chuibanoainquio yec nidtan —qeshun
puduemepanëdash. ⁴¹Puduemiatic Esus
mëyanaid tantiec nidequi abi
chuibansho mëyanaid yec bëdambo
iquebi, quec tabadpanëdash.
⁴²Adshumbic
badiadquidën-badiadquidënquien

Nuquin Papa tabadte shubu uashunaid yacnoshon matses bëyucanquin chuiquid, Nuquin Papan bëdamboen isaidquio Esus nec, quequin chuibampanëdash aidon. Shubu utsi-utsiec yacno nidshun adomboembidi chuibenepanëdash.

**Niante chidobo pete
menebanquid icta caid**

6 ¹Adashic badiadquidën-badiadquidënquiec Esuquidistu tantiaquid dadpen-dadpenquiec yanubi isadaidbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc —quepanëdash. ²Adoaquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin ëntiapimbo iquebique. ³Niantebo meneta canuen nadquidquio istuidshun chuita. Nuquin Papan aton Mayan meniac tantiamiac bëdamboec tabadsho mimbi bëdamboen isaidquio istuidta. Adquid 7ted istuidshun, Niante chidobo pete menebanquid icta, cata. ⁴Aidtedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanëdash Esus chuibenequido.

⁵Adoaquien: —Mimbi bëdamboen chioc —quepanëdash Esuquidistu tantiaquid utsibo. Aidën chuibocpadembi aidtedi istuidpanëdash. Nëidic, Nuquin Papan Mayanën pausunaid, ambi chiacpadomboen Nuquin Papan naindac, quequin tantiaquidquio Esteban cuëmëdquid; utsibic, Uedipe; utsibic, Pëdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya

yacnoshon tishaid Nicodas cuëmëdquid.

⁶Aidtedi istuidshun Esuquidistu tantiaquid utsibon aido bëdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nëidted bëdamboen nameta, Papa, quequin Esus chuibenequidon chuipanëdash.

⁷Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiash utsi-utsiec Esuquidistu tantiaquid dadpen yampanëdash. Adecbidi isadaidbo tsusiobo dadpen bëdamboen tantiash Esuquidistu tantiaquido yampanëdash.

Esteban bedaid

⁸Adnubien Nuquin Papan Mayan meniaidënquio. ambi comapenen tantiamiaidënquio, Estebanën nadatiambocquin ismëbampanëdash.

⁹Aden nadatiambocquin ismenuc bëdamboen tantienquio yec utsibo comapenec onquecuedepanëdash. Nëidic, Sidene yacnoësh choquido; utsibic, Ade candedia caid yacnoësh choquido; utsibic, Sidisia caid yacnoësh choquido; utsibic, nidaid Asia caid yacnoësh choquido aidtedi Edusaden yacno cho-choash tabadec Estebambëd comapenec onquepanëdash.

¹⁰Comapenec onquequin Esteban Nuquin Papan aton Mayan meniaid icsho aidën comapenen tantiamiac onquesho dëniaquec utsibo onquetiapimbo icpanëdash.

¹¹Onquequin dëniactiapimbo icquin utsibo naden aidon chuipanëdash: —Tsusiobo naden chiec nidtan: Estebanën nuquin tsusedpa Moises caidën dada uampidbëdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi

—cac chiec nidpanēdash. ¹²Aden chiac tsusiobobēd Moisesēn dada uapampid paquiacquidobēd isadaidbo utsibotedi nēishcuededshun Esteban bedshun tsusiobo iccuededacno buanquin yuedshun ismepanēdash. ¹³Ambo abi dēniactiapimbocquidon Esteban muaquin chuita caboedon naden chuibededpanēdash: —Nēid dada Nuquin Papa tabadte shubu uashunaidbēdta Nuquin Papan Moises dada uamepampid ēnenquiocquin muaquin chuibanec. ¹⁴Naden Estebanēn chioshe. Tantia: Nasaded yacno iccondaidēn, Esuquidistu caidēn Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidēn dada uampid naden nata quequin chiaid natiapimboctequid nec, quequin Estebanēn chuibanosh, quequin muaquin chuipanēdash Esteban dēniactiapimbocquidon chomiaidon. ¹⁵Aden Estebanēn chiaid muaquin chuiquin naimbudquimbi tsusiobobēdtambi comapenen Esteban bēisquin Estebanēn bētantiате ushēbimboec ushumbo yec chēnquesho isbededpanēdash.

Estebanēn chuibanaid

7 ¹Adec Estebanēn bētantiате ushēbimboec chēnquesho isec tsusio dapambo Esteban chuiquin: —¿Abimboda mimbi naid chuiposh? ²—caquien yuecquio onquequin Estebanēn naden chuipanēdash: —Chiembique. Tantiakiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uēshēmbō yec dasiuidteniaid matsesēn istemaidd bēchomaoanquieci icquid Abadauan ismepampic. ³Aden ismec nadec onquepampic: “Min utsitedi

nianec nidaid utsi yacno mibi ēmbi ismenu caid yacno nidta.” ⁴Adsho tantiash Candeyabon nidaid yacnoēsh nidashic nidaid Adan caid yacno choash Abadauan tabadpampic. Ambo tabadashien aton papa unēsan Adan yacno nēbi nuqui tabadbocono Nuquin Papan nuquin tsusedpa Abadauan chomepampic. ⁵Aden chomeshun Nuquin Papan naden Abadauan chuipampic: “Nēid nidaidd mibi capuacno mitsanapenquio nec. Yuecshun mibi menenun nanuna. Mimbi tishmiamboctequid min chidon tishaid abentsēc min madombo nēid nidaid menendambi. ⁶Nēid nidaid bedabi yec mimbi tishmiaisēn tishmiaisēn caidaidd matses utsibon nidaidd tabadendac. Ambo tabadshobi anocquiddēn aido yuashun seta dadpen 400ted matamequin mēyanendac. ⁷Adoacsho aidotsen cuidquin mēyanoaindambi,” quepampic Nuquin Papa. Adashic abi Nuquin Papa onquec: “Min madon tishmiaisēn caidaidd abi mēyanacnoēsh nidashic nēid macuēsh yacno choshon ēmbi chiacpadomboen nabanendac.” ⁸Aden chuishumbic, Nidaid menenun nanuna, quequin Nuquin Papan naden Abadauan chuioapampic: “Dada bacuēbēdta dada caniaidtedi shui dēbid dētemeta. Adobansho isun, Ēmbi chiaid bēdamboen naquidquio aidtedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanēn ambia dētemeshun dadatedi aidēmbidi shui dēbid dētemeoapampic. Adoshombic yuecquio icshun Abadauanēn aton mado tishmeshun Isac cuēnquin 7tedec ushun Isaquēn shui dēbid dētemeoapampic. Adoshombic adembidi Isaquēn aton mado tishacsho Acobo cuēnquin aidtedecbidi ushun

Isaquënsen Acobon shui dëbid dëtemeoapampic. Adoshombic, canishun Acobon tishmiaido 12ted icpampic. Abentse-abentsen tishmeshun aidtedecbidi ushun aton madon shui dëbid dëtemeoapampic. Adoaquien yuecash Acobon madotedi tsusiobudnepampic —quepanëdash Esteban isadaidbo tantiamenu quequin chiec.

⁹Aden chiec abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaidquo icsho isash nëishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoaquin Equipito yacnocquid Ose meneoapampic. ¹⁰Adoac, Yuanu, queshun natiamiaid Ose icsho isun Nuquin Papan aid dayun uaqin dacuëdenquo icmequin comapenen tantiaquidquo bëdamboen chuiquidquo Ose Nuquin Papan icmepampic. Adquidquo icsho isun Equipito yacnocquido ancaquidën Padaon caidën Equipito yacnocquido chuiquidquo Ose icmepampic.

¹¹“Yuecash Equipito yacnocquido chuiquid, Ose, icnubi nidaid Equipito caid yacnocquidbëd nidaid Canan caid yacnocquido natiambo buncuededpampic. Adnubi nidaid Canan yacno nuquin tsusedpabo Isadaidbon pete nibëdquieç yampampic. ¹²Adshumbic, Equipito yacno quënë uashun dayun uaid pete iquec, qesho tantiashun Osen papan Acobon ambi tishmiaido nuquin tsusedpabo chuiquin: ‘Equipito yacno pete iquec, qesho tantiombique. Bedtan,’ cac Osen utsibo aton papan chiapadec pete bedec nidaneppampic. ¹³Adanec Acobon madotedi aton utsibo Equipito yacno

choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose qesho tantienquiocboedëmbi Padaonën tantiabempampic. ¹⁴Aton utsibo Padaon chuibanshumbic Osen aton utsibo chuiquin: ‘Nuquin pabëdta nuquin matses bedtan,’ capampic. Adoac bedoanec Equipito yacno choapampic. Abëd icquido 75ted icpampic. ¹⁵Adashic, Equipito yacno yuec tabadashi tsusio budashi Acobo unëspampic. Auëshquibidi nuquin tsusedpabo Acobon madotedi adecbidi unësoapampic. Unësacsho Equipito yacno chococapampic. ¹⁶Adashic, yuecquio yash Equipito yacnoësh nidquin unësaidon tishmiaid caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, piucquid menequin tsusedpa Abadauanën tied bedshunëdacno chococapampic.

¹⁷Aden chuishumbic Estebanën nadopanëdash: —Equipito yacnoësh tsusedpabo nidabi icnuc Nuquin Papan, Nidaid menenun nanuna, quequin chuipampid ushë chote anoentsëc yanuc nuquin tsusedpabo dadpen yanec caidpampic. ¹⁸Dapen caidsho isun Equipito yacnocquido ancaquid utsin Ose pado tantienquo icpampic. ¹⁹Aidëmbi mua uaqin chuiquin natiamequin nuquin tsusedpabon dada bacuë tishacsho bedtemaid nec, quequin nemepampic. ²⁰Adnubien dada bacuë Moises tishacsho Nuquin Papan, Aid bëdaidquo iquec, quequin ispampic.

Aidi icucshun ushë abentsëc choaid nidmequin Equipito yacnocquido ismenquiocquin aton mado Moises anin ompopampic. ²¹Ompoaqui Moises shubisho tantiashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesec budquin tsitsanën Moises noadtsëcsho istuidshun bedash, Con mado caimbi, quepampic ancanquidën champi. ²²Bedtsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito yacnocquidon naidtedi naquin aidën chiaidtedi Moisesën tantiabenquiopampic.

²³“Adashic, Equipito yacnocquidobëd tabadquin abi tishaid seta 40ted matamiashe isadaidbon tishmiaido con matses isnu, quianec aton matses chonoadacno nidquin Moisesën istuidpampic. ²⁴Istuidnubi Equipito yacnocquid dada abentsëcshun isadaidbo dada abentsëc mëyanquin cuesuneshe isun Equipito yacnocquid cuidnuequin Moisesën cuesuneoapampic. ²⁵Ëmbi adosho isun, Equipito yacnoësh nuqui bëyucanquin buanquid Moises nendac, quequin con matsesën tantiapatsiash, abibi quetsëcquieq nidnubi aton matsesën tantienquio icpampic. ²⁶Badiadash aton matses yacno padpidec nidquin aton matses daëd cuesnansho istuidshun, Ëmenu, abibi quec choquimbi: ‘¿Atotsi quec min matsesbëd cuesnane?’ Moisesën catuidpampic. ²⁷Adoaquien Moises cuëscanec: ‘¿Ëmbi nasho cuidquin ëbi chuiquid tsuntsin mibi icmioshe? Chui. Tiantianu,’ quetanequi: ²⁸‘¿Equipito yacnocquid mimbi cuesunebocpadenda ëbitsen cuesune?’

quepampic cuesnanquid Moises caic.

²⁹Aden chuisho tantiashien, Equipito yacnocquido ancaquidën tantianushe quianec dacuëdec Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

³⁰“Adashic, seta dadpen 40tedbidi matamec nidaid Madian caidën tabadec cuëtempuiuidquio yacno matses nibëdquieq yacno macuësh dapa Sinai caid anoentsëqui Moises chopampic. Ambobi tabadquimbi cuëtempï nëdënquiacbimboecquid nënantanquio Nuquin Icbon Chomiaid tabadsho Moisesën ispampic. ³¹Aid istanequien tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuiopampic: ³²‘Min tsusedpa Abadauanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,’ queshe tantiash dacuëdec uëdëquec istiapimbo yec Moises nidtuidpampic. ³³Nidtuidsho isec Nuquin Icho Moises chieq nadpampic: ‘Nëmbo ëbi icsapenquio icquid icnuc caputemaïd nidaid iqueque. Min tapucudte chicshun tantiata. ³⁴Min matses ëbi cudasaido Equipito yacnocquidon mëyanac uëshquec shubiquiosho tantiashun aido Equipito yacnoshon buanta mibi canueq chobi. Nëbi Equipito yacno mibi nidmeoaimbi,’ quepampic Nuquin Icho Moises chieq.

³⁵“Aden cuëtempï nëdënquiacbimboecquid nënantanquio icboedën Nuquin Papan Chomiaidën isadaidbo bëyucanquin buanquid icta cac: ‘¿Ëmbi naid icsho cuidquin ëbi chuiquid tsuntsin mibi icmioshe? Chui.

Tantianu,' abi caondaído bëyucanquin buanquid Moises icpampic. ³⁶Adquid Nuquin Papan icmiac Equipito yacnoshon aton matses bëyucanquin buanun Moisesën nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeoapampic. Adoshombic, matses nibëdquieq yacno seta dadpen 40tedbidi matamec abi tabadcueniactnoshontsen nadatiambocquin nabanquin isadaidbo Moisesën ismeoapampic. ³⁷Aidëmbi naden chuipampic: 'Yuecquio icshun ëbipadquid mimbi tishmiaidën tishmiaidon caidaid Nuquin Papan chuiquidquio icmendac,' quequin Moisesën chuipampic. ³⁸Isadaidbo bëyucanquin chuiquid Moises matses nibëdacno isadaidbobëd macuësh dapa Sinai caid yacno choash Nuquin Papan chomiaidobëd Moises tabadpampic. Ashunquio Nuquin Papan abëdi tabadte tantiamenuequin cuënöte pada-padambocquidën ambi naden nata quequin dada uaid Moises menepampic. ³⁹Aden aid dada uaid bedshun bëyucanquin chuisho tantiesä yanec nuquin tsusedpabo Moises bunenquio yec Equipito yacno nidoate bumpampic. ⁴⁰Adashic, Moises macuësh yacno yuecquio tabadnubi Moisesën utsimbo Adon cuëmëdquid aton matses utsibon naden chuibededpampic: '¿Moises nuqui Equipito yacnoshon bëyucanquin bëboed mitsi nidpash nec? Nibëdpequien iquec. ¿Atotsi quec nidpash? Nuquin Papan uacpadquiocnoc nacnenta. Nacnenash bëyucanquin chuiquid aid iquendac,' tsusedpabon cac ⁴¹bacan bacuëbimboecnuc Adonën nacnempampic. Ambi nacnenaid tantiaquin isadaidbon nidaidën capuquid yua cuesuneshun

cuëdënëmbededpampic. ⁴²Adquid cuëdënësho tantiash isadaidbobëd ictiapimbo iquec Nuquin Papa, Padi. Adenda, quenquio icpampic. Adquido Nuquin Papan ëndenquimbo tantiaquin naden chuipampic: 'Adomboen mimbi nacnenaid tantieq tabad.' Adembidi Nuquin Papan yuecquio icshun nanun chiaid isadaidbo chuquin naden dada uamepampic:

¿Matses utsi nibëdquio yacnoshon seta dadpen 40ted matamequin ëbi tantiaquina nidaidën capuquid yua cuesuneshun pambid tauidenio? Padenquio.

⁴³Ëmbi uaid badiadën ushë, ëbitedishun bëyucamembi, qeshun aidpadquid nacneshun Modoc cuënquin aton shubumpi nuntan namposh.

Aidbëdtabi uispa dapatsen ëbitedishun bëyucamembi, qeshun aidpadquidbidi nacneshun Dempan cuëneq danëshën sebudec shuebudshun, Mibi tantiaquid nebi, quequin adquid mimbi chuipoc. Aden nasho isun ëmbi menenu caid nidaid yacno mibi nidmenquio icquin nidaid utsi, Babidonia caid udi mibitedi nidmeoaindambi.'

Aden ambi chiaid niacquido isadaidbo tantienquio icquidobi Nuquin Papan chuipampic —quepanëdash Esteban isadaidbo chieq.

⁴⁴Aden chieq yuec onquebudec: —Matses utsi nibëdacnombo nidanequin tsusedpabon Nuquin Papa tabadte chicbanshun buampampic. Aidëmbi Moises ismiacpadembi isadaidbon Nuquin Papa tabadte shubu uashumpampic. ⁴⁵Adashic, tsusedpabo aid shubu uaquidotedi unësan ambi tishmiaidontsen aid shububidi adomboembidi chicbanshun

buanoapampic. Adoshombic,
isadaidpembro utsi-utsien cuemenu,
quequin aidon nidaid yacno aid shubu
chicbanaid bëshun bëyucanquid Osue
cuëmëdquidbëdtan nuquin tsusedpabon
aid nidaid nënantanquio shubu
uaoampic. Aden aid shubu
nacnenoanubien isadaidbo chuiquid
dapa nuquin tsusedpa Dabid
yampampic. ⁴⁶Aidi Nuquin Papan
bëdamboen isaidquio aid nidaidën
tabadquin Nuquin Papa tabadte
buantiapimbocquid shubu
uashuntiaquiocquin shubu uate
bë-bëmepampic. ⁴⁷Aid shubu uabi
Dabid unësambic ambi tishmiaidën,
Sadomon cuëmëdquidën, Nuquin Papa
tabadte nainquin shubu uashumpampic.
⁴⁸Aden matesën shubu uaidën Nuquin
Papa tabadenquio iquec. Adembidi
Nuquin Papan chuimianiaidën naden
chuiampic:

⁴⁹ “Abutenquiobi con tsadte dapa
iquec. Adecbidi nidaidtenquiobi
ëmbi tincatequid nendac.
¿Adquid icnubidabi matesën
nidaidën shubu uashun
tabadmepadic? ¿Nidaidënuidi
tsadpectabi tiboquendac?

⁵⁰ ¿Tauaquiouimbi abitedi
uambodambi ictionda?”

quequin Nuquin Papan chuimiaidën
dada uapampic —quequin chiaشح
Esteban abi onquec:

⁵¹—Pacuënëdacbimboen Nuquin Papan
chiaid tantiaش tsuquin ënesa mibitedi
nec. Aton Mayanën tantiamenu cac
tsusedpabotedishun
chieshëmpampicpadembi mibitedishun
chieshënoaic. ⁵²¿Nuquin Papan ambi
yuecquio icshun naden nanuna quequin
chiaid ambi chuimiaidtedi min
tsusedpabon mëyanenquioda icpampic?
Adembidi, Nuquin Papan chomiaid
choendac, quequin chuiquido

tsusedpabon cuesunepampic. Aidon
nacpaden Nuquin Papan chomiaid
mibitedishun unës uamiondac.

⁵³Nuquin Papan chiaid ambi uaidon
mayan bëdabon meniaqui Nuquin Papa
chieshënuquido mibi nec —quepanëdash
Esteban isadaidbo chuiquin ënec.

Esteban se-siaid

⁵⁴Adec Esteban onquesho tantiaشun
nëishëshun Esteban iccuededquidon
chushcapanëdash. ⁵⁵Adoaquien Nuquin
Papan Mayan meniaidquio icquin
Estebanën abuc isquin Nuquin Papa
uëshëmbo yec matesën istiapimbo
bëchomaoanquieic ictequid abichobi
dasiuidteniaid chënquenubi Nuquin
Papabëd tancandaëdquieic Esuquidistu
nidtuidsho ispanëdash. ⁵⁶Aden isequi:
—Abuc shëcuë uaid shëcniaye. Is. Umbo
Esuquidistu, matesondaid, Nuquin
Papabëd tancandaëdquieic tsadsho
isembi —quepanëdash Esteban.

⁵⁷Adsho tantiaش tsusiobo comapenec
sidquianec pamumëdanec titinquequin
Esteban bedshun ⁵⁸cuënóten se-senuen
shubu nibëdacno udi buampanëdash.
Aden Esteban buanshun aton dashcute
Saudo cuëmëdquidën taëno
sampanëdash Esteban se-senuequidon.
⁵⁹Sanshun se-siaquic Estebanën
Esuquidistu cuënquin naden
chuiapanëdash: —Ëbi yued, Icbo
—quiashic, ⁶⁰danëshën sebudash
comapenec nadec onquec: —Ëbi
se-sequido icsaid cuidenquio yec
bëpiscudta, Icbo —quepanëdash. Adec
onquetanec Esteban unëspanëdash.

Saudon Esus tantiaquido mëyanaid

8 ¹Esteban se-senu caquien, Ai, adota,
quiash isec uano Saudo
tsadpanëdash. Esteban se-siaid ushëmbi
Edusaden yacnoshon Saudon Esus
tantiaquid utsi-utsien comapenen

mëyanquin tauadopanëdash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanëdash. ²Adnubien Nuquin Papan chiacpadomboen naquin Esteban chococaic comapenec sedenquec shubipanëdash. ³Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabëdtabi chido chedo bedmeshun quenën nauedmepanëdash.

Samadia yacnoshon Esus chuibanaid

⁴Adashic Edusaden yacnoësh nidanec shubu dadpen icquid utsi-utsiec yacno choshon abi tantiaquidon Esus chuibenepanëdash. ⁵Adembidi niante chidobo aton na nibëdsho menequid, Uedipe cuëmëdquid nidaid Samadia caid yacno choshon adembidi Esus chuibanoapanëdash. ⁶Aidën nadatiambocquin nabanquin Esus chuibansho ambocquido iccuededquin bëdamboen tantiapanëdash. ⁷Aidëmbi nadatiambocquin nabanac mayan icsa dapuduedaid icboedi mayan icsa sidquianec cuempanëdash. Adecbidi canite icsaidbëdta caputiapimbocquid dadpen bëdampanëdash. ⁸Adsho isash Samadia yacnocquido, Bëdambo iquebi, quec tabadpanëdash.

⁹Adnubien Samadia yacno ënden chondaid, Nadatiambocquin nabanquid dapa nebi, quequin mayan icsan tantiamiacpaden Simon cuëmëdquidën nabampanëdash. ¹⁰Adosho isash: “iEee! Abimboshenda caposh. Nëid dada Nuquin Papan ambi nadatiambocquin nabante tantiamiaid nec,” quequin anocquidobëdta abi chuiquidon comapenen tantiapanëdash. ¹¹Aden yuen Simonën ismiac, Isnuequid dadpen

badiadquidën-badiadquidënquiec abi yacno choash iccuededpanëdash.

¹²Adnubien, Nuquin Papa yacno puduedmianquid Esus nec, quequin Uedipen chuibansho tantiaquid yampanëdash dadabëdi chido chedo. Adsho aitedi acten mentomepanëdash.

¹³Simontsen: —Esus tantiaquid nebi —quesho acten mentoquimbi Simon Uedipebëd capuquimbi Uedipen nadatiambocquin nabansho isun, Adopenshenda nabanec, quequin ispanëdash Simonën.

¹⁴Adashic yuecash Samadia yacnocquido Edusaden yacno nidash nadpanëdash: —Nuquin Papan chiaid Samadia yacnocquidon tantiabededec. Aden chuisho Esus chuibenequidon tantiashun Uambëdta Petedo Edusaden caid yacnoësh nidaid Samadia caid yacnoshon nidmepanëdash. ^{15,16}Adec aid daëd nidaneshun: —Esus tantiaquid acten mentoaidoudi nëidtedi nec —anocquido quesho tantiashun: —Nëidtedi min Mayan mene, Papa —quec onquequin ¹⁷Petedobëdta Uanën mëdanten Esus tantiaquido mamishbampanëdash. Aden mamishbanubi aitedi Nuquin Papan aton Mayan menepanëdash.

¹⁸Aden Petedon nasho isash Simon: —Ma adquiec mëquiadnueshun mibi piucquid menenu. ¹⁹Mimbi matses mamishacpadembi ëmbi mamishaidtedi ma Nuquin Papan Mayan meniaid icpanuna —quepanëdash.

²⁰Adoquien Petedo: —¿Piucquid menecta mibi mëquiadpe? Adoquin mimbi tantianuc tauiantiadpambo chian anëdënquiacno ma mibëdi min piucquid icpanu. ²¹Mimbi Nuquin Papan chiaid icsamboen tantiaquin ëmbi nacpadomboen natiapimbo mibi iquendac. ²²Mimbi icsamboen tantiaid ënta. Aden icsaid ënsho isash Nuquin

Papa mibi icsaid bēpiscudendac.

²³Mayan icsan yua icquin tactau tishidaid mishaid mucambo yacpadec icsamboen mimbi muaquin chuibanaido icsaindac.

²⁴Adoaquien: —Ēbi tauiantiadpambo chian anēdēnquequid nēnenushe quiaish mibi Uambēd Nuquin Papa chiec bēdamboec onquebudneta —quepanēdash Simon.

²⁵Adec Samadia yacno tabadquin Petedobēdtan Uanēn: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuioapanēdash aidēmbidi.

Uedipe Etiopia caid yacnocquidbēd icaid

²⁶Adoshombic, Samadia yacno Uedipe icscho Nuquin Papan uaid mayan bēdan nadopanēdash: —Nēuēshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibēdacno podquedēn nidash nidtuidtanec chotan.

²⁷Adoac nidtoanec nidquimbi Nuquin Papan uaidēn mayan bēdan chuibocno choquin Etiopia caid yacnoēsh choquid Uedipen bēquedtuipānēdash.

Ancanquid chido Candase cuēmēdquid aton na dayun uashunquid aid dada nepanēdash. Aidi Edusaden yacno nidash tabadquin Nuquin Papa chianec

²⁸padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanēdash. ²⁹Adnubien Nuquin Papan Mayanēn: —Nidaid cano chinunta —cac ³⁰Uedipen titinquequin chinumpanēdash.

Aden Etiopia yacnoēsh choquid dada uaid isec onquesho isash: —ĭIsbanec onquequinda tantiaquie? —quepanēdash Uedipe.

³¹Adoaquien: —Tantiamequid nibēdnuc ĭmitsipadentsimbi tantiape? Ēbēdi antsadtoc cho —cac Uedipe abēdi antsadtapanēdash.

³²Aidbēdi antsadtoshon Etiopia yacnoēsh choquid Nuquin Papan dada uamiampid isec onquesho Uedipen naden tantiapanēdash:

“Obeca cuesunenuen
nimbambocpadomboembidi
mētaneshun nimbanoaposh
Nuquin Papan chomiaid unēs
uanuequin.

Adecbidi obeca bacuē abi
datasnuequid icnuc cuēdenquio
yacpadec abi unēs uanuequid
icnuc cuēdenquio icoaposh
Nuquin Papan Chomiaid.

³³Aidi Icsaisa icscho mēyansho isec, Icsambocquidta neque. Isnu, quenquiocposh aton matses. Aidi chido inesa yec ambi tishmiaid nibēdnuc ĭTsuntsin ambi naid chuipadic?”

³⁴Aidtdtsēqui abi isec onqueboed Uedipe ismeshun Etiopia yacnoēsh choquidēn: —Ēbi isec onqueboed ĭmitsicquid chiequini onquepo? ĭAbibi chiadaidtabi isec onquepo? ĭUtsida chuibaneque? Ēbi chui. Tantanu —capanēdash Etiopia yacnoēsh choquidēn Uedipe chuiquin.

³⁵Adoaquien, Matsestedī icsaid bedshunash abided cuidadec Esus unēsaid Nuquin Papa yacno puduedmianquid nec, quequin dada uapampidēn chiec, quequin Etiopia yacnoēsh choquid tantiamenuen chuibanpanēdash Uedipen.

³⁶Adoanec nidquimbi Etiopia yacnoēsh choquid Esus tantiaquid yanshun actempi istuidshun: —Actempi iqueque. Is. ĭAdabi mentoe? —capanēdash.

³⁷Adoaquien Uedipe: —Esus tantiaquidquio nebi, quesho mibi acten mentono —capanēdash.

Adoaquien: —Nuquin Papan mado Esuquidistu nec, quequin aid tantiaquid nebi —queshun Etiopia yacnoësh choquidën: ³⁸—Nidituid —cac nidaid cano nidmequidën cabayo nidituidmian acte budshun Etiopia yacnoësh choquid Uedipen mentopanëdash. ³⁹Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquio yequi, Esus tantiec bëdambo iquebi, quec Etiopia yacno nidoapanëdash.

⁴⁰Adnubien Uedipe Nuquin Papan Mayanën nidaid utsi Asoto caid yacno buampanëdash. Ambo capucuenequin shubu dadpen icquid yacno-yacnomboen Esus chuibëec onquec choequi shubu dadpen icquid Sesadeya caid yacnotsen choapanëdash.

Saudon tantiate paucaid

9 ¹Adnubien Edusaden yacnoësh Esus tantiaquid utsi-utsiec nidanenubien Saudo Edusaden yacno tabadpanëdash. Ambo tabadec chushquec Esus tantiaquidtedi cuesunemetiadquio yec isadaidbo chuquid dapabo yacno Saudo choash ²shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caid yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuquid adota queoatsiash, quequin Edusaden yacnoshon Isadaidbo chuquido chuapanëdash Saudon.

³Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudo dëcatepanëdash. ⁴Aden dëcatiaac Saudo

paëdash uestho isun nadec abucuësh onquec: —Saudo, ¿tatotsieshun ëbi tantiaquido mimbi mëyampeba? Èbitsen mëyantiadpambocquin mimbi aido mëyanec —quepanëdash.

⁵Adoaquien: —Icbo, ¿Tutsi mibi ne?

⁶Adoaquien: —Mimbi mëyanaid Esus nebi. Èmbi chiaid chieshënecc mibi tabadeque. Nidtoash Damasco yacno nidtan. Anoshon ëmbi nata cacpadomboen anocquid mibi chuimembique. Nidtan.

⁷Adec abucuësh onquenubi Saudobëd cho-choquido nidituidshun tantiequi onquequid isenquio yec tabadtuidpanëdash. ⁸Onquec ënëdan nidtoash Saudo istiadquio iquequi bëshupanëdash. Adsho isun mëdinanquin Damasco yacno buampanëdash. ⁹Adequi Damasco yacno choash 3tedec ushec isenquio yec buna mëmunquiecc Saudo tsadpanëdash.

¹⁰Adashic, Saudo puduedash tabadacno ëdibicstëc tabadquid Esus tantiaquid Ananias cuëmëdquid icpanëdash. Aid usho Esusën: —Chuinu. Tantia —caquien:

—¿Atoda? Nëbi uebi, Icbo —quepanëdash Ananias.

¹¹Adoaquien: —Nidtoash podqued cuembocquid caid yacno nidtan. Ambo choash Udasën shubun puduedshun shubu dadpen icquid Tadso caid yacnoshon tishaid Saudo cuëmëdquid Nuquin Papa chiecc onquec tsadsho mimbi istuidendac. ¹²Adec aid ushacimboc tsadsho mibi choshon aidi padpiden ismenuen mimbi mëdanten mamishac isoshe. Aidi istan —capanëdash Esusën.

¹³Adoaquien: —Con matses dadpenshun Saudon naid icsa chuibansho tantiombi, Icbo. Aidëmbi Edusaden yacnoshon mibi tantiaquido mëyamepac caoshe. ¹⁴Aidbidi Edusaden

yacnocquido chuiquid dapanquio dada uaid sananquin nēmbotsen mibi tantiaquido bedmeshun tanemenuec aidi chopac caosh —quepanēdash Ananias Esus chiec.

¹⁵Adoaquien: —Aidi ēbi chuibeneta caidquido icmeshun ěmbi bēdamboen isaid neque. Aid dacuēdēnenquio yec nidshun istanta. Aidēn isadaidbo abi chuiquidobēdta isadaidpembo abi chuiquidobēdtabidi ēbi chuiben-chuibenec capuendac. ¹⁶Ēbi chuibenesho mibi mēyantequid iquendac, quequin Saudo tantiamembi —quepanēdash Esus.

¹⁷Adsho tantianec Ananias nidash Udasēn shubun puduedshun Saudo mamishec: —Con utsi, mibi podquedēn chosho chuiquidēn Nuquin Icbonquio, Esusēn mibi padpiden ismenuen Nuquin Papan Mayan mibi menenuembidi chomiaid nebi —quepanēdash Ananias Saudo chiec.

¹⁸Aden Ananiasēn chuinubi nuēcquid bitsibimboecquid ēshēnuēsh paēdnubi bēshuacboedēmbi, Saudon, bēdamboen ispanēdash. Aden isec capusho isun acten mentopanēdash. ¹⁹Adecbidi Saudo penquio yec padishacboedi piash padpidec uidēncuenoapanēdash.

Damasco yacnoshon Saudon Esus chiaid

²⁰Adec uidēncuenash Saudo Esus tantiaquidobēd tabadpanēdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuipañēdash Saudon. ²¹Aden chuisho tantiaish tantiadempambo yec tabadec: —¿Edusaden yacnoshon Esus tantiaquido mēyameboedida nec? ¿Adecbidi nēmbi choshon tanemeshun isadaidbo Edusaden yacnocquido chuiquid dapabo yacno buamenuec choabida ictic? —quepanēdash Damasco yacnocquido.

²²Aden anocquidon tantianubi Nuquin Papan Mayanēn oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuen Nuquin Papan chiampid Saudon comapenen chuided-chuidedpanēdash.

Isadaidbo Esus tantiesa abi cuesunete bunsho isash Saudo cuenaid

²³Adembidi yuec ushquin Saudon ēnenquiocquin chuibansho tantiaish, Icsamboen chiec, quiash isadaidbo utsibo yec abi cuesunete bunsho isun tantiaquidēn chuisho Saudon tantiapanēdash. ²⁴Adnubien Saudo cuesunenuen shubu dadpen icquid abichobi tsicatequin daquēnē uaidēn shēcūē cuēmanoshon abi chieshēnquidon caimpanēdash Saudo puduensho bednu quequin. ²⁵Aden cainsho isun Saudo cuesunenushē qeshun chiac inchēshēmbi onquenquiocquin tsitsan dapan Saudo antsaduntanquin tsicatiaid quēnē cachoc Saudo budmepañēdash.

²⁶Budanec Saudo Edusaden yacno nidoash Esus tantiaquidobēd tabadnuesho isash, Saudon mua uaquin ēbi bednushe quiash dacuēdcuededpanēdash aido.

²⁷Adnubien, Saudobēd Esus tantiaquid utsitedi yacno choshon Bednaben yuedpanēdash. Aden yuedshun: —Saudon Damasco yacno nidquin Nuquin Icho ispac caosh. Nuquin Icho Saudobēd onquepac caosh. Adanec Damasco yacno choshon dacuēdenquiocquin Esus chuibampac caosh, quequin Saudon naid Bednaben chuibampanēdash. ²⁸Aden Bednaben chuibanac Esus tantiaquido Saudo dacuēdenquiocnobi aidobēdi capuquin Saudon anoshombidi Esus chuibanoapanēdash. ²⁹Ambo capuquin

isadaidbo quidiecon onqueten onquequido istuidshun Saudon adembidi Esus chuibanacsho tantiashun aid cuesunenuequin aidontsen cainoapanēdash. ³⁰Aden Saudo cuesunenuen, cainec quesho tantiashun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidsēqui nidmepanēdash.

³¹Adashic Saudo nidmian cuesunenushen quenquo yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuēdenquo yec tabadpanēdash. Adec tabadquin, Nuquin Papan chiaid tantiabenu, quesho Nuquin Papan Mayanēn adomboembidi tantiamiac bēdamboec tabadpanēdash. Adec tabadquin Esus chuisho tantiesha icboedi Esus tantiaquid dadpenquo yampanēdash.

Petodon Ananias Dodcastsen bēdamiaid

³²Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanēdash. ³³Ambo choshon dada, Eneyas cuēmēdquid, seta dadpen 8ted matamec canite tsasiaid Petedon istuidshun: ³⁴—Esusēn mibi bēdamiaque. Nidtoashon min uete buanun nacenata, Eneyas —Petedon cac Eneyas badedquo nidtoash capupanēdash. ³⁵Eneyas capusho isash Dida yacnocquidobēdi nidaid Sadon caid yacnocquido Esus tantiaquid yampanēdash.

³⁶Adnubien Dida uidsēc shubu dadpen icquid Ope caid yacnocquid, Esus tantiaquid utsi, chido, Tabita cuēnshumbi quidiecon onqueten Dodcas cain cuēnaid tabadpanēdash. Aidi bēdamboequid icquin

badiadquidēn-badiadquidēnquien pete nibēdquido menedenepanēdash. Adembidi aton na nibēdquido Dodcasēn menedenepanēdash. ³⁷Aidi Petedo Dida yacno icnubi icsabudec unēsō isun abēd icquidon dapanshun shubu abuc quēnē icquidēn nampanēdash. ³⁸Aden nanshun, Petedo Dida yacno tabadec, quesho tantiashun aid chomenuequin dada daēd Petedo tabadacno nidmiac aid daēdi Petedo tabadacno choshon Dodcas unēsboed chuishun: —Nidtuidenquo yec badedquo ēbēdi cho —cac ³⁹abēdi badedquo Ope yacno Petedo nidpanēdash. Adec nidec Ope yacno chosho isun abuc quēnē icquidēn puduedmepanēdash. Ambo puduedsho isun shubiquimbi niantebon Dodcasēn tuscaboed dashcute dadpen Petedo ismepanēdash.

⁴⁰Adosho isun abitedi puduemiashe danēshēn sebudash Nuquin Papa chiech onquetanec nidtoashon unēsboed isquin: —Nidto, Dodcas —Petedon cac uincuenequi Petedo isec Dodcas badedi uētsēdtopanēdash. ⁴¹Uētsēdtoashon isun mēdinquin nidtomeshun niantebobēdta Esus tantiaquid utsibo cuēnquin cho-chomeshun uincuenboed ismepanēdash. ⁴²Aden Dodcas ismeshe isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanēdash. ⁴³Adnubien Petedo Ope yacnocquid nidaidēn capuquid bitsi uashun chodcashun nacenquid Simombēd yuec Petedo tabadpanēdash.

Petedo Codnedion chomiaid

10 ¹Adnubien shubu dadpen icquid Sesadeya caid yacno Codnedio cuēmēdquid isadaidpembo nidaid Itadia caid yacnoēs Sesadeya caid yacno choash tabadpanēdash. Aidi sondado dadpen 100tedi chuiquid icpanēdash.

²Aidi aton shubun icquidobēdi Nuquin Papa tantiaquid icquin isadaidbo aton na nibēdquid icscho isun menebanquid icpanēdash. Adecbidi Nuquin Papa chiec onquianedenepanēdash. ³Adquid yec ushē budtsambi tedes yanuc Nuquin Papa chiec onquequimbi ushacimboecquin Nuquin Papan uaid mayan bēda Codnedion ispanēdash. Nuquin Papan uaid mayan bēda choshon: —Codnedio —capanēdash.

⁴Adsho tantiash dacuēdquin comapenen isec: —¿Atotsibi name, Icbo? —quepanēdash Codnedio.

Adoaquien: —Abi chiec mibi onquedenesho Nuquin Papan tantiec. Adembidi aton na nibēdquid tantiaquin menedenequid mibi icscho Nuquin Papan bēdamboen isaid mibi neque. Chuinu. Tantiata. ⁵Nēbi Simon cuēnshumbic Petedo cuēnoaid ma bednu mimbi namiaido Ope yacno nidmetan. ⁶Simon utsi nidaidēn capuquid bitsi uashun chodcashun nacnenquidbēd tabadec. Aidēn shubu acte cuēmambi iquec —quepanēdash Nuquin Papan uaid mayan bēda Codnedio chiec.

⁷Aden chianec Nuquin Papan uaid mayan bēda nidambi Codnedion aton yua daēdbēdta sondado abentsēc chomeshun ⁸Nuquin Papan uaid mayan bēdan chuibocpaden Petedo bedmenuen ambi namiaido Codnedion nidmepanēdash.

Petodon ushacimboec tsadquin isaid

⁹Adashic, ushē cuemboecnoc Ope anoentsēqui Codnedion nidmiaido chonobi Petedo Nuquin Papa chiec onquenuc shubu macano pada-padapambocquid yacno dectatopanēdash. ¹⁰Adec dectatoash shubu icbon codocanubi Petedo bundoec ushacimboec tsadquimbic ¹¹abu posonianec abi yacmi dabidiete

dapabiecquid bucun dēnēshbudcuenaid budsho Petedon ispanēdash.

¹²Aidēnquio ambi petequid ambi petemaid chedo nidaidēn capuquid tacbidēn capuquidbēd podochoquid chedo antabēdpanēdash. ¹³Adnubien: —Nidtoschon cuesuneshun pe, Petedo —capanēdash abucuēsh onquequin.

¹⁴Adoaquien: —¿Abida cai? Ēmbi petemaid tauishun mibi shēdmetemaidquio antabēdquid nec. Adquid piamboccombi, Icbo —quepanēdash Petedo.

¹⁵Adoaquien padpidec abucuēsh onquec: —Nuquin Papan bēdambo icmiaid icsambo iquec cainda —quepanēdash. ¹⁶Adotanquimbic antabēdquid abuc buanshun adomboembidi abentsēc chotsēcnu budmequin adembidi Petedo chuishun abuc shēcucē uaid yacno badedquio buanshun puduedmeopanēdash.

¹⁷Adosho isash Petedo ambi isboed tantiec tsadnubi Codnedion chomiaido Simonēn shubu istuidash shēcucē cuēmamo choec nidtuidpanēdash. ¹⁸Choec nidtuidash: —¿Nēmbody Simon Petedo tabadec? —quetuidpanēdash.

¹⁹Aden chuituidnubi ambi isboed tantiec Petedo tsadsho Nuquin Papan Mayanēn: —Dada abentsēc chotsec choshon mibi nibēnec. ²⁰Ēmbi chomiaido neque. Budash cacuidenquio yec aido bēdi nidtan —capanēdash.

²¹Aden chiac budshun Codnedion chomiaido isash: —Mimbi nibēnaid nebi. ¿Atotsi quec cho? —quepanēdash Petedo.

²²Adoaquien: —Codnedio cuēmēdquidēn chomiaid nebi. Aidi sondado dadpen chuiquid bēdambocquidquio nec. Adquid icquin Nuquin Papan chiacpaden nabansho isun isadaidbon bēdamboen isaidquio nec. Aidi Nuquin Papan chomiaid

mayan bēdan naden chuipac caosh.
 “Simon cuēnshumbic Petedo cuēnoaid
 bedmetan. Bēac chuibansho tantiata,”
 quequin Nuquin Papan uaid mayan
 bēdan ēbi chuiposh quequin Codnedion
 ēbitedi chuioaposh —quepanēdash
 Codnedion chomiaido Petedo chiec.

²³Adoaquien: —Pudued
 —quepanēdash Petedo.

Adashic badiadanec Codnedion
 chomiaidobēd Petedo nidsho isash
 Esuquidistu tantiaquid Ope yacnocquid
 utsin-utsinquien tsibanampanēdash.

²⁴Adec nidanec Sesadeya caid yacno
 chopanēdash. Adnubien, Nēid ushēmbien
 chochitec, quequin tantiashun Codnedion
 aton shubun icquido abi isedquid chedo
 Petedon chuibansho tantiamenuen aton
 shubu nuntan iccuededmepanēdash.

²⁵Aden iccuededmiac tabadnubi
 utsibobēd choec Petedo chedo puduedsho
 isash, Mibi bēdambocquid icnubi adesa
 nebi, quequin Petedo ismec danēshēn
 sebudec shuebudash Petedo bēisenquio
 yec Codnedio uepanēdash.

²⁶Adec uesho isash Petedo:
 —Mibipadquid nebique. Nidtotā
 —quepanēdash Codnedio caic.

²⁷Adtanec Codnediobēd onquetanec
 quēnē utsin puduedshun isadaidpembo
 dadpen Petedon istuidpanēdash. ²⁸Aden
 aido isec: —Isadaidbo nebi. Adquid yec
 isadaidpembobēd capuesa neyobi.
 Adecbidi min shubun puduedesa neyobi.
 Adesa icboedi Nuquin Papan, Matses
 utsibo ēmbi bēdamboen isaid icsambo
 iquec cainda, quequin ismequin ēbi
 tantiamiac ²⁹mimbi ēbi bedmiaido
 choacsho isash, Mibēd capuesa nebi,
 quenquio yec chobi. Adecbidi nēmbo
 choash isadaidpembon shubu nec.
 Nēmbo puduedtiapimbo iquebi,
 quenquio yec puduedobi. Nēbi Tantianu.
 Chui. ¿Atotsieshun ēbi chomio?
 —quepanēdash Petedo Codnedio chiec.

³⁰Adoaquien Codnedio: —Abentsēc
 choec ushanec ushē budec tedes yanubi
 Nuquin Papa tantiec buna mēmunc con
 shubu nuntanuēsh Nuquin Papa chiec
 onquec tsadobi. Adnubien dashcute
 shocosh bed-bedquiacbimboec
 dasiuidquid ēbi yacmi Nuquin Papan
 budmiac onquec: ³¹“Codnedio, mibi
 Nuquin Papa chiec onquesho Nuquin
 Papan tantiec. Adembi aton na
 nibēdquido mimbi menebansho aidēmbi
 bēpiscudenquio icquin tantiec. ³²Nuquin
 Papa bēdamboen tantianuen Simon
 cashumbic Petedo caid Ope
 yacnocquidbēd tabadquid ma chono
 queshun mimbi namiaido nidmeta. Aidi
 Simon cuēmēdquid utsi nidaidēn
 capuquid bitsi uashun chodcashun
 nacnenquidbēd tabadec. Aidēn shubu acte
 cuēmambi iquec,” quec Nuquin Papan
 uaid mayan bēda onqueposh. ³³Aden
 chiac: “Petedo bedtan,” quequin ēmbi
 namiaido nidmiombi. Adoac
 bēdambocquid yec cacuidanenquio yec
 badedquio mibi choc. Adec mibi choacsho
 isash bēdambo iquebi. Nuquin Papan
 nuqui isnubi ambi mibi tantiamiacpaden
 chuibansho tantiec tabadnuna
 —quepanēdash Codnedio Petedo chiec.

Codnedion shubu nuntanshun Petedon chuibanaid

³⁴Aden Codnedion chuiban cac
 Petedon naden chuipanēdash: —Matses
 utsi nec, quenquiocquin Nuquin Papan
 yuedaid matses utsi-utsiec nec, quequin
 nēbi abimbo tantiembi. ³⁵Nuquin Papan
 chiaid tantiashun matses
 utsin-utsinquien chieshēnenquiocquin
 bēdamboen nabansho isun, Aidedi
 Nuquin Papan abi yacno yuedendac,
 quequin tantiembi. ³⁶Ēndenquimboshē
 Nuquin Papan dada uamequin con
 tsusedpabo isadaidbon tishmiaido
 caidaido naden chuipampic: Esuquidistu

abentsëqui matsestedi chuiquid icnubi
utsibëd bëdamboec tabadendac.

³⁷Nidaid Cadidia yacnoshon Uan padon
chuiبانquin acten mentoquien
Esuquidistun ambi naid tauapondash.
Mibitedishun aid tantiondac. ³⁸Ma abëd
tabadnueshun Nuquin Papan aton
Mayan meniac nadatiambocquin
Esuquidistun nabampondash. Adquid
icquin Esuquidistu shubu dadpen icquid
Nasaded yacnoshon tishaid yec
capuquin bëdamboen nabanquin abi
chieshënuquidën Satanas caidën
mëyanaido Esuquidistun
bëdamebampondash. Adosho
mibitedishun isbampondac.

³⁹Isadaidbon nidaid, Udeya caid
yacnoshon shubu dadpen icquid
Edusaden yacnoshombidi Esuquidistun
nabansho ispondambi. Aidi cuستن
dectanquin isadaidbon unës uaqi
⁴⁰uincuenash, Uincuenobi, quequin
Esuquidistun ismebempoundashi. ⁴¹Aidi
uincuenshun matsestedi ismenquiocquin
aidbëdtan peshun acquidotedictsëqui
Esuquidistun ismepondashi. ⁴²Abëdi
icshobi, Ëbi chuiبانquin matses icsaid
cuidte chuibante ushë choec quequin
chui, cac nebi. ⁴³Adembidi Nuquin
Papan chuiبانacpadomboen dada
uampidon Esuquidistu tantiaquin,
Nuquin Papan chomiaid Quidistu nec,
quequin chuiquin dada uampic. Aden
chuiquin dada uampid abimbo
tantiaquid icquin abi icsaid ënsho isash
abi icsaid Nuquin Papa bëpiscudendac.
Esuquidistu chuiquin aden dada
uampic —quepanëdash Petedo
Codnedion shubun iccuededquido
tantiamequin chiec.

Isadaidpembo Nuquin Papan aton Mayan meniac

⁴⁴Aden Petedon chuibanshobi abitedi
tantiaquid icsho isun Nuquin Papan ma

abëd tabadnueshun aton Mayan
menepanëdash. ^{45,46}Aden meniac
isadaidpembo nëbi Esuquidistu
tantiaquido yanshun abi
onquiacmaidënuquo utsin onqueten
onquequin Nuquin Papa chiec
cuëdëmpañëdash. Adsho tantias
Petedobëd cho-choboedo isadaidbo aton
tsusedpabon nacpaden shui dëbid
dëtemequido: —iPadtec!
Tantiadempanbocquetid nec.

Isadaidpembotsen Nuquin Papan aton
Mayan meniac —quepanëdash
isadaidbo Petedobëd cho-choboedo.

⁴⁷Adoquien: —Nuquin Papan aton
Mayan meniaido icquin Esuquidistu
tantiaquido neque. ¿Adquid icsho acten
mentoenda ictic? ⁴⁸Aid, acten
mentometa —capanëdash Petedon.

Aden acten mentoquien: —Nuquibi
tabadnuna —cac Petedobëd
cho-choboedo acten mentoaidobëd
daëdpactsëc ushec tabadpanëdash.

Isadaidbo Petedon ambi naid chiaid

11 ¹Adnubien utsibo Sesadeya caid
yacnoësh puduanec nidequi
nidaid Udeya caid yacno choshon,
Sesadeya caid yacnocquidon
isadaidpembon Nuquin Papan chiaid
bëdamboen tantias Esuquidistu
tantiaquido yansho, quequin
chuiبانëdash. Anoshon chuibëtsenec
Edusaden yacnotsen choshon
adomboembidi chuiopanëdash. ²Aden
chuisho anocquidon Esuquidistu
tantiaquid utsibon tantias tsusedpabon
chiacpadomboen shui dëbid
dëtemequido yec Petedo nëmbo
choacsho isun, Aidi ambi nabanaid
chuimenu, quequin caimpañëdash.
Aden cainubic Petedo choacsho isash
³comapenec onquecuededec:
—Isadaidpembo shui dëbid dëtemesabo
icnuc aton shubun puduedtemiaidquido

nec, quequin tsusedpabon chiaid
niaquec aidon shubun puduedshun
mimbi pepac caoc. ¿Midapaden tantiec
puduedshun mimbi piaye? Chui.
Tantianu —quepanédash Edusaden
yacno tabadquido.

⁴Adoaquien Petedon nadopanédash:
—Aidobéd ébi tabadboed chuibanu.
Tantiata. ⁵Ope yacnoësh Nuquin Papa
chiec onquequin ushacimboen naden
ispombi. Abuc posonianec ébi yacmi
dabidiete dapabiequid
dënëshbudcuenaid budposh. ⁶Aidênquio
nidaidên capuquid tacbidên
capuquidbéd podochoquid chedo
antabédsho ispombi. Aidên antabédquid
nuqui petequidbéd nuqui petemaid
icposh. ⁷Adquid icsho isnubi:
'Nidtoson cuesuneshun pe,' caposhi.
⁸Adsho tantiashun: 'Aidtedi ëmbi
petemaid tauiquin mibi
shëdmetemaidquio nec. Adquid
pesambo nebi, Icho,' capombi.
⁹Adoaquien abucueësh padpidec
onquequin: 'Nuquin Papan bédambo
icmiaid icsambo iquec cainda,' caposhi.
¹⁰Adomboembidi abentsëc chotsëcnuc
tabëcaido abuc buanshun padpiden
budmeshun adembidi chuishun
buanshun abitedi abuc
puduedmeoaposh. ¹¹Abuc
buanoabombic dada abentsëc chotsec
Sesadeya caid yacnoësh choquido shubu
shëcuë cuëmano nidtuidash nidpac
caosh. ¹²Aidtedi icnubi Nuquin Papan
Mayan: 'Aidobédi cacuidenquio yec
nidtan,' qesho tantiash aidobédi
nidpobi. Aidobéd Ope yacnocquido
dada 6ted Esuquidistu tantiaquido
puduanec nidec Codnedion shubun
ëbédi puduedposh. ¹³Puduedacsho isash
Codnedio: 'Nuquin Papan chomiaidên
ambi uaid mayan bédan naden
chuiposhi: Simon cuëshumbic Petedo
caid Ope yacno tabadeque. Aid

bedmenuen mimbi namiaido nidmeta.

¹⁴Aidëmbi mibéd icquidtedi Nuquin
Papa yacno puduedmianquid
chuiabanendac, quequin Nuquin Papan
uaid mayan bédan chuiposhi,' quequin
Codnedion chuiapooshi.

¹⁵“Adoac Esuquidistu chiombi. Aden
chuinubi aton Mayan ëbitedi Nuquin
Papan meniacpadembi aidotsen
meneoaposh. ¹⁶Aden meniacsho isun
Nuquin Icho Esuquidistu chiondaid
ëmbembi tantiatsëcquieci tsadpobi. Nad
icpondash: Uan padon acten
mentopondashi. Nuquin Papan ambi
aton Mayan meniaid mibi iquendac,
quequin chuipondash Nuquin Icho
Esuquidistu. ¹⁷¿Aden
isadaidpembotsen Esuquidistu
tantiaquid yansho Nuquin Papan aton
Mayan aidotsen menesho, Padi.
Menenda, caindambi icti?
—quepanédash Petedo shui dëbid
dëtemequid utsibo chieci.

¹⁸Aden Petedon nainquin chuibanac
tantiadempambo yec tabadec isadaidbo
shui dëbid dëtemequido:
—Isadaidpembos abi icsaid ënsho isun
Nuquin Papan aidotsen abéd icquid
icmeoapac —quepanédash Nuquin
Papan naid chieci.

Antioquiya yacnoshomba Esus tantiaquido iccuededaid

¹⁹Esteban cuënoten seshuniash:
“Esuquidistu tantiaquido cuesunenu,”
quesho tantiash ëbitsen cuesunenush
quianec Edusaden caid yacnoësh
Esuquidistu tantiaquid utsi-utsieci
nidanepanédash. Nidequi nidaid Penisia
caid yacno choash utsi-utiec tabadnubi
utsi-utsieci acte nënantanquio nidaid
nacdédquid Chipide caid yacno choash
tabadnubi utsi-utsieci shubu dadpen
icquid Antioquiya caid yacno choash
utsi-utsieci tabadquin aton matses

isadaidboudi Esuquidistu chuibampanēdash. ²⁰Adshumbic, utsibo Chipide caid yacnoēsh Antioquiya yacno cho-choquidobēdtan nidaid Sidene yacnoēsh Antioquiya yacno cho-choquidon isadaidpembo Esuquidistu tantiamenuen chuibampanēdash. ²¹Aden chuibanu, qesho Nuquin Papan bēdamboen tantiamiac aidon chuibanaid tantiaishun isadaidpembon: Ēbi icsaid ēnu, quequin ēnash Esuquidistu tantiaquid dadpen yampanēdash.

²²Adec isadaidpembo Esuquidistu tantiaquid dadpen yanosh, qesho tantiaishun Esuquidistu tantiaquid utsibon Edusaden yacnocquidon Antioquiya yacno Bednabe nidmepanēdash. ²³Aidi Edusaden yacnoēsh puduanec nidequi Antioquiya yacno choshon anocquido Esuquidistu tantiaquido Nuquin Papan bēdambo icmiaid icsho isash: —Cuishon. Bēdambo iquec. Adembi tantiaquin chieshenquiocquin Esuquidistu tantia —quepanēdash Bednabe. ²⁴Bednabe bēdambocquid icsho Nuquin Papan aton Mayan meniac Esuquidistu bēdamboen tantiaquidquo icquin Esuquidistu chuibanac Esuquidistu tantiaquid utsi-utsiec dadpen yampanēdash.

²⁵Adashic Antioquiya yacnoēsh puduanec Saudo bednuec nidequi shubu dadpen icquid Tadso caid yacno choshon ²⁶Saudo istuidash Antioquiya yacno aidbēdi Bednabe choapanēdash. Ambo choash seta abentsēc matamec anocquid Esuquidistu tantiaquidobēd iccuededquin Esuquidistu chuibanquin aid daēdshun tantiamepanēdash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuēmpanēdash.

²⁷Bednabebēd Saudo Antioquiya yacno tabadnubien Edusaden yacnoēsh Antioquiya yacno Nuquin Papan yuecquio icshun nanun chiaid chuiquido cho-chopanēdash.

²⁸Cho-choshon abentsēqui Accabo cuēmēdquid Nuquin Papan Mayanēn oncamiac: —Yuec-yuecpactsēc yash nidaidtedi yacnocquidon pete nibēdendac —quepanēdash. Aden chiambic shubu dadpenquioshē icquid Doma yacnocquido ancaquid Quēdaudio cuēmēdquid icnubi pete nibēdquiec yampanēdash. ²⁹Adnubic, Udeya yacnocquidon pete nibēdec, qesho tantiaishun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanēdash.

³⁰Esuquidistu tantiaquido Edusaden yacnocquido chuiquido nēid piucquid menetanta ma pete bunquido menenueshun, quequin ambi dayun uaidtedi Bednabebēdta Saudo menequin Edusaden yacno buamepanēdash Antioquiya yacno tabadquin Esus tantiaquidon.

Acobo cuesuniaidbēdta Petedo quēnēn nauedaid Nuquin Papan puduemiaid

12 ¹Adnubien Edusaden caid yacno tabadquid domanobo ancaquid Edodes cuēmēdquidēmbi Esuquidistu tantiec iccuededquido utsi-utsien comapenen mēyanuequin bedmeshun quēnēn nauedmepanēdash. ²Aido quēnēn nauedmeshun Esuquidistun ēbi chuibeneta caid abēd capucuneboed Acobo cuēmēdquid chēshten cuesunemepanēdash. Acobon utsimbo Esuquidistun ēbi chuibeneta caid abēd capucuneboed utsi Uan nepanēdash. ³Adoac, Acobo cuesuniosh, qesho tantiaish isadaidbo utsibo, Esuquidistu tantiesabo: —Bēdamboen Edodesēn

naosh —quepanēdash aidō. Adec onquesho tantiash Edodes: Isadaidbon pan bidisquesa tantiaid ushē choec, quequin Esuquidistun ēbi chuibeneta caid utsi, Petedo cuēmēdquid, bedmeshun quēnēn nauedmepanēdash. ⁴Aden quēnēn nauedmeshun Petedo cuenushe queshun sondado 4ted quēnē nuntan tabadmeshun pan nami uambocquid petequid tantiaid ushētedi naimēdambi ambi naid icsa Petedo chuimenuequin Edodesēn caimpanēdash. Adnubien quēnē nuntanshun Petedobēdta mētaniaid sondado daēd uenubi utsi daēdshun shēcuē ēctabēdquin Petedo isec tabadpanēdash. Aid isquidotedi badiadnuc puduedshun isanec ushē abuctotsan nidnubi utsibotsen 4tedbidi choshon isanec ushē cuembocnoc nidoanubi utsibotsen 4tedbidi choshon isanec ushē budtsan nidnubi utsibotsen 4tedbidi choshon isanec inchēshtsēcunubi badiadnuc isboedo choapanēdash. Adecbidi isboed tsiboido inchēshtëmbi padpiden isec choapanēdash. ⁵Adnubien Esuquidistu tantiaquido iccuededash Nuquin Papa Petedo quēnēn nauedaid chiec yuec onquepanēdash.

⁶Adshumbic, Badiadshun Petedo bēmēmbi, quequin Edodesēn tantianubi aid inchēshtëmbi Petedo bucun mētaniacchobi ushnubi ⁷Nuquin Icbon chomiaid, ambi uaid mayan bēda, nibēdquicboedi Petedon dayun choan quēnē nuntan comapenec chēnquepanēdash. Aidēn Petedon dayun choshon shictodo macuesquin: —Baded nidto —cac nidtonobi seccuduquec shocosh bucu mētaniaid mēchiquidpanēdash. ⁸Adtanquimbien Nuquin Papan uaid mayan bēdan: —Chinēshēdtanec tapucudta —cac Petedo chinēshēdtanec tapucudpanēdash.

Adsho isash: —Min dashcute bēntsecquid dasiuidshun ēbi tsiban —quianec nidsho ⁹Nuquin Papan uaid mayan bēda nidsho isacimbocquin abimbo tantienquicquin Petedon tsibanampanēdash. ¹⁰Adec nidquimbi sondado abēdta mētaniaidēn tantienquio icnubi datanshun shēcuē isquid daēdshumbidi tantienquio icnubi aidotsen datanoashumbic umanuc puduenenubi shocosh shēcuē abēmbi shēcniaidpanēdash. Adsho isash puduenash podqued abentsēcquidēn nidquimbic Nuquin Papan uaid mayan bēda abēd icboedi badedquio nidquin Petedo niampānēdash. ¹¹Abēd icboed nibēdnubien Petedo padpiden tantiaquiec: —Edodesbēd isadaidbo, Esuquidistu tantiesabo, ēbi cuesunete bunsho isun Nuquin Papan ēbi puduemenuen ambi uaid mayan bēda chomiosh. Abimbo iccosh —quianec Petedo nidpanēdash. ¹²Adec nidequi Nuquin Papan abi puduemeboed tantiequi Uan cashumbic Madcos caidēn titan shubu yacno Petedo chopanēdash. Aidēn tita Madia cuēmēdquid icpanēdash. Ambobi Esuquidistu tantiaquid dadpen iccuededec Nuquin Papa chiec onquepanēdash. ¹³Adnubien choshon Petedon shēcuē tosh-toshcasha tantiash chido yua Doda cuēmēdquid isnuec nidtopanēdash. ¹⁴Aid shubu shēcuē yacno choshon Petedon cuēnsho tantiash bēdamboshē iquequi shēcnenquio yec aucbidi titinquec: —Petedo shēcuē yacno choash nidec —quequin iccuededquido chuituidpanēdash.

¹⁵Adsho Nuquin Papa chiec iccuededquidon abimbo tantienquicquin: —Muequi mibi nec. Aidida ispash neba —quepanēdash iccuededquido.

Adoaquien: —Ma aidquiobi neboc. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Papan uaid mayan bēda ischitashien nec —quepanēdash tantiesa.

¹⁶Adnubi padpiden Petedon tosh-toshcasha shēcnequin isash: —iTso! Abimbo caic —quecuededpanēdash.

¹⁷Adnubien mēdante uic-uiccaic Petedo: —Onquenquio yec tabadquin tantiata. Ēbi nashunquin Nuquin Icbon naboed chuibanu —quepanēdash Petedo abi quēnēn nauedacnoshon Nuquin Papan puduemiaid chuibanec. Aden chiash: —Ēbi puduemiaid Esuquidistun utsi, Acobobēdta Esus tantiaquid utsibo chuitanta —quianec puduenanec utsi yacno Petedo nidpanēdash.

¹⁸Adashic, badiadnubi quēnē nuntan Petedobēd icboed sondadotedi: —¿Mitsimbo nuquibēdta mētaneboed icpec? Nibēdeque. Is —quec dacuēdpanēdash.

Adashic, Petedo nibēdec, quequin sondadon chiac ¹⁹Edodesēn: —Nibēntan —cac nidshun sondadon istuidenquiocsho isun quēnē nuntanshun Petedo isquido ambi quēnēn tabadquin nabamboed chuimeshumbi aidotedi Edodesēn cuesunemepanēdash.

Edodes unēsaid

Adashic, Edodes nidaid Udeya caid yacno abi tabadacnoēsh puduanec shubu dadpen icquid Sesadeya caid yacno choash tabadpanēdash.

²⁰Sesadeya caid yacno anoentsēcbidi shubu dadpen icquid Tido caid icnubi aid yacnoēsh anoentsēqui shubu dadpen icquid utsi Sidon caid icpanēdash. Tido caid yacnocquidbēd Sidon caid yacnocquido Edodesbēd chushcananquido icboedi padenquio yanec tabadpanēdash. Adec

chushcananenquio yec tabadquin, Sesadeya yacno Edodes choash tabadosh, quesho tantiash Edodesēn yua Bēdasto cuēmēdquidbēd onquenuec cho-chopanēdash. Cho-choshon, Ēmbi pete nibēdsho isun Edodesēn menioshi. Nēbi aid chushcainquio iquembi, quiosh, quequin cho-choquidon chuituidpanēdash. Aden chiac adomboembidi Bēdaston Edodes chuioapanēdash. ²¹Aden adomboembidi Bēdaston chuioasho tantiashun Edodesēn: —Ēmbi chiacpadēn cho-choata, quiosh Edodes, quequin chuita —cac cho-choquido Bēdaston chuioapanēdash. Aden chiac Edodes onquesho tantianuec ambi chiacdedec ushash dashcute nac-nacquiocquid dasiuidash abembi onquenuec tsadten abuc tsadtoash onquec taēpanēdash.

²²Aid onquesho tantiash:

—Nidaidēnshun tishaid onquaiidpenquio nec. Abuc tabadquid nuquin papa caidien Edodes nechitec —quec iccuededquido comapenec cuēdcuededpanēdash. ²³Aden chuisho tantiash, Mimbi Nuquin Papa caidpenquio nebique. Aidi abia yampid abentsēcquiobi iqueque. Auididi tantiata, quequin chuitiadquidēmbi chienquio icsho tantiashun Nuquin Papan chomiaidēn ambi uaid mayan bēdan daicsa uac chichan dadpen yanec Edodes badedi unēspanēdash.

²⁴Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanēdash.

²⁵Adnubic Antioquiya yacnocquidon Esuquidistu tantiaquidon aton piucquid ambi menenuen dayun uaid Bednabebēdta Saudo meniac buanec Edusaden yacno choshon anocquido Esuquidistu tantiaquido menetanashe auēshquio puduanec Antioquiya yacno

nidoapanēdash. Aidobēdi Uan
cashumbic Madcos caid nidpanēdash.

Saudobēdtabi Bednabe nidmiaid

13 ¹Adashic, Esuquidistu
tantiaquid utsi-utsiec Nuquin
Papan yuecquio icshun nanun chiaid
chuiquido Antioquiya caid yacno
tabadnubi Esuquidistu tantiamenuen
chuiبانquido tabadoapanēdash. Nēidic,
Bednabe; utsibic, Simon, Dada Chēshē
caid; utsibic, Sidene yacnoēsh choquid,
Dusio cuēmēdquid; utsibic, Cadidia
yacnoēsh choquid, tsusio dapa,
Edodesēn shubun icquid icboedi,
Manain cuēmēdquid; utsibic, Saudo
cuēmēdquid. ²Aidtedishun
Esuquidistuidi tantianuen buna
mēmunscho Nuquin Papan Mayanēn:
—Saudobēdtan Bednaben aid daēdshun
ēmbi chuibocpaden ma napanuna
—capanēdash. ³Adoquien, buna
mēmunsquin nainash Nuquin Papa chiec
onqeshun abēd icquid utsibon
mēdanten Saudo Bednabebēdta
mamishquin nadopanēdash: —Nidaid
utsi-utsiec yacno nidshun Nuquin Papan
chiacpaden Esuquidistu chuibenetan
—capanēdash abēd icquidon.

Chipide yacnoshon Esuquidistu chuibananaid

^{4,5}Esus tantiaquidon mamishquin
chiaquien Nuquin Papan Mayanēn
nidmiac Saudobēd Bednabe Antioquiya
yacnoēsh puduanec nidpanēdash. Aid
daēd nidsho isash Uan cashumbic Madcos
cain cuēnaid nidpanēdash dada uate
buanshunec. Aidtedi nidanec acte
cuēman shubu dadpen icquid Sedusia
caid yacno choash cano antabēdtoanec
acte nēnantanquio nidaid nacdēdquid
Chipide caid yacno nidtampanēdash.
Chipide yacno choash nidequi shubu
dadpen icquid Sadamina caid yacno

choapanēdash. Adec choash tabadec aton
matses isadaidbo iccuededacno choash
puduedshun Nuquin Papan chiaid dada
uamiampid Saudon Bednabebēdtan
chuibampanēdash. ⁶Adoshombic,
Sadamina yacnoēsh nidquin chuibidanec
Chipide cuēma utsiuc shubu dadpen
icquid Pabos caid yacnotsen choash
tabadoapanēdash. Ambo tabadquin
isadaidbo Badesus istuidpanēdash
Pabadobēd icquidon. Satanasēn
tantiamiaid icquin abimbo chiacbimboec,
Nuquin Papan yuecquio icshun nanun
chiaid chuiquidquid nebi, quequin
muaquin chuiapanēdash Badesusēn. ⁷Aidi
Pabos yacnocquido tsusion shubun
tabadpanēdash. Anocquido tsusio
cobednadod caid Sedquio Paudō
cuēmēdquid icpanēdash. Aidi
tantiaquiono, quec tabadquin, Isedquido
chosh, qesho tantiasch, Aidon chuibanaid
tantianu, qeshun Saudobēdta Bednabe
chomeshun tsusion yuedpanēdash.
⁸Yuedac Pabadon Esuquidistu
chuibampanēdash. Saudo quequin
isadaidbon cuēnubi Pabado quequin
isadaidpembon cuēmpañēdash. Aden
Pabadon Esuquidistu chuibansho tantiec
tsusio tsadsho isun Badesusēn
tantiamenquiocnuen utsi uain
chuiopanēdash. Ambi ompoaid
ismianesa Badesus icsho Edimus
cuēmpañēdash. ⁹Aden utsi uain chuisho
tantiaschun Nuquin Papan Mayanēn
tantiamiac Edimus bēisequi Pabado:
¹⁰—Satanasēn bacuē yec bēdamboen
naidbēdta bēdamboen chiaid tantiesa
mibi nec. Nuquin Papan namiaid nebi,
quequin ompoaid ismenquiocquimbi
Nuquin Papan chiaid utsi uaquin
muaquin mimbi adenuidi chuibaneque.
Tantia. ¹¹Nēbi con Icbon mibi mēyanquin
bēshu uaindac. Ushē chēnquesho mimbi
yuen isenquio iquendac —quepanēdash
Pabado Edimus chiec.

Aden chuibon Edimusën ëshë
cuen-cuempambo yec
inchëshbudacbmboec yanash:
—čTsuntsimbini mëdinshun buampeba?
—quequin nibëdacno mishquin
uëmbampanëdash. ¹²Aden Edimus
bëshu uacsho isec: —Nuquin Icbon
chiaid abimbo iquec —quiash tsusio
Sedquio Paudo cuëmëdquid Esuquidistu
tantiaquid yampanëdash.

**Nidaid utsi, Pisidia caidën shubu dadpen
icquid Antioquiya caid utsi yacno
Bednabe Pabadobëdi choash tabadoaid**

¹³Adashic, Chipide yacnoësh
puduanec nidaid Pampidia caid yacno
Pabadobëd icquido canon
potepanëdash. Aden potiash nidaid
Pampidia caid yacno choash Pabadobëd
Bednabe pudundonobi Uan cashumbic
Madcos caidbidi Edusaden yacno
nidoaic cuëshëdpanëdash. Adec
Pabadobëd Bednabe pudundoanec
nidquin shubu dadpen icquid Pedque
caid ¹⁴isbidanec nidaid Pisidia caid
yacno shubu dadpen icquid Antioquiya
yacno chopanëdash. ¹⁵Ambobi
tabadequi chonoadtemaid ushën Nuquin
Papan chiaid chuibante shubun
puduedash tabadpanëdash. Ambo
tabadnubien Nuquin Papan Moises dada
uamiampid isec onquequin
chuibanshumbic Nuquin Papan
yuecquio icshun nanun chianiaid dada
uamepampidtsen isec onquequin
nainambic tsusion: —Isedquido iqueque.
Aid daëdi tabadacno nidshun, čĖbitedi
bëdambo icmenuen chuibanquin
tantiametiadquio ada mibi icpe? cata
—tsusion cac ambi namiaid nidshun
tsusion chiacpaden Pabadobëdta
Bednabe chuituidpanëdash.

¹⁶Adoaquien abi tsadacnoëshi
nidtoashi Pabado: —Nuquin Papan naid
mibi chiembique. Tantiakiota.

¹⁷Nidaid Equipito caid yacno nuquin
tsusedpabo tabadshobi Nuquin Papan
bëdamboen isec cudasquin ambi
tishmiaid dadpen caidmepampic.
Adoshombic, Nuquin Papan ambi
nadatiambocquin naidënquio
bëyucanquin tsusedpabon tishmiaidën
tishmiaid caidaiddo Equipito yacnoshon
buanubi ¹⁸tsusedpabon Nuquin Papan
chiaid chieshëmpampic. Adoaquien
matses nibëdacno seta dadpen 40ted
matamec tabadquin, Nuquin Papan
tsusedpabon ëbi chieshënaid cuidnu,
quenquiocquin buampampic. ¹⁹Aden
buanquin nidaid Canan caid yacno
buanshun anocquido isadaidpembo
istuidmeshun matses utsibo
utsi-utsiectsëcquiec 7tedi icquido
naimbudmeshun aidon nidaiddedi
nuquin tsusedpabo menebampampic.
²⁰Aden menebudquin dadpenquioshë
seta 450ted matamequin ambobi
tabadmepampic.

“Adashic, isadaidbo chuiquid utsi-utsien
icmeshumbic Nuquin Papan ambi
yuecquio icshun nanun chianiaid chuiquid
Samued cuëmëdquid tsusedpabo chuiquid
icmepampic. ²¹Aidi isadaidbo chuiquid
icnubic, Matses utsibo ancaquidpadquid
bunebi, quequin tantiaishun seta dadpen
40ted matamec tabadquin Nuquin Papan
Sis padon mado, Benaminën tsyuecquid
Saudo cuëmëdquid, isadaidbo ancaquid
icmepampic. ²²Adashic, yuecash Saudo,
con shënisio, Nuquin Papan chiaid tantesa
uasho isun utsitsen Dabid cuëmëdquid
tsusedpabo ancaquid icmeoapampic. Aidi
Nuquin Papan chiacpadomben
nabanquidquio icsho isash Nuquin Papa:
‘Dabid, Isain mado, ëbi bëdamboshë
icmequid, ëbi bunacpaden nabanquidquio
mibi nec,’ quepampic Nuquin Papa
—quepanëdash Pabado aton matses
Antioquiya yacnocquido tantiamenuen
chiec.

²³Aden chiec abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanëdash. ²⁴Aidën nadatiambocquin nabanquin ambi nabanaid tauabicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanëdash. ²⁵Adec onquetanequic matses acten mentobudquin nainec: ‘¿Mitsipaden ëbi isquin cuëmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ëbi icsambocquid icsho atotsieshun mibi choec? quequin chuiquidquio Nuquin Papan icmïoshi, caindami,’ quepanëdash Uan acten mentoanquid —quepanëdash Pabado.

²⁶Aden Uan padon chiacpaden chuibanashic: —Abadauanën tishmiaidën tishmiaid caidaido nuqui icsho nuquitedi icsaid bedshunash abided cuidadec Esuquidistu unëspanëdash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanëdash. ²⁷Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobëd aton tsusio dapabo, Icsambocquid neque. Unës ua, quequin chuipanëdash. Aden chuiquin utsibëd iccuededte ushën-ushënquien abi isec onquiaid Nuquin Papan dada uamiampicpadembi aidon napanëdash. ²⁸Esuquidistu icsaid nibëdquidquio caiqui, Icsambocquid neque. Aid unës uatiadquidi mibi nec, quepanëdash Isadaidbo Pidato caic. ²⁹Adoaquien Nuquin Papan dada uamiampicpaden nabanambien Esuquidistu cuesten dectanquin unës uacsho chicshun, Ëbi unësacsho nëidën ëbi nauedec, quequin

ambi shëcuë uain nacnenaid chucanquio Osen Esus nauedpanëdash. ³⁰Adoacsho Nuquin Papan Esuquidistu uincuemiatic ³¹capusho Cadidia yacnoësh Edusaden yacno abëd capucuneboedon aidi isbempanëdash. Aden isun aidombi Esuquidistu chuibededec. Adembidi aid isboedobëdtambi abimbo chuibanquidquio nebi —quepanëdash Pabado.

³²Aden chiashic: —Abi chiembique. Tantia. Nuquin Papan chometequid ambi chuipampid tsusedpabon isenquiocnobi ³³Nuquin Papan uincuemiaticsho nuqui isondaid aidi nec. Aidi chuiquin Nuquin Papan dada uamiampid nad iqueque. Tantia. Chuinu.

‘Con madombo mibi nec.

Nëbi ëmbi uincuemiaqui ëmbi chiactedi mimbi naimbudoc.

Adosho isun ëbipadquiocnoc chuquid dada mibi icmembí.’

Aden ëndenquimboshë aton mado tantiaquin Nuquin Papan chiampic.

³⁴Adecbidi ambi uincuemetequid Esuquidistun nami chodquesa icpanëdash. Aid chuiquin dada uamiampid nad iqueque. Tantiata. Chuinu.

‘Dabid chiampicpadembi mibi icsaisa icsho ëmbi bëdamboen isaid mibi nec, mado,’

quequin Nuquin Papan dada uamepampic. ³⁵Ambi dada uamiampid utsi nad iquec:

‘Icsaisa icsho aton nami chodquesa icmenuna,’

quequin Nuquin Papan chiampic.

³⁶“¿Aden dada uamequin Dabid pado chiecta onquepampic? Padenquio. Aidi Nuquin Papa bunacpadomboen naimbudquin nabanash Dabid unësacsho isun aton mëdimbon nami chodquiacno Dabid chococac aidën

namitsen chodquepampic. ³⁷Nuquin Papan uincuemetequidën namien chodquesa icpanëdash. ³⁸Aidi icsainquicoquid yec ëbitedi icsaid bedshunash abided cuidadpanëdash. ³⁹Adoac abi tantiaquidquiotsen icsaisabidi Nuquin Papan isec. Nuquin Papan naden nata quequin dada uamiampidtedi matsesën natiapimbo iquec. Aden ambi chiacpaden natiapimbo yec, Nuquin Papan bëdamboen isaid nebi, quetiapimbo icboedëmbi, Matses icsaquid icsho cuidnushe quiash abided cuidadec Esus unëspanëdash, quequin tantiasho, Esuspadquid icsaisa Nuquin Papan nuqui isec. ⁴⁰Nuquin Papan chomiaid choec, quequin tsusedpabon tantienquico icampidpadquid iquenda. Aido chuiquin Nuquin Papan dada uamiampid nad iqueque. Tantia.

⁴¹ ‘Ëmbi ëndenquimboshë dada uamiampicpadembi adquid chomembi.

Ëmbi chomiaid isquidon chiac mimbi tantienquico icpec.
Adquid yec, Tantiadempambo iquec, quec mamënsnumëquid ëbëdi tabadtiapimbo iquendac.
Adquid icmane qeshun tantiaquiota’

—quepanëdash Pabado iccuededquido chiec.

⁴²Aden chuibudashic Pabado Nuquin Papan chiaid chuibante shubu yacnoësh abëd choboedobëd puduananec nidsho isash: —¿Iccuededte badiad utsi chonoc iccuededquin chuinueta mibi choape? —quepanëdash iccuededquid utsibo Pabado chiec. ⁴³Aden chianec Pabadobëd Bednabe nidsho isun isadaidbo utsin-utsinquiembëdtan isadaidpembo isadaidbopadquid icnuequid utsin-utsinquien tsibanampanëdash. Aden abi

tsibanansho isash: —Nuquin Papan bëdamboen isaid yec bëdamboec tabadta —quepanëdash Pabado Bednabebëd.

⁴⁴Adashic, chonoadtemaid ushë icnuc Nuquin Papan chiaid tantianuec Antioquiya yacnocquid dadpen iccuededoapanëdash. ⁴⁵Dadpen iccuededsho isash isadaidbo tsusiobo: Ëmbi chuibanansho tantianuec aidtedi choenquico iccosh, quequin tantiec nëishpanëdash. Adec nëishash: —Mimbi Nuquin Papan chiaid icsamboen chuibanec —quepanëdash Pabado caic.

⁴⁶Adoquien, dacuëdenquico yec Pabadobëd Bednabe: —Mibitedi con matses icsho, Nuquin Papan dada uamiampid chuibanu, queboedëmbi tantiesa icsho isun mibi chuibanenquico iquembi. Mibi tantiesa yec Nuquin Papabëd tabadte bunesabidi icnuc isadaidpembo Esuquidistu chuibanendambi. ⁴⁷Nuquin Icbon naden tantiamioshibique. Tantia. Chuinu.

“Isadaidpembo ëmbi chiaid chuibanquid mibi icmembi ma nidaidtedi yacno ëbi tantiaquido ëbi yacno puduedquid ma icpanuna,”

quequin chioshi —quepanëdash Pabado abi chieshënnquido isadaidbo Nuquin Papan dada uamiampicpaden chiec.

⁴⁸Adsho tantiashe isadaidpembo: —iPadtet! Nuquin Papan chiaid bëdamboshë iquec

—quecuededpanëdash. Adoquien, Nuquin Papan ëbëdi mibi tabadmendambi, quequin chiaid ambi tantiamiactedi Esuquidistu tantiaquid yampanëdash.

⁴⁹Adec Esuquidistu tantiaquid yanash auëshquico dadpen nidequi nidaid dëuequid utsi-utsiec yacno choash tabadquin aidontsen Esuquidistu chuibanoapanëdash. ⁵⁰Adosho tantiashe,

Pabado icsambocquid nec, quequin isadaidbo tsusiobon Antioquiya yacnocquidon chidobobëdta anocquido chuiquid dapa nëishmeshun Pabadobëdta Bednabe mëyantanguin ashunquio nidmepanëdash. ⁵¹Aden nidta cac puduanec nidtuidash, Esuquidistu ëmbi chuisho tantiesabo aido nec, quequin nidaid putu tasequequin ismiasn nidanec shubu dadpen icquid Iconio caid yacno chopanëdash. ⁵²Pabadobëd Bednabe Antioquiya yacnoësh nidan Antioquiya yacnocquid Esuquidistu tantiaquido: —Bëdambo iquebi —quecuededpanëdash. Adembidi aidtedi aton Mayan Nuquin Papan menepanëdash.

Iconio yacno

14 ¹Adashic, Pabadobëd icquido Iconio yacno choash tabadpanëdash. Ambo tabadec Nuquin Papan chiaid chuibante shubu yacno nidash puduedpanëdash. Ambo puduedshun Esuquidistu chuibanac isadaidbobëd isadaidpembo dadpen Esuquidistu tantiaquid yampanëdash. ²Aido Esuquidistu tantiaquid yanubi isadaidbo utsibo Pabadon chuibanaid tantiatiapimbo icquin Esuquidistu tantiaquido muaquin chuiquin isadaidpembo utsibo nëishmepanëdash. ³Aido nëishmiambi Iconio yacno yuec tabadquin Pabadon Bednabebëdta dacuëdenquiocquin Esuquidistu chuibampanëdash. Aden chuibansho isun Nuquin Papan ambi nadatiambocquin tantiadempamboctequid ismequid Pabadobëdta Bednabe icmepanëdash. ⁴Aden icmiac aid daëdshun nadatiambocquin nasho isash, Isadaidbo tsusiobon chuibocpadec Pabadobëd Bednabe icsambocquid nec, utsi-utsiec

quenubien, Ambi chiaid abimbo iquec, utsibo quepanëdash. ⁵Aden chuishumbic, Pabadobëdta Bednabe cuestanguin cuënoten se-senuequin Esus tantiesabo isadaidpembon aton tsusio dapabobëdta cainubi adembidi isadaidbon aton tsusio dapabobëdta cainoapanëdash. ^{6,7}Aden caimbededosh, quequin tantiaquidën chiac cuenec nidequi nidaid Dicaonia caid yacno Pabadobëd Bednabe choash shubu dadpen icquid Disteda caid yacno choash tabadquin Pabadobëdta Bednaben Esuquidistu chuibampanëdash. Adtanec auëshquio puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibampanëdash. Adtanec auëshquio puduanec nidshun dëuequiec shubu dadpen icquid utsi-utsiec yacnocquidotsen chuibampanëdash.

Disteda yacno

⁸Disteda yacno tabadnubien anocquid taicsaidi anin tishaid caputiapimbo icpanëdash. ⁹Aidi Pabadon Esuquidistu chuibansho tantiec, Esuquidistun ëbi bédamepatsiash, quec otacquo tsadpanëdash. Aden caputiapimbocquidën tantiapadomboen Nuquin Papan Pabadotsen tantiamiac ¹⁰caputiapimbocquid comapenen bëisquin: —Nidto —Pabadon cac badedi nidtoash taicsaid bédanash capupanëdash.

¹¹Aden taicsaid bédamiac capusho isash anocquido aton onqueten cuëdcuededquin: —Disteda yacnocquidon tantiaid matsesbimboec yanash abucuësh budoshe. Nëid daëdi isec cho —capanëdash. ¹²Adtanequi Bednabe otacquo tsadquid icsho isash ambi tantiaid abentsëc Upited icnuc

Upited cain Bednabe cuënquimbi
 Pabado chuiquidquio icsho isun ambi
 tantiaid utsi Medcudio icnuc Medcudio
 cain Pabado cuëmpañédash Disteda
 yacnocquidon. ¹³Aden cuënsho
 tantiashun baca bënë daëd bëec: Mibi
 daëdi tantiaquido Disteda yacnocquido
 nec, quequin, Ismenu, quequin ambibi
 tantiacbimboecnuc nacnenaid Upited
 caid dayun uaquido baca cuesunenu,
 quepañédash.

¹⁴Aden baca cuesunenuen bësho isun
 abi dasiuidaid aton dashcute
 bëntsecquid shoyonquin cancheuidashic
 iccuededquidon nënantanquio nidash
 Pabadobëd Bednabe comapenec
 nadpañédash: ¹⁵—Èbi daëdi
 mibipadquid matsesquio nebi. Mimb
 tantiacmaid nebique. Baca cuesunenda.
 Chiaid bëda mibitedi naden chuinuec
 chobi. Nuquin Papa caid abentsëcquiobi
 iquec. Aidëmbi abubëdta nidaid
 uashumbic aidënguioquidtedi
 uabanampidquio neque. Aiduidtsëqui
 tantiaquin ambi uaidbimboecnuc
 matsesën nacnenaid tanties icta.

¹⁶Èdenquimbo Nuquin Papan,
 Adoenda, cainquiocnoc matsesën ambi
 tantiacpaden nabampampic. ¹⁷Aden,
 Adoenda, cainquiocquimbi, Abitedishun
 icbo icquin bëdambocquid nebi,
 quequin ismequin ue secamedenequinc,
 cuëte bacuëmequinc, nuqui penun
 tiedën nitsimbeniaid canimequinc
 caquin Nuquin Papan nac bëdamboen
 nuquitedi pebededec. Aden nabanquin
 Nuquin Papan, Bëdambo iquebi.
 Cuishon, camiaido nuquitedi nec
 —quepañédash Pabadobëd Bednabe
 Disteda yacnocquido chiec. ¹⁸Aden
 chuido-chuidoquai baca cuesunenquio
 icpañédash Disteda yacnocquidon.

¹⁹Adnubien Antioquiya caid
 yacnocquidobëd Iconio yacnocquido
 Disteda yacno cho-choshon, Pabado

icsambocquid nec, quequin chiac
 Disteda caid yacnocquido
 nëishcuededpañédash. Adec
 nëishcuededshun Pabado cuënoten
 se-siash, Unësosh, qeshun nimbanquin
 buanshun shubu nibëdacno Pabado
 netampañédash. ²⁰Ambo netanambic,
 Esuquidistu tantiaquido cho-choshon
 tsicatenubi Pabado nidtoash Esuquidistu
 tantiaquidobëd Disteda yacno choec
 shubun puduedpañédash. Badiadash
 puduanec shubu dadpen icquid Dedbe
 caid yacno Pabadobëd Bednabe
 nidoapanédash.

Nidaid Sidia caid shubu dadpen icquid Antioquiya yacno choaid

²¹Adec Dedbe yacno choash
 tabadquimbi Pabadobëdtan Bednaben
 chuibanac Esuquidistu tantiaquid
 dadpen yampañédash. Auëshquio
 puduanec nidoaic padpidec Disteda caid
 yacno choash tabadquin, Dadpen
 tantiamequiono, quequin
 chuibampañédash. ²²⁻²⁴Aden
 chuibanshumbic: —Natiamianquid
 iquendac. Adquid icnuc Nuquin Papa
 yacno puduedash Esuquidistu
 tantiaquid yec ambo nuquitedi
 tabadendac, quec nëbi dayacquio yec
 tabad —capañédash Pabadon.
 Adotanquin ambia Esus tantiaquid
 utsi-utsien Pabadobëdtan Bednaben:
 —Bëdamboec tabadquin ismequin
 Esuquidistu tantiaquid utsibo chuiban
 —capañédash. Adotanec, ambi
 chuiboedobëd Pabado Bednabe chedo
 Nuquin Papauidi tantiec buna
 mëmunquin chiec onquepañédash. Aden
 Nuquin Papa chuiquin naimbudquin,
 Nëmboquid mibi tantiaquido
 bëdamboen dayun uata, Papa, quequin
 chianec Pabadobëd Bednabe chedo
 Disteda yacnoësh nidoapanédash.
 Adecbidi Iconio yacno choashun

adomboembidi chuibanoapanēdash.
 Adecbidi Antioquiya yacno choashun
 adomboembidi chuibanoapanēdash.
 Antioquiya yacnoēsh puduanec nidec
 nidaid Pisidia caid datambētsenec
 nidaid Pampidia caid yacno choash
 nidec ²⁵shubu dadpen icquid Pedque
 caid yacno choash tabadquin
 Esuquidistu chuibanash shubu dadpen
 icquid Atadia caid yacnotsen
 chopanēdash. ²⁶Auēshquio cano
 antabēdtoanec nidec shubu dadpen
 icquid Antioquiya caid yacno, Nuquin
 Papan Mayanēn nidta, quequin
 chiondacnombo choapanēdash. ²⁷Ambo
 choash tabadquin anocquido
 Esuquidistu tantiaquid utsibobēd
 iccuededshun Nuquin Papan
 tantiamiacpaden abi
 capucueniacnoshon ambi nabanaidtedi
 Pabadobēdtan Bednaben
 chuibampanēdash. Isadaidpembo
 dadpen Esuquidistu tantiaquid
 yamposh, quequin chuipanēdash.
²⁸Adtanequi yuec Antioquiya yacno
 Esuquidistu tantiaquid utsibobēdi
 Pabado Bednabe chedo tabadpanēdash.

**Edusaden yacnocquido iccuededec
 tantianu quiaid**

15 ¹Pabadobēd Bednabe
 Antioquiya yacno
 choabicnubien nidaid Udeya caid
 yacnoēsh choquido Esuquidistu
 tantiaquid utsibo Antioquiya yacno
 choash tabadquin, Nuquin Papan naden
 nata quequin chiaid Moises dada
 uamiampicpaden shui dēbid dētemesa
 abi yacno Esuquidistun yuedtemaid
 nendac, quequin chuipanēdash.
²Adnubic Pabadobēd Bednabe
 Antioquiya yacno choash tabadquin
 aidon chiaid tantiash: —Nuquin Papan
 aden chiamo iqueque. Aden chienda
 —quepanēdash.

Adsho comapenec cuēdquin
 chushcapanēdash. Adsho tantiashun abi
 chuiquidon, Edusaden yacno nidshun
 chushcanamboed chuitanta, quequin
 Pabadobēdta Bednabe chuishumbic
 Esuquidistu tantiaquid utsibo
 chuioaquin aido nidmepanēdash.
³Adoac Antioquiya yacnoēsh puduanec
 nidec nidaid Penisia caid yacno choash
 tabadquin, Isadaidpembotsen
 Esuquidistu tantiaquid yamposh,
 quequin chuipanēdash. Adsho tantiash:
 —Aid tantiec bēdambo iquebi
 —quepanēdash anocquid Esuquidistu
 tantiaquido. Adtanec auēshquio nidequi
 nidaid Samadia caid yacno choash
 tabadquin adomboembidi chiac
 adquiecbidi, Bēdambo iquebi,
 quepanēdash anocquido. ⁴Auēshquio
 puduanec nidec Edusaden yacno choash
 tabadquin anoshontsen Nuquin Papan
 chiacpadec capuquin ambi nabanaidtedi
 Pabadobēdtan Bednaben
 chuibanoapanēdash. ⁵Aden chiac
 Esuquidistu tantiaquido, Nuquin Papan
 naden nata quequin chiaid
 tantamequido: —Nuquin Papan naden
 nata quequin chiacpaden
 isadaidpembotsen shui dēbid
 dētemetiadquidi nec. Nuquin Papan
 naden nata quequin Moises dada
 uamiampid nabantiadquid neoaic
 —quepanēdash.
⁶Adoquien Esuquidistu ambia
 tantiaquido tsusiobobēd Esuquidistun
 ēbi chuibeneta caido: Tantiabono,
 quiaish onquecuededpanēdash. ⁷Adec
 yuec onquecuededash nidtoash Petedo
 nadec onquepanēdash: —Chuinu.
 Tantiata. Ēnden Nuquin Papan naden
 chuipondashi: “Isadaidpembo
 Esuquidistu tantiaquid icmete
 bunebique. Aidotsen chuibanta,”
 quequin chuipondashi. Aden ěmbi
 chuioasho mibitedishun tantiondac.

⁸Ëmbi isadaidpembo Esuquidistu chiac
abi tantiaquid aido yampondash.
Matsesën tantiaid tantiaquid icquin
Nuquin Papan, Esuquidistu tantiaquid
nec, quequin aton Mayan nuqui
meniacpadembi isadaidpembo
meneoapondash. ⁹Utsibo nec,
quenquiocquin aidotsen tantiamequin
paucoapondash. ¹⁰Aden Nuquin Papan
nasho isun, ÷Atotsieshun Nuquin Papan
naid icsambo iquec quiacpaden
tsusedpabon natiapimboctequid
nuquitsen natiapimboctequid
isadaidpembon nabanta cate nuqui
bumpé? ¹¹Padenquo icnuna. Matsestedi
icsaquid icsho cuidnushe quiaash abided
cuidadac, quequin tantiaquiec unēsash
abēdi tabadendac, quequin nuqui
tantiacpaden isadaidpembo Esuquidistu
tantiaquido yanshun tantiec
—quepanēdash Petedo.

¹²Aden Petedon chuiquin ënambic
Pabadotsen Nuquin Papan tantiamiac
ambi nadatiambocquin naquin
isadaidpembo ismebanaid
chuiapanēdash. Adembidi Bednaben
chuiopanēdash. ¹³Aid daēdshun
chuiabanquin nainan Esusën utsi Acobo,
Esus tantiaquido tsusio dapa,
nadpanēdash: —Ëmbitsen chuinu.
Tantiata. ¹⁴Isadaidpembo tantiaquin
aido Esus chuibanta, quequin Nuquin
Papan chiapaden Simon Petedon chiac
isadaidpembo Esus tantiaquid yansho
Nuquin Papan aidtedi nuquibēdta aton
matses icmiac. ¹⁵Adomboembidi Nuquin
Papan chuimiadēn dada uampid nad
iqueque. Tantia. Chuinu:

¹⁶ “Isadaidbobēd yuec
tabadenquiocboedi padpidec
choash aidobēd icoaindabi.
Dabid padon tsyuecquido
isadenquiocboedi isadcuenendac

¹⁷ ma aton Icbo matsestedishun
istuidpanuna;

ma adembidi isadaidpembon ëmbi
cuēnaidon aibidi istuidpanuna,
¹⁸ quec Nuquin Icbo ambi ënden
tantiampicpadomboen chiaid
nec”

—quiashic abi Acobo onquec:

¹⁹—Nuquin Papan chiampid tantiaquin
nuquin tsusedpabon naden nata
quequin chiapaden nata isadaidpembo
cainquo ictiad. ²⁰Nëiduidtsëqui dada
uakin isadaidpembo chuibanuna
nuquibi: Nuquin Papan uaidbimboecnuc
nacnenaaid tantiaquin pete sanaid penda;
adembidi, min chiduidtsëqui chudta;
adembidi, min bënëuidtsëqui chudmeta;
adembidi, Nëish tētaniaid intacchobi
codocaid penda, quequin isadaidpembo
chuibanuna. ²¹Adec Moisesën dada uaid
iccuededquin isec nuqui onquedenec.
Aid icnuc, Adomboembidi nata, quequin
isadaidpembo chuinuna —quepanēdash
Acobo iccuededquido chiec.

²²Adashic Esuquidistu tantiaquido
iccuededec onquec ënēdshun ëmbi dada
uaid Antioquiya yacno buanuec
Edusaden yacnocquid daēd nidta,
quequin Pabadobēdta Bednabe
nidmepanēdash. Abentsēc Udas
cashumbic Badsabas cuēnaid; utsibic,
Sidas cuēmēdquid. Aid daēdi Nuquin
Papan chiaid comapenen tantiaquidquo
icpanēdash. ²³Isadaidpembo chuiquin
Edusaden yacnoshon Esuquidistu
tantiaquidon naden dada uapanēdash:
“Esuquidistun ëbi chuibeneta

caidobēdi ambia Esuquidistu
tantiaquido Edusaden yacnocquido yec
min utsibimboecquido nebi.
Isadaidpembo Esuquidistu tantiaquido
Antioquiya yacno tabadquidobēdta
nidaid Sidia yacno tabadquido, nidaid
utsi Sidisia yacno tabadquido chedo
mibitedi chuiquin dada uaombique. Isec
onqueta. ²⁴Ëbēd icquido nēuëshquio
nidash mibi yacno choash puduedshun,

Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi. ²⁵Aden chuisho tantiashun nēmbocquidobēd iccuededec onquequin abentsēcshun tantiabimboen dada uaombi. Aidi nēmbocquid daēdi Pabado Bednabebēdta buantan, quequin chiemi. ²⁶Unēsmāne, quenquo yec capucuenequin Esuquidistu chuibanquido Pabadobēd Bednabe nec. ²⁷Adquid aid daēd icsho isun aid chedobēdta Udas Sidas chedo mibi yacno nidmembi. Adoac ěmbi dada uacpaden ma mibitedi chuioapanuna abimbo iquec camenuen. ²⁸Nuquin Papan Mayanēn ěbitedi tantiamiacpaden isadaidbon naden nata quequin chiacpaden nata mibi caisa nebi. ²⁹Nēidtedtsēqui ěbitedishun nata caid nec: Nuquin Papan uaidbimboecnuc nacnenaid tantiaquin utsibon abi yacnoshon sanaid penda; adembidi, min chidouditsēqui chudta; adembidi, min bēnēuidtsēqui chudmeta; adembidi, mimbi nēish cuesuniaid intacchobi codocashun penda. Adoac ěmbi chiacpaden nabanec mibi bēdambo icpec. Padi aitedtsēqui chiemi.”

³⁰Aden dada uaquin nainshun ambi niddan caboed meniāc Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menepanēdash. ³¹Aden meniāc isbanash: —Mimbi bēboed dada uaid isash bēdambo iquebi —quepanēdash isadaidpembo Antioquiya yacnocquido.

³²Adnubic Udasēn Nuquin Papan chiaid chuibanquin Esuquidistu tantiaquido Antioquiya yacno tabadquido bēdamboen tantiamenepanēdash. Adomboembidi

chuibanquin Sidasēn tantiamenapanēdash. ³³Aden dadpen ushquin chuibanshun: —Edusaden yacno nidoaibi —caquien:

—Ai, mibi niddsho isash unēsquo icquimbi mibi chomequido yacno niddan, mibi caimbi —quepanēdash Esuquidistu tantiaquido Antioquiya yacno tabadquido. ³⁴Adec aido Edusaden yacno nidnubien ³⁵Pabadon Bednabe chedobēdta Antioquiya yacno tabadquin Esuquidistu tantiaquid utsibo Nuquin Papan chiaid bēdamboen tantiamenueen chuibampānēdash.

Pabadobēd Bednabe cuēshēdaid

³⁶Adashic, yuecash Pabado Bednabe caic: —ĚMidapadec nuqui capucuenequin Nuquin Papan chiaid chuibeneboedo tabadeque? Isec nuquibi niddnu. Nid —quepanēdash.

³⁷Adoaquien: —Ma Madcosbidi nidoanu. Chuita —quepanēdash Bednabe.

³⁸Adoaquien: —Chieshec aidi cuēshēdondashe. Padi. Nuqui daēdtsēqui niddnu. Nid —quepanēdash Pabado.

³⁹Adoaquien Bednabe aden tantienquo yec Pabadobēd comapenec onquiah Madcosbēd cano antabēdtoanec Chipide yacno nidoapanēdash. ⁴⁰Adnubien Pabado Sidas abēd Edusaden yacnoēsh choboed caic: —Nuquibi niddnuna —quepanēdash.

Adec aid daēd niddnuesho isash anocquid Esuquidistu tantiaquido: —Ma Nuquin Papan mibi daēd bēdamboen niddmequin ma mibi bēdamboen namepanuna —cac Pabadobēd Sidas niddpanēdash. ⁴¹Adanec niddaid Sidia caid yacno choash capucuenequin Esuquidistu tantiaquido iccuededacno puduedshun bēdamboen tantiamenueen

chuibampanēdash. Aden chuibeneshumbic nidaid Sidisia yacno choshon Esuquidistu tantiaquido shubu utsin-shubu utsinquiecc iccuededacnomboec puduedcuenequin Pabadon chuibanoapanēdash.

Pabadobēd Timoteyo nidaid

16¹Adec nidec shubu dadpen icquid Dedbe caid yacno choash tabadquin adomboebidi chuibanoash nidequi shubu dadpen icquid Disteda caid yacno Pabadobēd Sidas choapanēdash. Ambo Esuquidistu tantiaquid Timoteyo cuēmēdquid tabadpanēdash. Aidēn tita isadaidbo Esuquidistu tantiaquid icnubi aidēn papa isadaidpembo quidieco matses icpanēdash. ²Timoteyo bēdamboquid nec, quequin Disteda yacnocquidon Pabado chuipanēdash. Adomboebidi shubu dadpen icquid Iconio yacnocquidon chuioapanēdash. ³Aden dadpenshun chuisho tantiash Timoteyo buante bupanēdash Pabado. Adecc, Timoteyo buanu, qeshun ēbi capucueniacno isadaidbo dadpen iqueque. Aidon Timoteyo isash, Aidēn papa quidieco matses icnuc aton madobidi isadaidpembo nec, aido quenushe qeshun Pabadon Timoteyon shui dēbid dētemepanēdash. ⁴Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaquin chiaid Pabadon chuioapanēdash. ⁵Adembidi Nuquin Papan chiaid chiac ēnden Esuquidistu tantiaquidon tantiabenuicnobi utsi dadpen Esus tantiaquid yanoapanēdash.

Ushquin Masedonia yacnocquid Pabadon isaid

⁶Adanec nidaid Sidisia caid yacnoēsh nidsho Nuquin Papan Mayanēn:

—Nidaid Asia caid yacno Esuquidistu chuibanuec nidenda —cac Pabadobēd icquido nidaid Pidiquia caidtsen datambidanec nidaid Cadasia caidbidi datambidanec ⁷nidaid Misia caid yacno chopanēdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanēn aido tantiameoapanēdash. ⁸Adoac nidaid Misia datambidanec shubu dadpen icquid Todoas caid yacno ēbi tabadacnobi chopondash. ⁹Ambo choash tabadec inchēshnuc ushquin nidaid Masedonia caid yacnocquido Pabadon ispondash. Adecc ushquin isquin nidaid Masedonia yacnocquido: —Ēbitedi Esuquidistu chuibanec cho —quec onquesho Pabadon tantiapondash. ¹⁰Aden tantiash: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ēbitsen Pabadobēd nidpondabi.

Didia cuēmēdquid Esuquidistu tantiaquid yanaiid

¹¹Adanec Todoas yacnoēsh puduanec cano antabēdtoanec cuebi nidequi acte nēnantanquio nidaid nacnēdquid Samotodasia caid yacno choash Pabadobēd icquido tabadtuidpondash. Badiadash auēshquio puduanec cano antabēdtoanec nidquimbi potebidanec nidaid Masedonia caid yacno ēbitedi chopondabi. Aid nidaidēn acte cuēmambi shubu dadpen icquid Niapodis caid yacno pudundoanec ¹²nidequi shubu dadpenquio icquid Pidipos caid yacno domanobo dadpenquioshē tabadacno yuec ushec tabadpondash.

¹³Pidipos yacno tabadashic isadaidbo iccuededte badiadēn Nuquin Papa chiecc

utsibo onquedeniacno istuidnuec
 puduanec shubu nibēdacno nidequi acte
 utsi cuēmambi choapondash. Ambo
 choshon iccuededquido chidobo
 istuidshun Esuquidistu Pabadon
 chuibanpondash. ¹⁴Pabadon
 chuibanacno chido Didia cuēmēdquid
 shubu dadpen icquid Tiatida caid
 yacnoēsh choquid icpondash. Aidēn
 piucquid bednuen dashcute cuēshaid
 umu-umumbocquid menebenepondash.
 Aidi Nuquin Papa tantiaquid icquin
 Pabadon chuibanubi Nuquin Icbon
 tantiamiac Esuquidistu tantiaquid Didia
 yampondash. ¹⁵Aidbēd aton shubun
 icquido Esuquidistu tantiaquido yansho
 isun acten mentobampondash. Aido
 acten mentobanambic Didian:
 —Esuquidistu tantiaquid mibipadquid
 nebique. Con shubuno ushec cho —cac
 nidash Didian shubun puduedash
 Pabadobēd icquido tabadpondash.

Pabadobēdta Sidas quēnēn nauedaid

¹⁶Adashic padpidec Nuquin Papa
 chiec onquedeniacno Pabadobēd
 icquido nidoasho chido yuaidēn
 bēquedtuiddpondash. Aidēn mayan icsan
 tantiamiacpaden yuecash nad iquendac,
 quequin chuisho piucquid dadpen aid
 chido matsesēn meniac aid chidon ambi
 bedaidtedi abi yuaquid
 meneoapanēdash. ¹⁷Pabadobēd icquido
 bēquedtuiddshun tsibambēec choec aid
 chido: —Nēid dadatedi Nuquin Papan
 namiaidquio nec. Abi yacno
 puduedmianquid iquec, quequin
 chuibanquid nēid dadatedi nec —quec
¹⁸badiadquidēn-badiadquidēnquiec
 comapenec cuēdpondash.

Adec cuēdtonesho tantiate bunenquio
 yec amibidi bidiadquin mayan icsa
 dapuduedaid chido chuiquin
 comapenen Pabadon: —Esuquidistun
 nadatiambocquin naidēnquio

dapuduenta —cac badedquio mayan
 icsa dapuduempondash. ¹⁹Aden
 dapuduemiach chido bēdanacsho isun abi
 yuaquidon: —Nēbi nadquio iquendac,
 quequin chuitiapimbo nuquin yua iquec.
 Aden chienquiocquin piucquid
 bedtiapimbocquin nuqui
 meneoatiapimbo iquec, quequin
 tantiash nēishun Pabadobēdta Sidas
 bedshun nimbanquin abi chuiquido
 yacno chido yuaquidon buampondash.
 Piucquid bednuequin aton na bēshun
 utsibon sambanaid anoentsēqui abi
 chuiquido icsa isun chido yuaquidon
 Pabadobēdta Sidas ambo buampondash.
^{20,21}Aden abi chuiquid tsadacno bēash:
 —Nēid dada daēd isadaidbo nec.
 Nēmbo choshon abi chuiquidon naden
 nata quequin chiaid chuibanec. Ēbitedi
 domanobo icquin ambi chiaid
 ēbitedishun natemaid icnuc matsestedi
 chushquecuededosh —quepondash
 chido yuaquido abi chuiquido chiec.
²²Aden chuisho tantiaquidon chiac
 dadpen cho-choash iccuededquin
 Pabado bēquidon chiacpadomboen
 aidontsen chuioac abi chuiquido:
 —Bēboedon dashcute chicshun
 cueshcaten cuesta —cac sondadon
 cuespondash. ²³Aden comapenen
 cuesmeshun buameshun quēnēn
 nauedmeshun ambi quēnēn nauedaid
 ista caid chuiquin Pidipos yacnocquido
 chuiquidon: —Puduenanec cuenushe
 queshun nēid daēdi bēdamboen isquiota
 —capondash. ²⁴Adsho tantiashun ambi
 ista caidēn Pabadobēdta Sidas
 nēnantanquio quēnēn nauedquin
 tsadunshun cueste shēcūē uaidēn
 tausunash puduentanquin quēnē
 bēdamboen bētashpanēdash.

²⁵Aden bētashash aton shubu
 dayunquiocquidēn puduedambic
 inchēshpotsembo Pabadobēd Sidas
 Nuquin Papa chiec onquepanēdash.

Adecbidi Nuquin Papan naid chiec cuëdëmpañédash. Adec cuëdënsho utsibon tantianubi ²⁶comapenec nidaid ishcuñdubi mëtaniaidtedi mëchiquidpañédash. ²⁷Adnubien ista caid isec tsadboedi ushtanec isucunquin isac shëcuë bëtashaid ënden shëcniac. Adsho isash ista caid: —Quënën nauedaido puduen-puduempacnui —quetanec: —Chuiquid dapabon ëbi cuesunemetsiash —qeshun siadnuequin chështe abi tsiusudaid chicsho ²⁸istanquin Pabadon: —Quënën nauedaidtedi nëmbo iquebique. Seshuniadenda —quequin comapenen cuëmpañédash.

²⁹Adoaquien, seshuniadtsemboedën: —Tabote bec cho —cac ambi namiaidën tabote bedtanquin meniac tabote bedshun sananec badedi quënën puduedash dacuëdec uëdëquec Pabadobëd Sidas tabadacno choash danëshën sebudec shuebudpañédash. Mibi daëdi bëdambocquid incubi adquidpenquo nebi, quequin tantiaquin ismepañédash. ³⁰Adsho isun Pabadon nidtomiaqui seshuniadtsemboed bëyucanec nidquin aton shubun Pabadobëdta Sidas yuedash: —¿Nuquin Icbo yacno puduednush mitsipadequibi ëbi icsaid cuidadpeque? Chui. Tantianu —quepañédash seshuniadtsemboed.

³¹Adoaquien Pabado: —Mibibi cuidadtiapimbo iquec. Mibëdta min shubun icquido icsaquid icsho cuidnushe quiash abided cuidadec unëshash Esuquidistu aton Papa yacno puduedash abi tantiaquido yuedquid neque. Mibi icsaid ënash, Esuquidistu con Icbo nec, quequin abimbo tantiata ³²—qeshumbic seshuniadtsemboedbëd icquido Esus tantiamenuen Nuquin Icbon chiaid Pabadon chuipañédash.

³³Adoaqui Pabadobëdta Sidas cuesaid chiuë acten bëpanshunquin nainacsho

aton shubun icquido Esuquidistu tantiaquido yansho isun aitedi Pabadobëdta Sidasën acten mentobampañédash. ³⁴Aden mentobanaqui aton shubun yuedshun pemepañédash. Adashic, Nuquin Papan chiaid abimbo tantiaquid yec ambi bëdambo icmiaido seshuniadtsemboedbëd icquido icpañédash.

³⁵Adashic, badiadash Pidipos yacnocquido chuiquidon: —Nauedaid shubu yacno nidshun quënën nauedboed daëd pudueme, quequin chuitanta —cac quënë yacno nidshun ista caid adomboembidi chuiopanédash. ³⁶Aden chiac ista caidën: —Quënën nauedboed daëd pudueme, quequin chuiquid dapabon chiosh, quequin aidon chomiaidën chioshibique. Dacuëdenquo yec nid —capanédash Pabadobëdta Sidas chuiquin.

³⁷Adoaquien Pabado: —Ëmbi naid chuimenquiocquin ëbi daëdi domanobo icsho utsibon isnubi cuesmeposhi. ¿Nëbi puduemenuen utsibo isenquiocnobida ëbi daëdi nidmepec? Padenquo caimbi. Ëbi daëdi puduemenuec ma chuiquid dapabo abibi chopanuna —quepañédash.

³⁸Aden chiac puduenanec nidequi abi chuiquido yacno choshon, Mimbi quënën nauedmeboed daëd domanobo nec, quequin chuisho tantiash chuiquid dapabo comapenec dacuëdcuedpañédash. ³⁹Adec dacuëdec nidequi nauedaid shubuno choash: —Domanobo nec, quequin tantienquiocquin mibi quënën nauedmiombi —qeshun puduemetanec: —Pidipos yacnoësh nidtan —capanédash Pabadobëdta Sidas chuiquin. ⁴⁰Adoaquien, puduenanec nidequi Didian shubu yacno choash

puuedeshun Esuquidistu tantiaquido
iccuededsho isun bēdamboen
tabadmenuequin Pabadon
chuibampanēdash. Aido chuibidanec
Pabadobēd icquido nidoapanēdash.

**Tesadonica caid yacnocquido isadaidbo
nēishcuededaid**

17 ¹Pidipos yacnoēsh puduanec
nidequi Pabadobēd icquido
shubu dadpen icquid Ampipodis caid
datambidanec shubu dadpen icquid
Apodonia caidtsen datambidanec shubu
dadpen icquid Tesadonica caid yacno
choash, Nuquin Papan chiaid chuibante
shubu iquec, qesho tantias
Tesadonica caid yacno Pabadobēd
icquido tabadpanēdash. ^{2,3}Ambo
tabadec isadaidbo iccuededte badiadēn
abi nidteniapadec Nuquin Papan chiaid
chuibante shubu yacno choshon
Pabadon Esus tantiamenuen Nuquin
Papan ēnden chiampid
chuibampanēdash. Nuqui icsaid
bedshunash abided cuidadec
Esuquidistu unēsaid ambi
uincumetequid Nuquin Papan
Chomiaidquio nec. Aidi nuqui Quidistu
caid neoaic, quequin chuipanēdash
Pabadon. Sabado 3ted matamequin
adomboen chuibampanēdash. ⁴Aden
chuibanaqui Esus tantiaquid utsi-utiec
yampanēdash. Nēidic, isadaidbo
utsi-utsiec; utsibic, Nuquin Papa
tantiaquido quidieco matses dadpen;
utsibic, anocquido chuiquid dapabon
chido utsi-utsiec aido Esus tantiaquid
yampanēdash.

⁵Aden Pabadon chuibanac Esus
tantiaquid dadpen yansho isash
isadaidbo utsibo nēishun utsibon
piucquid bednuequin aton na
sambanshun ismiacno nidshun
tantiesabo, icsambocquid dadpen,
iccuededmeshun aidotsen nēishmiac

natia chushquecuededpanēdash. Adec
chushquec nidequi Pabadobēdta Sidas
bednuec Ason cuēmēdquidēn shubuno
puuedec nidpanēdash. ⁶Ambo choshon
Pabadobēd Sidas nibēdsho isun
Esuquidistu tantiaquido Asombēd
icquido bedshun abi chuiquid dapabo
yacno Pabado chieshēnquidon buanec
abi chuiquid dapabo yacno choash:
—Nidaid utsi-utsiec yacno
capucuenequin chuitemaid
chuibanquido nēmbō ⁷choacsho Asonēn
aid daēd yuedaccosh. Nuqui ancaquid
Sesadēn chiaid niacquin ancanquid utsi
Esus cuēmēdquid iquec, quequin
chuibanec —quepanēdash Pabado
chieshēnquido abi chuiquido chiec.

⁸Aden, Ancanquid utsi iquec, quequin
Pabadobēdtan Sidasēn chiec, qesho
tantias chuiquid dapabo
iccuededquidobēd comapenec
chushquecuededpanēdash. ⁹Aktanec abi
chuiquid Asombēd icquido caic: —Nēbi,
¿Atotsi tantiaquin Pabadobēdta Sidas
yuedo? quequin mibi chuimetiapimbo
iquembi. Yuecshun mibi chomeshun
chuimembi. Ēmbi chuimiabi Tesadonica
yacnoēsh nidenda. Ēmbi chiacpaden
nanuequin piucquid ēbi mene
—capanēdash Tesadonica yacnocquido
chuiquid dapabon Asombēd icquido
chuiquin. Adoaquien piucquid meniac
bedshun: —Min shubuno nidtan —cac
nidanepanēdash Asombēd icquido.

Bedeya yacnotsen tabadaid

¹⁰Adshumbic bednushe qeshun aid
inchēshēmbi Tesadonica yacnocquido
Esuquidistu tantiaquidon Pabadobēdta
Sidas shubu dadpen icquid Bedeya caid
yacno nidmepanēdash. Aden nidmiac
Bedeya yacno choash tabadec Nuquin
Papan chiaid chuibante shubu yacno
Pabado nidpanēdash. ¹¹Anoshontsen,
Esus Nuquin Papan Chomiaid Quidistu

nec, quequin tantiamenuen Nuquin Papan ënden dada uamiampid Pabadon chuibanoasho tantiashun bédambocquid icquin, Abimbobida chuibanoshe. Isbono, quequin Nuquin Papan chiampid isban-isbampañédash Bedeya yacnocquidon. ¹²Aden isbanec, Abimbo caic, quiash Esuquidistu tantiaquid dadpen isadaidbobéd isadaidpembo Esuquidistu tantiaquido yampanédash. Adcebidi isadaidpembo chuiquid dapabo quidieco matses utsi-utsiec aton chido chedobéd Esuquidistu tantiaquid yampanédash.

¹³Adnubien, Bedeya yacnoshontsen Pabadon chuibanec, quesheo tantiash Tesadonica caid yacnocquido, isadaidbo, Asombéd icquido bedmeboedo, Bedeya yacno choshon anocquidotsen nëishmiac comapenec chushquecuededpanédash. ¹⁴Adsho tantiashun Esuquidistu tantiaquidon Bedeya yacnocquidon acte dapa cuëmmano Pabado nidmepañédash. Adnubi Sidasbéd Timoteyo nidenquio yec Bedeya yacno tabadnubien ¹⁵Bedeya caid yacnoshon utsibon bëyucanquin Pabado buampanédash. Aden buanec nidequi shubu dadpen icquid Atenas caid yacno chopanédash. Ambo choash abia bëyucanquido: —Ëbi chobocnobidi Bedeya yacno nidoaibi —quesheo tantiashun Pabadon: —Mibi yacno choash, Badedquio Atenas yacno chota, quiosh Pabado, quequin Sidasbédta Timoteyo chuita —capañédash. Aden Pabadon chiaquien Bedeya yacnocquido abi yacno nidoapanédash.

Atenas yacnotsen Pabado tabadaid

¹⁶Abia bëyucanquido Bedeya yacno nidambi Atenas yacno Pabado tabadquin, Sidasbéd Timoteyo choec, queshun cainec capuquimbi Atenas

yacnocquidon nacnenaid isbampañédash. Aidon Nuquin Papan uaidbimboecnuc nacnenaid dadpen tabècaid papa cain cuënaid ambi tantiaido icsho isash, Nuquin Papa Abentsëcquiobi iquec, quequin tantiesa Atenas yacnocquido nec, quequin tantiec Pabado unësquio yampanédash. ¹⁷Adec unësquio yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabadon chuibampañédash. Adembidi anocquidon piucquid bednuen aton na sambanshun ismiacno nidshun adomboembidi Pabadon chuibanoapanédash. Isadaidbobéd onquequin Esuquidistu Pabadon chuipanédash. Adembidi isadaidpembobéd onquequin Esuquidistu chuioapanédash. ¹⁸Anoshon chuibansho tantiash epicudeyo cuëmédquidën chuinédacpaden tantiaquido Pabadobéd onquepanédash. Adembidi tantiash estoico cuëmédquidën chuinédacpaden tantiaquido Pabadobéd onquepanédash. Aido Pabadobéd onquequin Pabadon Esus chuisho tantienquio yec: —¿Atodain comapenec onquequin nëid dadan chuipash? —quepanédash. Adnubien utsi: —Matses utsibon papa cain cuënaid chuibanec nepanui —quepanédash. Pabadon Esuquidistu unësash uincuenaid chuisho tantiash adpanédash. ^{19,20}Adec onqueshumbic, Utsin tantiaid tantianu, quec Adeyopaco caid yacno iccuedednuequidon bëyucanquin bëash Pabado: —Mimbi chiaid ëmbi tantiacmaid nec. ¿Midapadquidquio mimbi chuibaneque? Tantanu. Chuiban —quepanédash abi bëquido caic. ²¹Abi bëquido Adeyopaco caid yacno nidash Atenas yacnocquido dadpen utsi-utsiec yacnoësh

cho-choquido
badiadquidën-badiadquidënquieç
utsin-utsinquien ambi tantiacpaden
chuibansho tantianueç
iccuededpanëdash.

²²Aden mimbi tantiacpaden chuibanta
caquien nënantanquo nidtoshon naden
Pabadon chuibampanëdash:

—Chuibanu. Tantiata. Mimbi papa cain
cuënaid mimbi tantiaid iqueç, quequin
tantiembi. ²³Capucuequin mimbi
tantiaidbimboecnuc nacnenaid dadpen
isombi. Mimbi papa cain cuënaid
dadpen tabëcaid icnubi mimbi
cuënacmaid abentsëc iccosh. Aid mimbi
cuënacmaid icnuc abibimboecnuc
nacnenaid nibëdosh. Aton
shubumpiuidtsëqui iccosh. Mimbi
cuënacmaid mimbi tantiacmaid mibi
chuibanu. Tantiata.

²⁴“Ëmbi Nuquin Papa cain cuënaid
nidaibëdtabi abu uashumbic
aidënquiocquidtedi uaquidquo nec.
Abitedi uaquidquo yec abitedishun
icbombo aidi nec. Aidi tabadmenuequin
matsesën shubu uashunaidën tabadesa
nec. ²⁵Aidi abitedishun Icho icnuc
abitedi aton na nec. Adquid icsho, Con
na mibi menenu, matsesën aid
catiapimbo iqueç. Aidën tantiacpadeç
ëbitedi nëmbobi tabadebi. Aidën
tantiacpadeç ëbitedi tiboquebi. Aidën
tantiacpaden ëbitedishun bedbanoaimbi.

²⁶Aidëmbi bëyuc dada uampidën
tsyuecquido ëbitedi nec. Aid bëyuc
dadan tsyuecquido dadpen yanash
matses utsi-utsimboec dadpen iqueç.
Adquid yec nidaid utsi-utsieç yacno
tabadquido nec. Nuquin Papan
tantiacpadequi seta taënueç ue
yanendac. Adeçbidi, inchështanec
badiadoaic. Adeçbidi, ushë nidash
choaic. ²⁷Aidëmbi naden tantieç: Matses
tantiaquin abitedi uaquin
nashundenembi. Aden ambi matses abi

tantiaquin nabanaid isash matses,
¿Tsuntsin nabanaid nepec? queshun ëbi
tantiaquin Icho ëbi capec, quequin
tantiaquin Nuquin Papan nuqui
nashunec. Aden nashunquin Nuquin
Papan nadatiambocquin nabanaid nuqui
ismedenec. ²⁸Aidën nac tiboquequid
ëbitedi nebi. Aidën nac capuquidbidi
ëbitedi nebi. Ademibidi min matsesën
dada uampid adomboen chiaid nad
iqueque. Tantiia. Chuinu: Nuquin Papan
bacuëbo ëbitedi nebi, quequin min
mëdimbon chuipanëdash.

²⁹“Nuquin Papan bacuëbo ëbitedi
iqueç tiboquequid icquin matsesën
nacnenaid tiboquesa papa cain
cuënenquioctiadquidi matses nec.

³⁰Ënden matsesën ambi nacnenaid aden
cuënsho tantiash Nuquin Papa, Chën.
Adoenda, quenquiocboedi nëbi, Mimbi
icsamboen tantiaid ënta, quequin chieç.
³¹Matsesën naid chuibante ushë chonoc
matses icsaibëdta ambi bëdamboen
naid chuibanquin Nuquin Papan
chomeshun matses icmiaidën
cuidbanendac. Ambi abipadquid matses
icmiaid, Nuquin Papan matsesën naid
chuibanquid icmenu caid unësacsho
isun ambi chiampicpaden nanuequin
Nuquin Papan uincuemepondash
—quepanëdash Pabado Adeyopaco
yacno iccuededquido Esus
tantiamenueç.

³²Adeç aidi unësacsho Nuquin Papan
uincuemepondash, quequin Pabadon
chuisho tantiash utsi-utsieç
mamënshumëmbi utsi-utsieç: —Aidën
chuiboed padpiden tantianuna

—quepanëdash. ³³Adoquien, Pabado
Adeyopaco caid yacnoësh nidpanëdash.

³⁴Adeç nidshun yueç ushquin chuisho
tantianu queç Pabadobëd iccuededquin
utsin-utsinquien
padpiden-padpidemboen
tantiabededpanëdash. Aden Pabadon

chuihanac utsi-utsiec Esuquidistu tantiaquid yampanédash: Nèidic, Dionisio cuëmédquid Adeyopaco caid yacno iccuededquido chuiquid nepanédash. Utsibic, chido Damadis cuëmédquid adecbidi Esuquidistu tantiaquid yampanédash. Aidobéd utsi-utsiec Esus tantiaquid yampanédash.

Codinto yacno Pabado tabadaid

18 ¹Adec Atenas caid yacno tabadash auëshquio puduanec nidec shubu dadpen icquid Codinto caid yacno Pabado chopanédash. ²Ambo isadaidbo Aquida cuëmédquid nidaid Ponto caid yacnoshon tishaid Pabadon istuidpanédash. Isadaidbotedi nidaid Itadia yacnoësh niddan, ancanquidën cac aton chido Pidisida cuëmédquidbéd Codinto yacno choash Aquida icpanédash. ³Nidaidën capuquid yua bitsi shubumpi nacnenquid abipadquid Aquidabéd aton chido icsho isun aidobéd tabadquin Pabadon shubumpi nacnempañédash. ⁴Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabadon chuibampanédash.

⁵Ambo tabadnubi Sidasbéd Timoteyo nidaid Masedonia yacnoësh choambic shubumpi nacnenenquiocquin isadaidbo Esuquidistu tantiamenuen Pabadon chuibampanédash. ⁶Adsho, Aid tantiatiaپی, quequin isadaidbon Esuquidistu icsamboen chuisho tantiasb abi daéd dasiuidaid bëntsecquid chicshun ishcunec Pabado: —Esuquidistu mibitedi chiombi. Aid tantiesha yec unëshash Nuquin Papa yacno puduedenquio mibitedi iquendac.

Adquid Nuquin Papan cuidquin nësecatequid nendac. Nèbi padpiden mibi chienquio iquembi. Isadaidpembon tantiatsiasb, quequin aido chuibanembi —quepanédash Pabado isadaidbo tantiesha chiec.

⁷Aden chiashic Nuquin Papan chiaid chuibante shubu yacnoësh puduenanec aid dayuntsëqui shubu icquidën Pabado puduedpanédash. Aid shubu icbo Usto cuëmédquid Nuquin Papa tantiaquid icpanédash. ⁸Uston shubunoshon Esuquidistu Pabadon chuibanac Quidispo cuëmédquid Esuquidistu tantiaquid yampanédash. Aidi Nuquin Papan chiaid chuibante shubun iccuededquido chuiquid dapa icpanédash. Aidbéd aton shubun icquidtedi Esuquidistu tantiaquid yampanédash. Adecbidi Codinto yacnocquid dadpen Esuquidistu tantiaquid yampanédash. Adsho adquidtedi acten mentobampanédash.

^{9,10}Adashic, yuecash inçhëshën Pabado usho Nuquin Papa: —Codinto yacnocquid dadpen Esuquidistu tantiaquid yanendac. Aden ëmbi chiac dacuëdenquiocquin comapenen chuideneta. Mibi dayun uasho ëbi tantiesabon mibi natiametiapimbo iquendac —quepanédash Pabado caic. ¹¹Aden chiac Codinto caid yacno seta abentsëc matamiasb ushë 6ted nidmec tabadquin Nuquin Papan chiaid Pabadon chuidonepanédash.

¹²Adnubien nidaid Acaya caid yacnocquidon chushcaid chuisho tantiasbun matses icsambocsho cuidte chuiquid Cadion cuëmédquid icnubi isadaidbon Pabado bedshun abi chushcaid Cadion chuinen buampanédash. ¹³Ambo bëquin puduedmiasb: —Ancanquidën chiaid niacquin matsesën tantiatemaid nëid

dadan chiosh —quepanēdash Pabado chieshēnquido Cadion caic.

¹⁴Adoquien Pabado onquetsenubi Cadiomba onquedopanēdash: —Tantiata, isadaidbo. Mibi chuinu. Nēidēn icsamboen nabanaid mibitedishun ēbi chuisho tantiatsiambi. ¹⁵Aden chienquo yec, Nēidi mibi onquiaidbēda min matesēn Nuquin Papa cain cuēnaid icsamboen chuiquid nec, mibi quepec. Adecbidi, Mimbi natemaid chuiquidquo nēid dada nec, mibi queopec. Aden mimbi chuisho tantiashun, Ēbi chienda caimbi. Domanobo chuiquidēn naden nata quequin chiaid niaquesa nēid nec, quequin isembi. Aden ěmbi isac mibi chushquiaid mibi chuiquid yacno nidshun chuitanta. ¹⁶Aden chuishumbic Cadionēn: —Aidtedi umanuc puduemeta —cac isadaidbo Pabado bēboedo Cadionēn namiaidon puduemepanēdash. ¹⁷Adoac puduenshumbic Nuquin Papan chiaid chuibante shubun iccuededquido chuiquid utsi Sostenes cuēmēdquid bedshun isadaidbon comapenen cuespanēdash. Adosho isun chiac Cadion, Icsamboen naic, quenquo yec otacquo tsadpanēdash.

¹⁸Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanēdash. Abēdi Aquida aton chido chedobēd Codinto yacnoēsh nidec shubu dadpen icquid Senquedeya caid yacno chopanēdash. Ambo tabadquin, Nuquin Papan ēbi dayun uaid cuidquin Edusaden yacno choshon piucquid menembi, quequin ismenuequin aton manēdaid Pabado matasmepanēdash. ¹⁹Ambo ushē abentsēc nidmec tabadash cano antabēdtoanec acte dapa potiash Epeso yacno choshon Aquida aton chido

chedobēd, Nēmbobi tabadnu, quepanēdash. Adsho tantiashun aid daēdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanēdash Pabado. ²⁰Aden chuibansho tantiashun: —Adomboembidi chuibanuec ĩada ēbēd yuec tabadtsia? —iccuededquidon caquien: —Nēbi padenquo iquebi. ²¹Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auēshquo puduanec nidequi cano antabēdtopanēdash Pabado.

²²Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanēdash. ²³Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auēshquo nidequi nidaid Pidiquia caid yacno choash tabadquin Esuquidistu tantiec iccuededquid dadpen bēdamboen tantiamenuen chuibanoapanēdash Pabado.

²⁴Adnubien isadaidbo Apodos cuēmēdquid shubu dadpen icquid Ade candedia caid yacnoēsh Epeso yacno chopanēdash. Aidi dadpen tantiaquid yec Nuquin Papan chiampid tantiaquid nepanēdash. ²⁵Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanēdash. ²⁶Aidi Nuquin Papan chiaid chuibante shubu yacno nidshun dacuēdenquiocquin ambi tantiaid chuibampanēdash. Aden chuisho tantiash, Ēbi yacno isec cho, qeshun Aquidan aton shubu yacno

buanshun Esuquidistu choaid ambi nadatiambocquin naidbëdtabi abi unëshash uincuenaid chuibampanëdash Aquidabëdtan aton chidon Apodos tantiamequin.

²⁷Aden Esuquidistu bëdamboen tantiashe Epeso yacno yuec tabadquin Esuquidistu Apodosën chuibampanëdash. Adec yuec tabadquin chuibanashic, Nidaid Acaya caid yacno nidnu, quepanëdash. Adec nidnuesho tantiashun, naden dada uashun Apodos menepanëdash Epeso yacnocquidon: Nëid dada uaid sananquid Apodos cuëmëdquid Esuquidistu tantiaquid nec. Ëmbi isaid neque. Yuedta, quequin dada uashun, Apodos Epeso yacnocquidon menepanëdash ma nidaid Acaya caid yacnocquido Esuquidistu tantiaquido Apodosën menenu, qeshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bëdamboen tantiamenuen chuibampanëdash.

²⁸Aden chuibanquimbic isadaidbo Esuquidistu tantiesabo icsho isun abëd onquequin, Esuquidistu Nuquin Papan Chomiaid nec, quequin Nuquin Papan chiampid Apodosën chuibampanëdash.

**Epeso yacno Pabado
abëd icquido tabadaid**

19 ¹Codinto yacno Apodos icnubi Pabado nidaid Pidiquia caid yacnoësh puduanec podquedën choec macuësh dapa dectatocuëtsenec shubu dadpen icquid Epeso caid yacno choapanëdash. Ambo choshon Esuquidistu tantiaquido istuidshun: ²—¿Esuquidistu tantiaquido icshoda Nuquin Papan aton Mayan mibitedi menepanëdash? —capanëdash Pabadon.

Adoaquien: —Nuquin Papan Mayan iquec, quequin tantiamboccombi —quepanëdash Epeso yacnocquido.

³Adoaquien Pabado: —¿Atotsi canuen mibi acten mentobampanëdash? —quepanëdash.

Adoaquien: —Uan padon chiaid tantiaquid icsho acten mentondashi —quepanëdash Epeso yacnocquido Pabado chiec.

⁴Adoaquien: —Mibi icsaid ënta, qeshun abimbo tantiaquidtedi acten mentobanquin, Ëbi tsibanec choquid Esus tantiaquid icta, quequin Uan padon chuipanëdash —quepanëdash Pabado Epeso yacnocquido chiec. ⁵Aden chiac, Esuquidistu tantiaquid nebi, quequin Epeso yacnocquidon chuisho tantiashun padpiden acten mentomepanëdash. ^{6,7}Aden aidtedi acten mentoacsho mëdanten Pabadon mamishbanac aid doseted Nuquin Papan aton Mayan menepanëdash. Aden meniac abi onquiacmaidënquo onquec Nuquin Papa chiec cuëdëmpañëdash Epeso yacnocquido.

⁸Adashic Nuquin Papan chiaid chuibante shubun puduedshun Pabadon Nuquin Papabëd tabadaid chuibampanëdash. Cuembo tantiamenuequin ushë choaid 3ted nidmequin badiadquidën-badiadquidënkien dacuëdenquiocquin Nuquin Papan chiaid Pabadon chuibampanëdash.

⁹Aden chuisho tantiashe pamumëdacbimboec tabadquin, Tantiatiapibi, quequin utsin-utsinquier chieshëmënquioquin Esuquidistu icsamboen chuipanëdash. Aden chiac Esuquidistu tantiaquidobëd Pabado, Nidnu, quianec Nuquin Papan chiaid chuibante shubu yacnoësh puduanec nidec Tidano cuëmëdquidën chuibante shubu yacno choshon adomboembidi tantiamenuen matsesbëd onquequin Nuquin Papan chiaid chuibampanëdash.

¹⁰Seta daëd matamequin adomboembi

chuibampanēdash Pabadon. Aden chuibansho tantiash nidaneshun chiac nidaid Asia caid yacnocquidon tantiapanēdash. Adoac isadaidbobēd isadaidpembo Esus tantiaquido yampanēdash. ¹¹Epeso yacno Pabado tabadsho Nuquin Papan nadatiambocquid icmiacsho ¹²Pabadon dada cuēscashun dashcute cuēshē buanshun daicsaid mishbanac bēdampanēdash. Adembidi Pabadon dada cuēscabanaidēn nēnquid mishac bēdampanēdash. Adembidi pashuaidtsen pamishac bēdanoapanēdash. Adembidi mishac mayan icsa dapuduempañēdash.

¹³Adnubien mayan icsa dapuduemenuen Pabadon chiacpaden tanquin isadaidbo utsibon: —Esus Pabadon chuiboedēnquo dapuduen —capanēdash. ¹⁴Pabado tanuequido isadaidbo chuiquid Esqueba cuēmēdquidēn mado 7ted icpanēdash. ¹⁵Aden chiaquien mayan icsa: —Esus iquec, quequin ěmbi tantiaid aidi nec. Pabado iquec, quequin ěmbi tantiaidbidi aidi nec. ¿Mibitedi tsutsi neque? Tantanu. Chui ¹⁶—queshun nebudquin dashcute ched-chedcapamboen mayan icsan cuesactaniaqui shubu nuntanuēsh puduenanec cuempanēdash Esqueban mado. ¹⁷Adec cuensho isquidon chiac Epeso yacnocquid isadaidbobēd isadaidpembo dacuēdcuededpanēdash. Adec dacuēdquin, Dacuēdampambo iquec. Esuquidistu bēdamvocquid nec, quequin tantiabededpanēdash. ¹⁸Esuquidistu tantiesa icboedi Esuquidistu tantiaquid yanec dacuēdenquo yec Esuquidistu tantiaquido iccuededacno nidshun abi icsaid chuibampanēdash. ¹⁹Adquid dadpeshun icsamenuen ambi ompoquin naid ismenquiocboedombi,

Nēbi adquid ictiapibi, quequin cuēte dētsiadotanquin ambi ompoquin tantiamiaid dada uatetedi tantianuen bedash utsitsen icsabudnushe queshun abitedi tauipanēdash. Aden tauiboed menequin piucquid dadpen bedtsiandac, quepanēdash. ²⁰Aden abi icsaid dada uate tauisho isquidon chuibanac Esuquidistu tantiaquid dadpen yampanēdash.

²¹Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnotsen nidtiadquo iquebi —quepanēdash Pabado. ²²Aden chiash Asia caid yacno abi tabadquin Masedonia caid yacno abia Timoteyobēdta Edasto nidmepañēdash Pabadon.

²³Aid daēdi nidan Epeso yacno tabadquin Esuquidistu Pabadon chuibanaquien tantiesabo nēishpanēdash. ²⁴Adquid Demetedio cuēmēdquid Diana caidbimboecnuc nacnemequid icpanēdash. Aidēmbi ambi nacnemaiid menequin piucquid dadpen bedbampanēdash. ²⁵Aden Esuquidistu tantianu quesa icquin ambi Dianabimboecnuc nacnenta caidobēdta abipadquid Diana nacnemequid utsibo iccuededmeshun Demetediton nadopanēdash: —Nuqui tantiaid Dianabimboecnuc nacnenshun menequin piucquid dadpen nuqui bedbanec. ²⁶Aden nanubi nidaid utsi yacnoēsh Pabado cuēmēdquid nēmbō choshon utsi comapenen chuibanac Epeso yacnocquid dadpembēdtan nidaid Asia caid yacnocquid dadpeshun tantiec. Dianabimboecnuc nacnenaid tiboquesa iquec. Adquid matsesēn tantiaid abimbo ictiapimbo iquec,

quequin Pabadon chiec. ²⁷Aden chiac matses dadpeshun tantiash Dianabimboecnuc nacnenquido icsambo iquec, quetsiash ëbitedi caic. Adecbidi, Dianabimboecnuc nacnenaiddëd abi tabadte shubu uashunaid icsambo iquec, queoapec. Adecbidi Dianabimboecnuc nacnenaidd tiboquesa icscho matsesën tantienquo ictiadquidi nec, queoapec Pabado. Aden chiac nidaid Asia yacnocquidon dadpeshun Diana tantiaboedombi padenquo yampec. Aidëmbi tantienquo yanshun aidbimboecnuc nuqui nacnenaidd bedenquo iquendac —quepanëdash Demetedio.

²⁸Aden chiac ambi chomeboedtedi, Piucquid ëbi menequin ëmbi nacnenaidd matsesën padpiden bedenquo ictsiash, quec nëishash: —Epeso yacnocquidon tantiaid Diana bëdambo iquec —quec comapenec cuëdcuededpanëdash.

²⁹Adec comapenec cuëdcuededsho tantiash Epeso yacnocquid utsibo aidobëd cuëdcuededpanëdash. Adec cuëdcuededquin nidaid Masedonia caid yacnoësh Pabadobëd choboed Cayobëdta Adistadico bedshun iccuededte shubu yacno cuëdcuededquidon buampanëdash. ³⁰Aden aid daëd bedshun buansho isquidën chiac Pabado, Iccuededte shubu yacno nidnu, qesho tantiashun: —Padi. Ambo nidenda —capanëdash Esuquidistu tantiaquidon. ³¹Adembidi, anocquido chuiquid utsin-utsinquien Pabado chuioapanëdash.

³²Adnubien cuëdcuededquidon Cayobëdta Adistadico bedshun buansho isash matses dadpen, ¿Atotsieshun aid daëdi bë? quequin tantienquo yec tabadpanëdash. ³³Adnubien, Nuqui tantiacpadomboen chuitan, quequin isadaidbon Adecandedo cuëmëdquid nënantanquo tsicunepanëdash. Aden

tsicunequien nidtoash: —Tantia. Chuinu —quequin ³⁴daëdpactsëc chiec onquesho tantiash onqueboedi ënëdash tabadnubi: —Isadaidbo aid nec —quesho tantiash: —Epeso yacnocquidon Diana cain ambi tantiaidbimboecnuc nacnenaidd bëdambo iquec —quec baded-badedquiecuëdcuededpanëdash.

³⁵Adec cuëdcuededshobien Epeso yacnocquidon naden nata quequin chiaid dada uaquidën ënëdmenuequin nadopanëdash: —Epeso yacnocquidon tantiata. Chuinu. Diana caidbimboecquid abucuësh paëdaiddbimboecnuc nacnenaidd nuqui comapenen tantiaiddëdta abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. ³⁶Aden utsibon tantiec, quequin tantiaquin icsamboen nainda. ³⁷Dada daëd mimbi nëmbo bëboed Diana caidën shubun puduedamboccosh. Adembidi ampiambo iccosh. Adecbidi, Diana caid chiec icsamboec onquenuioccosh.

³⁸Adenquo icnuc Demetediobëd icquido abi chushquiaid chuinuec Epeso yacnocquidon naden nata quequin chiaid tantiaquid yacno nidshun

³⁹mimbi tantiacpaden chuita cuëdcuededenquiocquin. ⁴⁰Comapenec cuëdcuededec qesho tantiash ancanquid dapan Epeso yacnocquido bëdamboen tabadmeta caid yacno nidshun chiac, Ancanquid dapan chiacpadece Epeso yacnocquido tabadenquo iqueque. Cuëdcuededquido chome, nuqui catsiash. Aden chomiacc ¿atotsi nuqui chuipe? ⁴¹Aidën nuqui chomenushe quiash min shubuno nidaneta —capanëdash Epeso yacnocquidon naden nata quequin chiaid dada uaquidën. Aden chiac

Demetediobëd iccuededquido
nidanepanëdash.

**Masedonia yacnocquido isbidanec
nidequi Quedesia yacnocquido
isbidanec nidaid**

20 ¹Natia cuëdcuededboedo
nidanian Esuquidistu
tantiaquido chomiash Pabado: —Nidaid
Masedonia caid yacno nidoaibique.
Bëdamboec tabadta —quianec Epeso
yacnoësh puduanec abëdi nidondabi.
²Auëshquio puduanec nidquin nidaid
Asia caid yacnocquid utsi-utsien
chuibidanec nidaid Quedesia caid yacno
choapondash Pabado. ³Ambo choash
ushë abentsëc chotsëcnuc nidmec
tabadash: —Nidaid Sidia caid yacno
nidnu —quepondash. Adsho tantiashun:
—Ambo nidacsho mibi cuesunenuquin
isadaidbon cainec —cac nidaid
Masedonia caid yacno Pabado
nidoapondash. ⁴Nidaid Masedonia caid
yacno choash Pabado tabadnubien abëd
capuquido bëyucanec nidaid Asia caid
yacno nidpondash. Abëd capuquido
nëidted icpondash. Nëidic, shubu
dadpen icquid Bedeya yacnoësh
choquid Sopated cuëmëdquid; utsibo
shubu dadpen icquid Tesadonica
yacnoësh choquido Adistadico
cuëmëdquidbëd Secundo cuëmëdquid;
utsibic, shubu dadpen icquid Dedbe
caid yacnoësh choquid, Cayo
cuëmëdquid; utsibobi, nidaid Asia
yacnoësh choquido: nëidic, Timoteyo
cuëmëdquid, utsibic Tiquico
cuëmëdquid, utsibic Tedopimo
cuëmëdquid. Aidedi icpondash.
⁵Aidedi bëyucanec Asia yacno nidec
shubu dadpen icquid Todoas caid yacno
choash tabadquin Pabado caimpondash.
⁶Aidedi nidan pan nami
uainquioctequid pete ushëtedi tantiec
tabadanec Pabadoëd cano

antabëdtoanec nidec 5tedec ushun
bëyucamboed istuidpondash. Ambo
shubu dadpen icquid Todoas caid yacno
7tedec ushec Pabadoëd icquido
tabadoapondash.

Eyutico unësacsho uincuemiaid

⁷Todoas caid yacno tabadequi
dominco ushën Esuquidistu
tantiaquidobëd iccuededquin
Pabadoëd icquidon Esuquidistu unës
uate tantiaquin pan cuësh-cuëshun
pebededpondash. Aden piashic Pabado,
Badiadash nidebi, quiaash yuec
onquepondash inchëshpotsembo
yantsëcquiec. ⁸Aid onquiacno shubu
abentsëquën tacpan uaid 3tedi
icpondash. Abuc tacpan yacno
dectatoash quënën tabadnubi tabote
dadpen chënquepondash. ⁹Pabado
onquenubi nëbi caniaid, Eyutico
cuëmëdquid, iste shëcuë yacno tsadec
ushcasmash ushtotanec abucuësh
paëdpondash. Adec paëdsho isash
bud-budshun unësacsho isbedednubien
¹⁰Pabadotsen budquin dayumbudec:
—Unësboedi abi tiboquianeque.
Shubicuededenda —quepondash.
¹¹Aden chiasch abuc quënë yacno
padpidec dectatoashun abitedishun
pebededpondash. Aden piash tabadec
Pabado utsibëd onquecuededpondash
badiadbudsëcquiec. Adec
badiadbudbon Pabadoëd icquido
shubu nuntanuësh
puduem-puduenubien ¹²paëdboed aton
shubuno utsibobëd nidpondash
bëdambo yec.

**Todoas yacnoësh puduanec
Mideto yacno chote**

¹³Adashic Pabado: —Podquedën
nidebique. Shubu dadpen icquid Ason
caid yacno nidshun anoshon ëbi cainta
—quianec nidpondash Pabado. Adanec

aid nidnubi Todoas yacnoësh abëd capuquid utsibobëd puduanec nidequi cano antabëdtoanec Ason yacno nidoapondabi. ¹⁴Adec nidequi Ason yacno choshon istuidac Pabado ëbëdi cano antabëdtoanquin potiaash shubu dadpen icquid Mitidene caid yacno choapondash. ¹⁵Auëshquio puduanec nidec badiadash acte nënantan nidaid nacdëdquid Quio caid datambidanec nidash badiadash acte nënantan nidaid nacdëdquid utsi Samos caid datambidanec shubu dadpen icquid Mideto caid yacno choapondash. ¹⁶Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unësmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

**Epeso yacnocquido tsusiobo
Pabadon chuibanaid**

¹⁷Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabadon chomepondash. ¹⁸Aden chomeshun naden aido chuipondash: —Chiembique. Tantiata. Ëbi ënden nidaid Asia caid yacno choash mibëd yuec tabadquin nabanaid mibitedishun istenepondac. ¹⁹Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon ëbi chuibeneta cacpaden ëbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi. ²⁰Esuquidistu mibitedi bëdamboen tantiamenuen matses dadpen iccuededacnoshon

chuibanondambi. Adembidi shubu utsin-utsinqueic puduedcuenequin chuibanondambi. ²¹Nuquin Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

²²“Aden chuibanshobi Nuquin Icbon Mayanën: Edusaden yacno nidta, quequin chuioposhi. Aden aidën chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi. ²³Shubu dadpen yacnoshon-yacnoshonquien Nuquin Papan Mayanën ëbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioshi. ²⁴Aden Nuquin Papan Mayanën chuisho tantiashi, Ëbi cuesunepanundac, quenquio yec Edusaden yacno nidoaibi. Esuquidistun ëbi chuibeneta cacpaden naimbudquin utsi-utsiec yacno nidshun Esuquidistu abimbo tantiaquid Nuquin Papabëd tabadte iquec, quequin chuibanembi.

²⁵“Nëshunquio Nuquin Papan chiaid ëmbi chuibansho mibitedishun tantiabenonaidon nëuëshquio ëbi nidacsho mimbi isoainquio iquendac. ²⁶Ëmbi nëshunquio Esuquidistu mibitedi chuibanac, Esuquidistu chiambo iccoshi, quetiapiambo mibitedi iquendac. ²⁷Tantienquioctsiash, quenquiocquin Nuquin Papan tantiacpaden chuibanombi. ²⁸Aden chuibanash nëbi nidebi. Ëbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bëdamboen isban icsamboen nabanec tabadnushe qeshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa

yacno tabadmenuec Esuquidistu unēsṣanēdash. ²⁹Ēbi nidan abimbo chiacimboen chuiquid Esuquidistu tantiaquido chuiquid icnuec choendac.

³⁰Adembidi mibēdi iccuededquin utsin-utsinquien Nuquin Papan chiaid abimbo chiacimboen muaquin chiendac. Esuquidistu tantiaquid chuiquidquio icnuequin adoendac.

³¹Adquid Esuquidistu tantiec iccuededquido cuēshēdmequid neque. Ista. Adquid iquendac, quequin mibēdi tabadquin ēnenquiocquin chuibanondambi. Adquid choec, quequin mibitedi chiec shubiondabi.

³²“Bēdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bēdambo icmeshun abēdi tabadmendac. ³³Mibēd tabadec, Min piucquid bec cho, quesa niondabi. Adecbidi, Min dashcute bec cho, quesa niondabi. ³⁴Ēmbibi shubumpi naceneshun menequin piucquid bedshun con na bedondambi. Adembidi naceneshun bedshun ēbēd capuquido menebanondambi. ³⁵Adembidi chonoadshun aton na bedshun natiapimbocquid meneta, quequin mibitedi ismebanondambi. Nuquin Icbo Esuquidistu nidaidēn tabadec nadpanēdash: ‘Utsin natiapimbocsho menequid Nuquin Papan bēdambo iquebi camiaid nendac. Nabanenquio yec bedshumēnquidquio icsho Nuquin Papan bēdambo iquebi camenquio iquendac,’ —quequin Esuquidistun chiacpaden Epeso yacnocquido tsusiobo chuipondash Pabado.

³⁶Aden chiashic Pabado Nuquin Papa chuinuec utsibobēd danēshēn seabducuededash onquecuededpondash.

³⁷Aden Nuquin Papa chiec onqueshumbic nidtocuededshun

abitedishun Pabado chuiboad tantiaquin Pabado dayumbededquin shubi uabededpondash. ³⁸Ēbi padpiden mimbi isoainquio iquendac, Pabado quesheo tantiaish shubicuededpondash. Adece shubiquin dayumbudash unēsquio yec Epeso yacnocquido tsusiobo Pabadobēd cano yacno nidanepondash.

Edusaden yacno Pabado nidoaid

21 ¹Epeso yacnocquido tsusiobo acte cuēman tabadnubi cano antabēdtoanec Pabadobēd capuquido nidquimbi cuebi potiaish acte nēnantan nidaid nacenēdquid Cos caid yacno choapondash. Badiadnuc auēshquio puduanec nidec acte nēnantan nidaid nacenēdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash. ²Ambo choashic nidaid Penisia caid yacno cano dapa utsin nidnuequid istuidash antabēdtoanec Pabadobēd capuquido nidoapondash. ³Adece nidquimbi acte nēnantan nidaid nacenēdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bēaid icbo yacno buamepondash. ⁴Aden buan-buanubi Esuquidistu tantiaquido yacno nidanece puduedash 7tedec ushec Pabadobēd capuquido tabadpondash. Ambo tabadnubi, Edusaden yacno Pabado cuesunenuequid iquec, quequin Nuquin Papan Mayanēn tantiamiac aidon, Edusaden yacno nidenda, quequin Pabado chuipondash. ⁵Aden chiaqui cano icbo nidnuesho isash padpidece cano antabēdtoanec, Nidnu, quepondash Pabado. Aid nidnuesho isash Esuquidistu tantiaquido bēnēbēdi aton chido aton bacuēbo chedo Pabadobēd acte cuēmano choash

Nuquin Papa chiec onquecuededpondash. ⁶Adec Nuquin Papa chiec onqueshun, Nidec nid, cac Pabadobëd icquido cano antabëdtoanubien Tido yacnoësh acte cuëmano choboedo aton shubuno nidaneopondash.

⁷Adec cano antabëdtoanec auëshquio nidec shubu dadpen icquid Todemaida yacno choash Pabadobëd capuquido tabadtuidpondash. ⁸Adec anocquidobëd tabadec badiadash cano antabëdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niente meneta caid utsi 6tedibëd Uedipe icpondash. ⁹Aidën champibo 4tedi aton bënën bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

¹⁰Adec Uedipebëd yuec tabadnubi Nuquin Papan naden nanun chiaid chuiquid utsi Accabo cuëmëdquid nidaid Udeya yacnoësh chopondash.

¹¹Adec choshon Pabadon tsiute bedash tataniadash mëtaniadash Accabo nadpondash: —Nuquin Papan Mayanën naden ëbi chioshe. Tantiata. Chuinu. Ëmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buanshun, Unës uata, quequin isadaidpembo menendac —quepondash Accabo Pabado chiec.

¹²Aden Accabon chuisho tantiash shubiquin Pabadobëd choboedon Uedipen shubun icquidobëdtan, Edusaden yacno nidenda, quequin Pabado chuioapondash. ¹³Adoaquien: —¿Atotsi canuen shubiquin ëbi icsambo icme? Edusaden yacno nidshun Nuquin Icbo Esuquidistu chuibansho ëbi taneshun unës uatsiash, quequin tantiaquin abi Esuquidistu chuibanuna

—quepondash Pabado. ¹⁴Adoaquien, Nidenda, caqui niacbidanec, Edusaden yacno nidebi, queoapondash Pabado.

Adec, Nidebi, queshe tantiashun: —Ma Nuquin Icbo bunacpadec nidpanuna —capondash.

¹⁵Aden chiashic Sesadeya yacnoësh puduanec Edusaden yacno Pabadobëd capuquido nidoapondash. ¹⁶Adec nidsho isash Sesadeya yacnocquid Esuquidistu tantiaquid utsi-utsiec Pabadobëd nidquin Menason cuëmëdquidën shubu yacno buanac puduedpondash. Aid shubu icbo Chipide yacnoësh choash Edusaden yacno tabadquid Esuquidistu tantiabenquidbidi nepondash.

Pabadon Acobo isaid

¹⁷Adec Edusaden yacno choacsho Esuquidistu tantiaquidon Pabadobëd capuquidtedi Pabadobëdtabi yuedpondash. ¹⁸Aden yuedac tabadash badiadash Acobo isec nidoapondash. Acobobëd Esuquidistu tantiaquido tsusiobotedi icpondash. ¹⁹Adec nidec ambo puduedshun, Mibi isec chobi, quequin, Ëmbi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabadon chuipondash.

²⁰Aden chuibanac Nuquin Papan naid bëdambo iquec, quiaish Pabado caic nadpondash: —Nëmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. ²¹Adquidombo icquin, Min bacuëbon shui dëbid dëtemenda, quequin isadaidpembo Pabadon chiec, queshe tantiash, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. ²²Aden chiec tabadquin mibi nëmbo choaid tantiash mibi cuesunete buntsiash. Mibi cuesunete bumenquido

icmenuequin ¿Atotsi nuqui napeba?

²³Naden nac bēdambo ictsiashe. Tantia. Chuinu, Pabado. Nēmbo ēbēd icquido Nuquin Papauidi tantiec tabadnuequid daēd-daēdquiec iquec. ²⁴Nuquin Papan ēbi bēdamboen dayun uadenesho ismenu, quiaash nidaid Quedesia yacnoēsh, Ēbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacnenuquid piucquid menembi,” quepondac. Nēbimbobi Edusaden yacno mibi choaoc. Nēid dadatedibēd Nuquin Papa tabadte shubu uashunaid yacno nidshun mimbi ēnden chiondacted piucquid meniāc, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquio Pabado nec, quequin tantiatsiashe. ²⁵Ēmbi isadaidpembo Esuquidistu tantiaquid utsibo dada uaquin naden chuiōaombi: “Nuquin Papan, Naden nata, quequin chiaid dada uamiampid nēidtedictsēqui mimbi natequid nendac. Nēidic, Nuquin Papan uaidbimboecnuc nacnenaidd tantiaquidon pete sanaidd penda; adembidi, min chidouidtsēqui chudta; adembidi chidon min bēnēuidi chudmeta; adembidi, nēish cuesaid intacchobi codocaidd penda.” Aden dada uabanquin isadaidpembo chiombi —quepondash Acobo Pabado chiec.

²⁶Aden chiaquien badiadash Nuquin Papa tabadte shubu uashunaid yacno dada 4tedbēd choash Pabado, Nēidted dadabēdtambi ēmbi Nuquin Papan chiaacted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

Pabado bedaid

²⁷Adashic 7tedec ushquin naimbudnubi Pabado Nuquin Papa

tabadte shubu uashunaid yacno nidoaic puduedash capusho nidaidd Asia caidd yacnoēsh choquidon isadaidbon ispondash. Aden isash Pabado bedmete bunec, Isadaidbo utsibo nēishmenu, quec: ²⁸—Isadaidbodedishun tantiata. Nēidēmbi Nuquin Papa tabadte shubu uashunaidēn puduedtemaidd isadaidpembo yuedquin nēid shubu bēda icsa uameboed neque. Bednu. Uidēn uaic cho —quequin abimbo chiacbimboec onquecuededpondash. ²⁹Epeso yacnoēsh choquid isadaidpembo Tēdopimo Pabado bēd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

³⁰Aden chiac, Icsambocquid bednu, quianec titinquec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shēcuē bētashpondash. ³¹Aden Pabado buanec, Cuesunenu, quec cuēdcuededsho tantiashun chuitanac ³²abi chuiquidbēd sondado cho-chosho isun Pabado cuesbededquin isadaidbon ēmpondash.

³³Adec choshon sondado chuiquidēn bedtan cac Pabado bedshun shocosh bucun mētanemepondash. Aden mētanemiash: —¿Tsutsi nēid nepec? ¿Atotsi icsamboen naosh? —quepondash sondado chuiquid.

³⁴Adoquien iccuededquid utsi-utsitsēcquien chiec onquecuedednubi utsi-utsitsēcquien utsi uain chiec cuēdcuededpondash. Adec dadpen cuēdcuededsho: —Tantiatiapibi ye. Quēnēn nauedmenu. Buanec nid —quepondash sondado chuiquid sondado chiec. ³⁵Aden Pabado buanec nidec nauedte shubun dectatonobi cuēdcuededquidon tsucuscuededtsēcquien Pabado bednuesho isun Pabado abuc

cadoanquin sondadon buampondash.

³⁶Aden cadoanquin buansho isash cuëdcuededquido: —Aidien cuesunetiad —quepondash sondado chuiquid chiec.

**Ambi nabanaid iccuededquido
Pabadon chiaid**

³⁷Adec abi buanec shubun puduedtsenubi Pabado: —¿Ada ëbi onquesho tantiatsia? —quepondash Quidieco matsesën onqueten Pabado sondado chuiquid chiec.

Adoaquien: —¿Quidieco matsesën onqueten onquequidta mibi ne?

³⁸Chuiquid dapa icnuequin Equipito yacnocquid matses dadpen cuëte nibëdacno buanaccondaidien nechitec, queshun mibi bedombi. ³⁹Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

⁴⁰Adoaquien: —Ai, onqueta —capondash sondado chuiquidën.

Adoac abuc dectatoten nidtoash nidec, Otacquo tabad, quequin ismequin Pabadon mëdante uic-uiccapondash. Aden nasho isash isadaidbo otacquo tantiec tabadsho isash: —Ebedeyon, nuquin onqueten mibi chuinu —quec nadec Pabado onquedopondash:

22 ¹—Ëmbi naid mibitedi chiembique. Isadaidbo tsusiobobëdtan isadaidbo utsibon tantiata.

²Adec aton onqueten Pabado onquesho tantiash isadaidbo otacquo tantiec tabadpondash.

³Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquio tishaqui Edusaden yacno

choash canipondabi. Adec nëmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. ⁴Aden nabanquin Esuquidistu tantiaquido Nuquin Papan chiaid niacquido nec, quequin dadabëdta aton chido chedo bedmeshun mëyamequin quënën nauedmeshun unës uamepondambi. ⁵Ëmbi adobanquin naondaid tsusio dapatedishun tantiec. Adondash, quequin chuitiadquo icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmenu, quesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

⁶“Adash, ushë abuctoan Damasco caid anoentsëqui choshobi abucuësh shocosh tabote dapa bed-bedquiacbimboec chënquequin dëcatepondashi. ⁷Adec chënquequin dëcatiac nidaidën paëdshun nadec abucuësh onquesho tantiapondambi. ‘¿Atotsieshun ëbi mëyane, Saudo? Ëbi chui. Tantanu,’ capondashi.

⁸“Adoaquimbi: ‘¿Con Icbomboda mibi ne?’ capondac.

“Adoaquien: ‘Nasaded yacno iccondaid mimbi mëyanaid Esus nebi,’ capondashi.

⁹“Adnubic ëbëd icquidon shocosh bed-bedquiacbimboec chënquesho isequi con Icbon chuisho tantienquio yec tabadpondash.

¹⁰“Aden dëcatiac uequin ëmbentsëqui tantiec: ‘¿Atotsimbi nape, Ico?’ quepondabi.

“Adoaquien: ‘Nidtoash Damasco yacno niddan. Anoshon ëmbi nata quequin chiaid utsin mibi chiendac,’ capondashi Nuquin Icbon. ¹¹Adoaquini nidtoquin shocosh bed-bedquiabimboec chënquequidën bëshuacsho isun ëbëd icquidon mëdinanquin Damasco yacno buampondashi.

¹²“Adec Damasco yacno choash bëshuash ëbi tsadnubi Ananias cuëmëdquid ëbi isec chopondash. Aidi isadaidbon naden nata quequin chiaid naquidquio icsho isadaidbo utsibon bëdamboen isaidquio icpondash. ¹³Ëbi yacno choshon aidën: ‘Saudo, abuc is,’ cac cuedoquimbi Ananias ispondambi.

¹⁴“Adsho isash Ananias: ‘Nuquin tsusedpabon Papa cain cuënaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaid, Icsa Nibëdquid mibi ismendac. Aidën chuisho mimbi tantiendac. ¹⁵Aden aid isquin tantiashun utsi-utsien dadpen mimbi isaidbëdta mimbi tantiaid mimbi chuibenendac,’ quequin ¹⁶chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucpanuna. mibi paucacimboen utsibo ismenuen acten mentometa,’ capondashi Ananiasën.

¹⁷“Adoaqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacimboec tsadpondabi. ¹⁸Adec tsadquimbi Nuquin Icho ëbi chiec onquesho isnubi nadpondash: Mimbi ëbi chuibansho tantienquiocquid yec nëmbocquido mibi cuesunete buntsiashe. Edusaden yacnoësh badedquio niddan, quequin Nuquin Icbon chuipondashi.

¹⁹“Adoaquimbi: ‘Aidon isnubi mibi tantiaquid dadpen bedmeshun quënën

nauedmiondambi. Adembidi, aidon isoanubi mibi tantiaquid utsi-utsien comapenen mëyamiondambi. ²⁰Adembidi, mibi chuibanquid Esteban cuëmëdquid utsibon cuënoten se-sequin unës uanubi se-sequidon dashcute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesho tantiapondash. ¿Adondacshobi cuesunependabi iquec?’ quepondabi Nuquin Icho chiec.

²¹“Adoaquini Nuquin Icbon: ‘Isadaidpembo yacno mibi nidmembique. Niddan,’ capondash —quepondash Pabado ambi nabanaid iccuededquido chiec.

Pabado cuestasenaid

²²Pabadon ambi nabanaid chuibansho tantiec iccuededquido otacquo tabadboed, Isadaidpembo, quec Pabado onquesho tantiash: —Tantiatiapibi. Adec onquequid isadaidbo utsibëd tabadenquio ictiadquidi nec. Aid unës uata —quec cuëdcuededpondash iccuededquido.

²³Adec cuëdcuededec aton dashcute bëntsecquid canchepamboec dachiquidshun nidaid putu bedtanquin abuc secapondash Pabadon chuiboed tantiatemaid nec, quequin ismequin. ²⁴Adnubien, Cuesunenushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëid cuesunete bumpeba? Amba naid icsa chuimenuen comapenen paëmbocnoc cuesta, quequin sondado chuiquidën chuipondash.

²⁵Adoaquien cueste nidtsinacno Pabado buanshun cuestebëdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaidëshun tishaid icsho ëmbi naid chuimiabida ëbi cuese?

—quepondash Pabado sondado chuiquid chiec.

²⁶Adsho tantiash sondado chuiquid puduanec nidec abi chuiquid comandante caid yacno choash: —¿Atotsi natseno? Bëboed: “Domanobon nidaidëshshun tishaid nebi,” quiosh —quepondash sondado chuiquid comandante chiec.

²⁷Adoquien Pabado yacno nidshun comandanten: —¿Domanobon nidaidëshshun tishaidta mibi nepe? —capondash Pabado chuiquin.

Adoquien: —Ai, domanobon nidaidëshshun tishaidquio nebi —quepondash Pabado.

²⁸Adoquien: —Domanobon nidaidëshshun tishaidpenquo ëbi icsho, ¿ada adquid ëbi icmetsia? quequin piucquid meniondambi —quepondash comandante Pabado chiec.

Adoquien: —Con tan tishaid yec domanobo nebi —quepondash Pabado comandante chiec.

²⁹Aden Pabado chuisho tantiash ambi naid chuimenuen cuestsemboedo nidanepondash. Aden chuisho tantiash Domanobobi Pabado shocosh bucin mëtanemechitombi, quequin tantiec comandante dacuëdpondash.

Isadaidbo tsusiobo iccuededacno Pabado buanaid

³⁰Adshumbic, badiadshun ambi mëtanemeboed chimeshshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nëid cuesunete bumpeque? Tantiabono, quequin comandanten Pabado buameshshun isadaidbo dadpen iccuededacno puduedmeshun nënantanquo Pabado nidtomepondash.

23 ¹Aden nidtomiaquien isadaidbo tsusiouidi comapenen isec: —Utsibo, ëmbi naid chuibanu. Tantiata.

Nuquin Papan isnubi ambi naden nata quequin chiaid nabanquidquo icteniobi —quepondash Pabado.

²Aden chuisho tantiashun: —Muaquin chieque. Èccues —Isadaidbo tsusio dapan Ananiasën cac Pabado dayunquo icquidën Pabado èccuespondash.

³Aden èccuesaquien Pabado: —Mibi icsaid nibëdadbimboec mibibi tsadsho Nuquin Papan mibi èccuesmendac. Nuquin Papan naden nata quequin chiaid tantiambi, quequimbi ëbi èccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

⁴Aden Pabado chuisho tantiash aton dayunquiocquidquo: —¿Aden Nuquin Papan isadaidbo tsusio dapa icta caid chiasch dacuëdenquioda ique? —quepondash.

⁵Adoquien: —Èmbi chuiboed Nuquin Papan isadaidbo tsusio dapa icta caid nec, quequin tantiamboocombi. Aidi Nuquin Papan isadaidbo tsusio dapa icta caidquo icsho ëmbi chuibocpaden chienquo ictsenombi. Mimbi abimbo chioc. Èmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

⁶Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Èbibi padiseyobon tishmiaid nebi. Adquid yec, Unësash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ëbi mimbi chiec —quepondash Pabado iccuededquido caic. ⁷Aden Pabado chiaquien saduseyobo, Uinciente nibëdendac, quequin ëmbi tantiacpaden Pabado tantienquo iquec, quec comapenec

onquecuedednubi padiseyobo,
Uincuente iquendac, quequin ëmbi
tantiacpaden Pabado tantiec, quec
comapenec onquecuededpondash.

⁸Unësash uincuentequid nibëdec, quec
saduseyobo. Adecbidi, Nuquin Papan
uaid mayan bëdabëd ambi uaid utsi
mayan nibëdec, queoaic saduseyobo.
Padiseyobo, Uincuentequid iquec,
quec. Adecbidi Nuquin Papan uaid
mayan bëda, ambi uaid utsi mayambidi
iquec, queoaic.

⁹Aden ambi tantiacpaden chuibanec
comapenec onquec saduseyobobëd
padiseyobo natiambo
cuëdcuededpondash. Adec onquec
cuëdcuedednubi padiseyobo, Nëid dada
bëdambocquid nec. ¿Mayanën chioshi,
queshodambi muez nec capadi?
Adecbidi, ¿Nuquin Papan uaid mayan
bëdan chioshi, queshodambi muez nec
caoapadi? Padenquo iquembi. Pabado
chuiboed abimbo iquec, quepondash
padiseyobo saduseyobo caic. ¹⁰Adec
comapenec onquec natiambo
chushcanansho tantiashun comandanten:
—Podon shoyonquin canite dëchicnushe
queshun mënchicshun shubu nuntan
bëoata —cac sondadon Pabado
mënchicpondash.

¹¹Aden mënchicshun shubu nuntan
sondadon yuedaquien Pabado ushash
badiadash padpidec inchëshën Pabado
ushnubi Nuquin Icbo chopondash:
—Mimbi Edusaden yacnoshon ëbi
chuibanacpaden shubu dadpen icquid
Doma caid yacnoshontsen mibi
chuibamembique. Dacuëdenquo yec
dayacquio icta —capondash Nuquin
Icbon Pabado chuiquin.

Pabado cuesunenu quequin ompoquin cainaid

^{12,13}Adec Pabadobëd Nuquin Icbo
onquebombien badiadash isadaidbo

40ted Pabado cuesuniabi icquin buna
mëmunembi, quequin abimbo chiembi,
quepondash. ¹⁴Aden nanu quias
isadaidbo tsusiobo yacno nidash:
—Pabado cuesuniabi icquin buna
mëmunembi, quequin muenquiocquin
chuibanombi. ¹⁵Ëbitedishun ompoquin
Pabado cuesunenuequin cainubien
mimbi comandante chuitanta caid
naden chuimeta: Pabado naid
bëdamboen tantianuna. ¿Ada padpiden
isadaidbo tsusiobo iccuededte shubuno
bëmeoatsia? quequin chuitan Pabado
bëmeoatsiashe. Aden Pabado sondadon
bësho Pabado cuesunenuna
—quepondash Pabado cuesunenuequido
isadaidbo tsusiobo caic.

¹⁶Aden aidon chuishobien Pabado
piaquën tantiashun Pabado yacno
nidshun chuioapondash aton piaquën.

¹⁷Adoquien Pabado sondado 100ted
chuiquid cho, cata cac nidshun aton
piaquën chiac Pabado yacno sondado
chuiquid chopondash. Adec chosho isun:
—Nëid con piac nec. Aidi comandante
chuite buneque. Aid yacno buanta
—Pabado cac ¹⁸buampondash.

Aden Pabado piac comandante
yacno buanash sondado 100ted
chuiquid: —Quënën nauedboed Pabado
cuëmëdquidën ëbi chomeshun: “Con
piac comandante chuite buneque. Aid
yacno buanta,” cac bëombi
—quepondash sondado 100ted chuiquid
comandante chiec.

¹⁹Aden chiaquien Pabado piac
mëdianquin uidictsëc buanash
comandante: —¿Atotsi ëbi chuinuec
cho? —quepondash comandante.

²⁰Adoquien Pabado piac:
—Badiadshun isadaidbon ambi namiaid
mibi yacno chomec. Aden chomiac
nëmbo choshon naden chiec: “¿Ada
isadaidbo tsusiobo iccuededte shubuno
Pabado mimbi bëoapatsia? Aidën naid

chuibansho bēdamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid. ²¹Isadaidbon muaquin chiendac. Con cu Pabado buamenuen mibi aden chiendac. Comandanten Pabado bēmetsiash, quequin tantiaquin Pabado con cu cuesunenuequin caineque. Nidmenda. Con cu cuesunenuequid: “Pabado cuesuniabi icquin buna mēmunembi,” quiosh. Con cu cuesunenuen nēbimbobi podqued cuēmanshun ompodshon cainec —quepondash Pabodon piac comandante chiec.

²²Adoquien comandanten:

—Isadaidbon chiaid mimbi chuiboed utsi chienquo yec nidec nid —capondash Pabodon piac chuiquin.

²³Aden Pabodon piac nidmeshun sondado 100ted icquido chuiquid daēd chomias comandante nadpondash: —Ēnden inchēshan Sesadeya yacno ma mibēdi mimbi namiaid sondado 200ted nidnu mitsana buanuequin nacentata. Adomboembidi, cabayo catsadquid 70ted icquido chuiquin nacentata, quequin chuiioata. Adomboembidi shocosh sianten senuequin sananquid 200ted icquido chuiquin mitsana nacentata, quequin chuiioata.

²⁴Adembidi Pabodobēd icquido cobednadod Pediques yacno buanun cabayo nacentata —capondash comandanten sondado 100ted chuiquid daēd chuiquin.

²⁵Aden chuishumbic naden comandanten dada uapondash Pediques cobednadod caid chuiquin:

²⁶“Quēdaudio Disias nebi. Chuiquid dapa cobednadod caid, Pediques, mibi bēdambocquid icsho chuinu. Pabado ěmbi bedboed mibi yacno buamenuen dada uaimbique. Ēmbi dada uaid isec onqueta. ²⁷Nadquido iccoshe. Tantia.

Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiapaden tantiashun sondado dadpembēd choquin mēnchiccombi. ²⁸Aden

mēnchicshumbic, ĩAtotsieshun Pabado cuesunete bumpec? quequin tantianuen isadaidbo tsusiobo iccuededacno Pabado buamiombi. ²⁹Ambo

buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado

nec, quequin isadaidbo tsusiobon chuiposh. Adembidi, ambi nabanaid Pabodon chuisho tantiashun quēnēn nauedenquioctiadquidi

nauedmepondash, quequin tantiashumbi quēnēn nauedmeopombi.

³⁰Aden Pabado quēnēn

nauedmeoashumbic, Podqued cuēmanshun Pabado cuesunenuequin isadaidbon cainec, qesho tantiashun badedquio mibi yacno buamiombi.

Adembidi, Pabado icsambocquid nec, quequin aid cuesunenuequido mibi yacno nidmembi. Adoac ma ambibi Pabodon naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: —Pabodobēdta nēid cobednadod Pediques menenuen buanta —capondash comandanten.

³¹Aden comandanten dada uashun meniac aidēn chiapaden Pabado buanec sondado aid inchēshēmbi shubu dadpen icquid Antipatidis caid yacno chopondash. ³²Ambo choash

badiadshun sondado cabayo catsadquidonuidquio Pabado buanec nidnubi sondado utsitedi aubidi

nidaneoapondash. ³³Adec Pabado buanec nidequi Sesadeya yacno choshon abi chuiquid comandanten

Quēdaudio Disiasēn dada uaidbēdta Pabado Pediques menepondash cabayo

catsadquidon. ³⁴Aden meniaquien dada uaid isbanash: —¿Mitsicquid nidaidën icquid mibi ne? —capondash Pediquesën Pabado chuimenuen.

Adoaquien Pabado: —Nidaid Sidisia caid yacnoshon tishaid nebi —quepondash.

³⁵Adoaquien: —Mibi icsambocquid nec, quequin chuiquido isadaidbo choacsho mimbi nabanaid chuimembi —quepondash Pediques Pabado chiec. Aden chiec onqueshumbic ënden chuiquid dapa Edodes cuëmëdquidën, utsibo abi chushquiaid chuimiondaid shubuno Pediquesën buamiac ashunquio Pabado nauedsho isun: —Puduenanec cuenushe ista —capondash sondado chuiquin.

**Pediquesën tantianubi
Pabadon ambi naid chiaid**

24 ¹Adashic, 5tedec ushash isadaidbo tsusio dapa Ananiasbëd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tedtudo cuëmëdquid bëquin. ²Aido chosho isun Pediquesën Pabado chomiacsho isun isadaidbo tsusiobon tantiacpaden chuinuequidën Tedtuton naden Pediques chuipondash: —Mibi chuinu. Tanti. Chuiquid bëdambocquid icquin mimbi bëdamboen nabanac isadaidbo bëdamboec tabadec. ³Mimbi aden nabansho isun, Bëdambocquid mibi nec, quequin mibi chiembi. ⁴Aden chuishun mibi chieshmenquiocnuequin isadaidbon chushcaboed badedquo chuinu. Tantiata.

⁵“Nëid mimbi bëmeboed Pabado caidbëd ictiapimbo iquebi. Nëid Nasaded yacno iccondaïd tantiaquido tsusio nec. Aidëmbi nidaïdtedi yacno nidshun ambi tantiaïd chuibanquin

isadaidbo comapenen chushcamequin cuëdcuededmiac cuëshëd-cuëshëdposh.

⁶Aidëmbi Nuquin Papa tabadte shubu uashunaidën puduedtemaid mattses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi. ⁷Aden cuidnu quenubien comandante Disias cuëmëdquid choshon Pabado mënichanquin buamposh. ⁸Pabadon ambi naid chuisho mimbibì tantiashun, Isadaidbo tsusiobon abimbo chiosh. Icsambocquid nec, quequin mimbi chuiopatsiac —quepondash isadaidbo tsusiobon tantiacpaden chuinuequid Pabado icsambocquid nec, Pediques camenuc.

⁹Aden Tedtuton chuiquin nainan isadaidbotedi, Ai, Tedtuton chiacpadec iccosh, quequin chuibededpondash.

¹⁰Adsho tantiashun, Onqueta, quequin mëdante uiccaquin Pediquesën ismiac Pabado nadec onquepondash:

—Chuiquid dapan tantiata. Ëmbitsen chuinu. Dadpen seta matamequin con mattses isadaidbo abi chushquiaid tantiashun mimbi bëdamboen tantiacpaden namedenioc. Adquid mibi nec, quequin tantiaquin, Ëmbi naid chuibanec bëdambo iquebi, quec dacuëdenquo yec onquebique. Tantiata.

¹¹Edusaden yacno choash ambobi 12tedec ushobi. Ëbì anoshon isboedon, Abimbo iquec, quequin nëmbo choshon mibi chuitsiash. Edusaden yacno choash Nuquin Papa shubu uashunaidën puduedec Nuquin Papa tantianuec choapobi. ¹²Ambo puduedash utsibëd chushcananenquo yec tabadsho istuidash, Icsambocquid nec, queposh. Adembidi chuibanquin utsibo nëishmequin chushcamenquo iccombi. Pabado icsambocquid nec, quequido Pabadon chiaïd abimbo iquec, quetiadquidi nec. ¹³Ëmbi naid Tedtuton

chuibamboed, Abimbo iquec,
quetiapimbo iquec tsusiobo.

¹⁴Nëiduidtsëqui abimbo iqueque.

Chuinu. Tantia. Nuquin tsusedpabo
chuimiapaden Nuquin Papan chomiaid
tantiesa isadaidbo tsusiobo icnubi aid
tantiaquid nebi. Adembidi Nuquin
Papan naden nata quequin chiaid dada
uamiampid tantiaquin nabanquidquo
nebi. ¹⁵Adembidi, matses unësacsho
Nuquin Papan uincuemiac abi
tantiaquid abëdi tabadnubi abi tantiesa
chian anëdënquequid nësecaindac,
quequin tantiembi isadaidbo tsusiobon
tantiacpadembi. ¹⁶Aden tantiaquin
Nuquin Papan, Bëdamboen mimbi naoc,
capashuni, quequin bëdamboen nabanec
tabadec nebi. Adembidi,
matsestedishun, Bëdamboen mimbi
naoc, capashuni, quequin
adomboembidi bëdamboen nabanec
tabadec nebi.

¹⁷“Adequi nidaid utsi-utsiec yacno
capucuenec tabadcuenequin, Edusaden
yacnocquid isadaidbo bunec tabadec,
quesho tantiash piucquid menenuec
choapobi. Adembidi, Nuquin Papan
bëdamboen dayun uabenioshi, quequin
piucquid menenuec choapobi. ¹⁸Aden
menenuec abi tabadte shubu
uashunaidën puduedash ëbentsëqui
capusho ëbi chushcaboedon istuidposhi.
Bëdamboec tabadsho istuidposhi. ¹⁹Ëbi
capusho istuidquido isadaidbo nidaid
Asia caid yacnoësh choquido niosh.
Aido, Pabado icsamboec tabadsho
isombi, quepac caosh. Abi chiaid
abimbo icnuc nëshuntsen
adomboembidi chuitiadquidi nec.

²⁰Adembidi isadaidbo tsusiobon:
‘Padiseyobo yec bëdambocquid nec,’
quequin ëbi anoshon chiacpadembidi
nëshuntsen adomboembidi
chuiotiadquidi nechitec. ²¹Anoshon
nëiduidtsëqui chiec comapenec cuëdobi:

‘Unësash uincuentequid iquec,’ quequin
chuisho tantiashun, Icsambocquid nec,
quequin isadaidbo tsusiobon ëbi mibi
chiec caimbi —quepondash Pabado
Pediques chiec.

²²Aden Pabado chuisho tantiash
Pediques tantiauidquid iquec: —Nëbi
mimbi aidedtquio chuibansho
tantiembi. Comandante Disias nëmbo
choan mibi padpiden chuimembi
—quepondash Pediques Pabado chiec.

²³Aden chuishumbic naden Pediquesën
sondado chuipondash: —Shubuno
Pabado buanshun puduednushe
queshun ista. Abi menenuquid abi
isnuequid chedo chosho isun yuedta
—quepondash Pediques ambi Pabado
ista caid chiec.

²⁴Adashic, daëdpactsëc ushash
Pediquesbëd aton chido, Dusidia
cuëmëdquid chopondash. Aton chido
isadaidbo icpondash. Adec aton
chidobëdi choshon abi yacno
Pediquesën bëmiacsho ambi tantiaid
Esuquidistu Pabado chuibanac
Pediquesën tantiauidpondash. ²⁵Aden
chuibanquin Pediques Pabado
nadopondash: Utsin abi utsibëd
chushcananaid chuibanacsho Nuquin
Papan chiacpaden aido nametiad,
quequin chuipondash. Adembidi,
Icsamane quequin Nuquin Papan
chiacpadenuidi nabanta, quequin
Pediques chuioapondash Pabado.
Adembidi, Esuquidistu tantienquo icsho
chian anëdënquequid Nuquin Papan
nësecanushe quequin Esuquidistu
tantiata, quequin Pabado
chuioapondash. Aden Pabado chuisho
tantiash: —Padi. Ëmbi naid nibëdsho
isun padpiden chuimenuen mibi
bëmeoaimbique. Nëbi nidec nid —cac
Pabado nidpondash. ²⁶Adshumbic,
adembidi abi yacno Pabado Pediquesën
bëmeded-bëmededpondash. Nidtiadquio

icquin piucquid Pabadoñ ãbi menetsiash, quequin tantiaquin Pabado bãmiash aidbãd Pediques onquepondash.

²⁷Adashic, seta daẽd matamiash Podsio Pesto cuẽmẽdquid cobednadod yampondash. Aidi cobednadod yanuc nidnuequin, Nidta, cainquiocquin Pediquesẽn Pabado shubu nuntan niampondash naden tantiaquin: Pabado shubun nauedshun ãmbi niansho isash, Bẽdamboquid nec, quequin isadaidbon ãbi cain chuibededpec, quequin Pediquesẽn Pabado shubun nauedshun niampondash.

Pabadoñ ambi naid Peston chuimiai

25 ¹Pesto cobednadod yanash Sesadeya yacno choash 3tedec ushanec Edusaden yacno nidpondash.

²Adec Pesto Edusaden yacno choash tabadsho isadaidbo tsusiobo, Pabado chushcaquido: ³—¿Bẽbitedi bẽdambo icmenuequin Pabado Edusaden yacno ada bãmeoatsia? —quepondash Pesto chiec. Pabado bẽsho cuesunenuequidon cainshun cuesunepec, quequin tantiaquin isadaidbo tsusiobon aden Pesto chuipondash.

⁴Aden chuisho tantiash Pesto: —Sesadeya yacnoshon nauedaid Pabado iquec. Ambo nidebi. ⁵Pabadoñ icsamboen naosh, quec utsi-utsiec ãbẽdi nidshun anoshon Pabadoñ naid icsa ãbi chuita —quepondash isadaidbo tsusiobo caic.

⁶Adashic, 10tedec ushash Edusaden yacnoẽsh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoshon Peston Pabado bãmepondash isadaidbo tabadnubi.

⁷Aden bãmiacsho isash Pabado dẽcatec isadaidbo Edusaden yacnoẽsh choboedo Pabadoñ naid chiec abimbo chiacbimboec onquecuededpondash.

⁸Aden isadaidbon chiaquien: —Bẽmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobẽd puduedambocobi. Adembidi, empedadod Doma yacno tabadquid, Sesad cuẽmẽdquidẽn chiaid niacamboccombi —quepondash Pabado.

⁹Adoquien: —¿Edusaden yacno buanac anoshon adomboembidida isadaidbo tsusiobo chuioatsia? —quepondash Pesto Pabado chiec. ¿Edusaden yacno Pabado ada bãmeoatsia? quequin isadaidbon chiacpaden nanuec Pesto adpondash.

¹⁰Adoquien Pabado: —Domanobo ancaquidẽn empedadod caidẽn, Sesad cuẽmẽdquidẽn, Mibi yacnocquido bẽdamboen tabadmequid icta, caid icquin mimbimbo chushcananquid bẽdamboen tabadmeta. Isadaidbo icsamboen tantiaquin nainquioccombi. Abimbo Pabadoñ chiec, quequin mimbi tantiec.

¹¹Icsambocquidquio iquec Pabado unẽsh uame, qesho tantiash, Adoanenda, quenquioctsiabi. Isadaidbon abimbo chiacbimboen chuisho tantiash, Pabado buanshun cuidta, quetiapimbo mibi iquec. Isadaidbo yacno buanta, mibi quenuc, Empedadod ãmbi naid chuite bunebi, quequin dada uaindami —quepondash Pabado Pesto chiec.

¹²Aden Pabadoñ chuisho tantiash Pesto udictsẽc nidash abipadquidbẽd onquiash choash: —Sesad ãmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

¿Atotsimbi Pabadoñ napatsia? quequin Peston Aquidipa caid

¹³Adashic daẽdpectsẽc ushash ancanquid utsi Aquidipa cuẽmẽdquidbẽd aton chuchu Bedenise cuẽmẽdquid Pesto isedec chopondash. Sesadeya

yacnocquido cobednadod Pesto yanosh, quequin chiac aid isec chopondash.

¹⁴Adec isedec choash dadpen ushec tabadsho isash Pabado chiec Pesto nadpondash: —Pediquesën quënën nauedmiaid Pabado cuëmëdquid chuinu. Tantiata. Aidi abi iquec shubu nuntan.

¹⁵Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

¹⁶“Adoaquien, Mibi abëdi chushquiaid Pabadontsen chiambocon unës uata quetiapimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi. ¹⁷Aden chiac nëmbo choshon abi chushquiaid aidon chuisho tantiec tsadnuen Pabado bëmioni.

¹⁸Aden Pabado bëmiascho ëmbi tantiacpaden abi chushcaquidon Pabaton naid chienquiocposh. ¹⁹Ëmbi tantiaidpenquio Esuquidistu unësash uincuenaid Pabaton tantiaid icsambo iquec, quequin chuiposhi isadaidbo tsusiobon. ²⁰Aden ambi tantiaidquio bëdamboen tantienquio yec nadpobi Pabado caic. Min matsesën naden nata quequin chiaid tantienquio iquembique. Edusaden yacno buamiac mimbi naid anoshon chiac bëdambo ictsiash, quequin chiombi. ²¹Adoaquien: ‘Empedadod, Sesad yacno nidshun ëmbi naid chuitiadquio iquebi,’ queposh Pabado. Aden chiac quënë yacnoshon aid puduedmetiapimbo iccobi. Nëmbobi Pabado quënën tabadec —quepondash Pesto Pabado chiec Aquidipa tantiamenuequin.

²²Adoaquien Aquidipa: —Ëbi aidën chuibansho tantiate bunebi —quepondash.

Adoaquien Pesto: —Badiadshun aidëmbi chuisho mimbi tantiendac —quepondash.

Aquidipa ambi naid Pabaton chiaid

²³Aden Peston chiaquien badiadash bëdaidquio dasiuidash Aquidipabëd aton chuchu choash iccuededte quënën puduedash sondado chuiquido chuiquid utsibobëd aid daëdi tabadpondash. Aido tabadsho isun Peston Pabado bëmepondash. ²⁴Bëmiac Pabado nënantanquio nidtonobi Pesto nadpondash: —Ancanquid Aquidipan mibëd iccuededquidon ëmbi bëmehoed mibitedishun isec. Aidi chuinu. Tantiata. Isadaidbon, Nëid dada icsambocquid neque. Unës uame, quequin chioshi. Ëbi Edusaden yacno choacsho isun adoposh. Adomboembidi nëshun Sesadeya yacnoshontsen aidombidi chuioaposhi. ²⁵Aden chuisho tantiasun nëid ambi naid chuimeoapombi. Aden Pabaton chiaidtsen tantiasun, Nëid unës uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabaton chuiposhi. Adoac Doma yacno aidi buamenuna. ²⁶Aden buamenuen ÷atotsimbi dada uaquin empedadod chuiplatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiasun, Naden dada uata, mimbi cac dada uatsiambi. ²⁷Ambi icsamboen naid nibëdnuc Doma yacno buametiapimbo iquebi —quepondash Pesto ancanquid Aquidipabëd iccuededquido chiec.

26 ¹Aden Peston chiaquien: —Mibibi onquequin mimbi naid chui. Tantienu —quepondash Aquidipa Pabado caic.

²Adoaquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid

chuiбанec бѣdambo iquebi. ³Isadaidbon naden nata quequin chiaidbēdta abi onquiaid mimbi tantiec. Aden tantiaquid mibi icscho ėmби nabanaid ėmби chuibansho tantiata. Chuinu.

⁴“Ėbi tishondacnoēsh canidosho con matsesēn isadaidbon istenepondashi. Nēbi caniquid iquec Edusaden yacno choash tabadsho adembidi aidon istenepondashi. ⁵Ėbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquidi nec. ⁶Unēsash uincuente iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ėbi icscho isash, Icsambocquid nec, quec isadaidbo. ⁷Nuquin tsusedpa Acobo isadaid caidēn madobon tsyuecquidon, Unēsacsho Nuquin Papan uincuemete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon. ⁸Nuquin Papan nadatiambocquín uincuemete chiaid mimbi tantienquo icpe.

⁹“Ėnden ėmbitsen tantiauidquin shubu dadpen icquid Nasaded yacno ictened, Esus cuēmēdquid tantiaquid icsambocquid nec, quequin unēs uamembi, qeshun adobampondambi. ¹⁰Edusaden yacnoshon adquid dadpen mēyamepondambi. Isadaidbo tsusiobon, Adota, cac ėmbibi Esus tantiaquid bēdambocquid icscho bedshun quēnēn nauedmepondambi. Unēs uanu, qesho tantiash, Ai, unēs uatiadquo iqueque. Adota, quepondabi. ¹¹Nuquin Papan chiaid chuibante shubu utsi-utsiec yacno nidted-nidtedondabi aido mēyamenuec. Esus, Nuquin Papan madopenquo nec, aido camenuen mēyamepondambi. Adembidi nidaid utsi yacnoshontsen adquid istuidshun mēyameoapondambi.

¹²“Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. ¹³Adec nidquimbi ushē cuembo yanec ushē comapenec chēnquequidēn ėbēd icquidobēdta ėbi dēcatesho isondambi. Abimbo iquec, quequin mibi chuinu. Ancanquid dapan tantiata. ¹⁴Aidēn dēcatiac ėbitedi nidaidēn uebudcuedondabi. Adec uequimbi con matsesēn onqueten ebedeyon onqueten abucuēsh onquesho naden tantiondambi: Saudo, ¿atotsieshun ėbi tantiaquido mimbi mēyampe? Ėbitsen mēyantiadpambocquin mimbi aido mēyanec, quec onquequin chiondashi.

¹⁵“Adoaquimbi: ‘¿Tsutsi mibi ne, Icbo?’ caondac.

“Adoaquien, Mimbi mēyanaid Esus nebi. ¹⁶Ėmби namiaid mibi icmenuc chobi. Esus isombi, quequin ¿ėbi chuibeneta caid nēbi mibi yanec? Ėbi chuibenequin mimbi isaidbēdta ėmби yuecshun ismetequid chuibeneta. ¹⁷Aden ėbi chuisho mibi cuesunete bunquid isadaidbobēd Isadaidpembo icscho mibi mēnchiquendambi. Adquid chuibanta, quequin mibi nidmembi. ¹⁸Aden chuibанac utsin-utsinquien pashuacbimboecboedēmbi tantiendac. Icsambocquid nebi, quequin tantienquiocboedi, Icsaobique. Ėbi pauc, Papa, quependac adquid. Mayan icsan yua icboedi Nuquin Papan bacuē iquendac. Adquid yanash abi icsaid paucac Nuquin Papan bēdambo icmiaid ėbi tantiaquid utsibēd iquendac, quequin Esusēn chuipondashi.

¹⁹“Aid abucuēsh onquesho tantiashun chieshenquiocquin chuibeniombi caimbi, mibi chuiquin Aquidipa.

²⁰Damasco yacnoshomba chuibanondambi. Anoshomba chuibanshumbic Edusaden

yacnoshontsen chuibanooaondambi.
 Anoshon chuibanshumbic nidaid Udeya
 caid shubu utsi-utsiec yacnoshontsen
 chuibanondambi. Isadaidboba
 chuibanombi. Isadaidpembotsen
 chuibanombi. Mibi icsaid ënquin
 Nuquin Papa abimbo tantiaquin ambi
 chiacpaden nabanta, quequin chiombi.
²¹Aden chuibanquid yec Nuquin Papa
 tabadte shubu uashunaid yacno
 puduedash capusho isun isadaidbon
 bedshun cuesunetsenoshi. ²²Padnuen
 ëbi dayun uaquid Nuquin Papa icquin
 isadaidbon cuesunenushe queshun
 cudasëmposhi. Adoac nëid ushënquo
 mibëdtabi mimbi namiaido mibi
 chuibanec nebi, ancanquid Aquidipa.
 Moisesën, Nadquo iquendac, quequin
 dada uampicpaden chuiquid nebi.
 Nuquin Papan chuimiaid utsibon,
 Nadquo iquendac, quequin
 chiampicpaden chuiquidbidi nebi.
 Aidon chuiampid nadquo iqueque.
 Tantia. ²³Nuquin Papan Chomiaid,
 Quidistu, mëyanac unësash uincuenaid
 yec ëbi tantiaquid ëbëdi tabadendac,
 quequin aton matsesbëdta
 isadaidpembo Quidistun chiendac,
 quequin chiampicpadec chopanëdash
 —quepondash Pabado iccuededquido
 chiec.

²⁴Adec Pabado onquesho tantiasch:
 —Min tantiate icsabudash mibi onquec.
 Mimbi tantiaid dadpen iquec
 tantienquo yec onquechitequien mibi
 nec —quepondash Pesto Pabado caic.

²⁵Adoquien Pabodon: —Bëdamboen
 tantiec onquebi. Ëmbi chiaid abimbo
 iquec, caimbi mibi ancaquid Pesto.

²⁶Ancanquid Aquidipan ëmbi
 chuibamboed abimbo iquec quequin
 tantiec. Aden aidën tantiascho
 dacuëdenquiocquin aid chiembi. Ëmbi
 chuibamboed ompoenquiocquin
 isquidon chuisho aidëmbi

tantiapondash. ²⁷Nuquin Papan ambi
 naden nanun chiaid dada uamiampidon
 chiaid chuisho mimbi tantioc
 —capondash Pabodon Aquidipa
 chuiquin.

²⁸Adoquien Aquidipa: —ËMimbi
 chuiboedtedtsëqui tantiashtabi
 Esuquidistu tantiaquid yampe?
 —quepondash Aquidipa Pabado chiec.

²⁹Adoquien Pabado: —Esuquidistu
 tantiaquid ëbipadquid mibëd
 iccuededquidtedibi Nuquin Papan
 icmepashun. Nëid ushënquo
 daëdpactsëc chiombi. Aidedtsëqui
 chiac tantiatiapimbocsho isun yuen
 chuibantsiambi ma Esuquidistu
 tantiaquid mibitedi yanueshun.
 Padnuen ma mëtaniaid ëbipadquid ma
 mibitedi iquenquiocpanuna
 —quepondash Pabado.

³⁰Aden Pabodon chuibanaquien
 ancanquid Aquidipa nidtopondash.
 Nidtocho isash Pestobëd Bedenise
 iccuededquid utsibo chedo
 nidtocuededpondash. ³¹Adec
 nidtocuededash puduenash
 onquecuededec: —Chuibamboed
 icsamboen nainquioccosh.
 Adoenquiocsho unës uainquioctiad.
 Adembidi ënden quënën
 nauedenquiocpatecnëdan —quepondash
 ancanquido.

³²Aden chiash: —Empedadod chuite
 bunebi Pabado quiambocsho quënën
 nauedacnoshon aid mimbi
 nidmetsenosh —quepondash Aquidipa
 Pesto chiec.

Doma yacno Pabado buanaid

27 ¹Adashic, Nëbi mëtaniaido
 nidaid Itadia caid yacno buanac
 bëdambo iqueque. Pabadobëdta
 mëtaniaid utsibo buanta, quequin
 sondado 100ted chuiquid Peston
 chuipondash. Aid sondado 100ted

chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100tedbëdi abi chuiquid abibi cuëmëdpondash. ²Aden buanta cac Pabadobëdta utsibo bedshun acte cuëmmano buanshun cano dapa Adadamitio cain cuënaid istuidpondash. Aid cano dapa istuidashien, Ico, nidaid Asia caid cuëman shubu dadpen icquid utsi-utsiec yacno nidtuidëbi, quequin chuisho tantiasch Pabadobëd antabëdtopondabi. Adec antabëdtosho isash puduampondash. Pabadobëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

³Adec cano antabëdtoanec nidquin shubu dadpen icquid Sidon caid yacno buampondash. Ambo choash, Mitsana nibëdeque. Mibi yuedquid yacno nid. Aidon mibi menetsiasch, quequin Pabado bëdamboen tantiaquin sondado chuiquidën, Udion, chuipondash.

⁴Adshumbic Sidon caid yacnoësh puduanec nidquin potesho cunquequidën bëquedtuicac ushë choacmi cuenadtanquin acte nënantan nidaid nactëdquid Chipide caid datampondash. ⁵Adembi nidaid Sidisia caid ëquë datanash nidaid Pampidia caid ëquëtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. ⁶Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dadpen icquid Adecandedia caid yacnoësh choboedi nidaid Itadia caid yacno buanu caid istuidpondash. Aden aid istuidshun Pabadobëd icquido aid canontsen antabëdtomepondash. ⁷Adec Mida yacnoësh puduanash nidquin

potec dadpen ushacsho cunquequidën cano bëquedtuicac pondash. Aden bëquedac bëdiactësëc nidquimbi shubu dadpen icquid Nido caid ëquëbitsen datambidanec acte nënantan nidaid nactëdquid Quideta caid yacno buanoapondash. Uquë cuëma utsiuc Sadmon caid icpondash. ⁸Ushë choacmi Quideta yauc cuenadtanec choquin shubu dadpen icquid Buenos Puestos caid yacno buampondash. Udictësëc shubu dadpen icquid Dasia caid iccondash.

⁹Cunquequidën bëquedac yuenquio potiactanetsëcquien buampondash. Comapenec cunquequidën nuqui bëquedendac, quequin tantiaquin Pabadon nadopondash: ¹⁰—Chuinu. Tantiata. Nëuëshquio puduanquin potesho cunquequid dapan bëquedshun cano chic-chictsiash. Acten mentoadmane quequin potenquio iquembi, quequin chuita —capondash Pabadon sondado chuiquid chuiquin.

¹¹Aden Pabadon chiaqui sondado chuiquidën niacbidanquin cano icbobëditan cano nidmequidën nidnu quequin chiaid tantiapondash.

¹²Cunquequid dapa cunquenubi Buenos Puestos yacno tabadec iquen uanquid dapanquio nuqui iquenendac, quiasch shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

Acte dapa potesho cunquequid dapanquio cano bëquedte

¹³Nuqui iquenendac, quequin tantiaquin bëdiactësëc cunquesho isun abi bunacpaden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash. ¹⁴Adec nidequi udictësëc

yanshobi ushë cho-choaid
 ëquëctscshun Quideta caid nidaid
 mananucuësh cunquequid dapa choquin
 bëquedtuïdquin ¹⁵icbon cano
 nidmetiapimbocnobi cano
 buampondash. ¹⁶Aden cunquequidën
 buanaqui acte nënantan nidaid
 nacdëdquid utsimpi Quëdauda caid
 ëquëbictsc cuenadquimbi canompi
 cano dapan nëshun buanaid buanushe
 qeshun anandopondash. ¹⁷Aden
 canompi anandoshon cano dapa
 canchednushe qeshun uidën uaquin
 datanebanshumbic cano buante
 dashcute abi dectante cuestebëdtabi
 imbudshun dashcute chicacsho
 cunquequidën cano comapenen
 buampondash. ¹⁸Aden cano cunquequid
 dapan buanubi badiadnuc acte
 natiambo tēcōasquesho isun ambi
 ansandoshon bëboed acte nësiapondash.
¹⁹Adshumbic 3tedec ushun bucu
 dënëshun cano dashcute indotetedi
 nësiaopondash. ²⁰Aden nësecanec
 nidquimbi inchëshën ushëbëdta uispa
 abu chëshën bëtinacsho isenquio
 iccondambi. Adembidi badiadën ushë
 isenquio iccondambi. Dadpen ushquin
 aidtedi isenquioccondambi. Aidted
 isenquiocnobi acte comapenen
 tēcōascapondash. Ad icsho isash,
 Bënudchitequien nuqui iquec,
 abitedimbo quecuededpondash.
²¹Adequi nuqui iquec, qeshun buna
 mëmumbededequi abitedi
 nidanepondabi. Adec canon nidnubi
 Pabado nidtoash nadpondash:
 —Chuinu. Tantiata. Quideta caid
 yacnoësh puduanenda caombi. Adsho
 tantiaboshi tantienquio yec mibi
 puduampoc. Ëmbi chiapaden nabanuc
 mimbi ansandoaidtedi abi ictsiandac.
 Adecbidi, Unësebi, quenquio nuqui
 ictsiandac. ²²Padnuen acte
 tēcōasquenubi nuquitedi unëshenquio

iqueque. Dacuëdenquio yec dayacquio
 icta. Canouidi canched-canchedendac.
²³Nuquin Papan namiaidquio nebi.
 Adquid icsho inchëshën ambi uaidën
 mayan bëdan ambi chomiaidën naden
 chioshi: ²⁴“Ancanquid dapa, empedadod
 caid matses chushquiaid tantiec tsadte
 yacno mibi nidtoendac. Mibi ambo
 nidmequin canon mibëd icquidtedi acte
 yacnoshon mënchiquembique.
 Dacuëdenquio yec tabad,” caposhi
 Nuquin Papan uaid mayan bëdan.
²⁵Aden aidën chiac dayacquio icta.
 Nuquin Papa ambi chiapaden
 nabanquid nec, quequin tantiembi.
²⁶Adembidi, acte tēcōasquequidën
 nuqui acte nënantan nidaid nacdëdquid
 cuëmano buanshun cano
 cancheshunendac, quequin tantiombi
 —quepondash Pabado canon
 antabëdtoaido chiec.

Cano canched-canchedaid

²⁷Adashic, Buenos Puedtos caid
 yacnoësh ënden nidboshi 14tedec ushec
 acte Adidia caid yacnoshon
 cunquequidën buampondash. Aden acte
 tēcōasquequin buanubi
 inchëshpotsembo yanuc, Cuëma
 anoentsëquien nuqui choendac, quequin
 cano nidmequidon tantiapondash.
²⁸Aden tantiaquin, ¿Tionda iqueque?
 Tanu, qeshun yuëmbocquid shocosh
 bucu dëdectanshun pumbudquin
 tampondash. Aden tanshun,
 Aidiompenquio iquec, quequin
 chuipondash. ²⁹Nidaid cuënote dapa
 cunquequidën buanquin cano
 semenushe qeshun cano uidën uate
 dapa yuëmbocquid tsitsumi
 tsidectanshun acte nënequin uidën uash
 ma badiadbono quiash tabadpondash.
³⁰Adec tabadnubi cano nidmequido
 cuenueshun dëbiatē yacnoshontsen cano
 uidën uate yuëmbocquid

dēdectanuequin abimbo chiacbimboen canompi anandoboed nēnetsempondash. Cano dapa mentoadtsiash, qeshun cuenuequin adopondash. ³¹Adec aido nidsenubien Pabado: —Cuenuequido canompin nidnuc cano dapan nidquido nuqui mentoadendac —quepondash sondado chuiquid caic. ³²Aden Pabadon chiaquien abi dectante bucutedi sēnac canompi nēpaēdpondash cuenuequido niidiapimbo yec.

³³Adashic, badiadte anoentsēc yanubi Pabado nadpondash: —Catodtseted ushec, Mentoadtsiabi, quequin tantiaded-tantiadedtsēcquin mimbi piamboccoc. ³⁴Mibi mentoadenquio iqueque. Min manēdaid abentsēc paēdenquio iqueque. Penquiocboedi unēschitomane quenquiocquin peta —quepondash Pabado. ³⁵Aden chuishumbic utsitedi ismequin pan bedshun Nuquin Papa chuishun pan cuēshun Pabadon pepondash. ³⁶Aden Pabadon pesho isun, Nuquitsen penuna, qeshun abitedishun pebededpondash. ³⁷Cano antabēdtoquido 276ted icpondash. ³⁸Aidtedshun peshumbic, Cuēmano nidec, quequin ambi sandoaid utsitedi tiedē caniquid ēshē acte nēsiapondash, Cano yuēmbo iquec, qeshun.

³⁹Adshumbic, badiadnuc ambi isacmaid nidaid istuidpondash. Acte cuidiantanquid cuēmambi masi icsho isun ambo cano nidmenueshun ⁴⁰uidēn uaid tebanac acte nēpaēdpondash. Adembidi, cano dēbidiadmēte bucutedi secudoashun cano dēbiateno buanquin dashcute shoyontanquimbi cadoapondash, Cunquequidēn acte daēd naccuēscananacno buampashuni, quequin. ⁴¹Aden cano nidmenubi cano dēbiaten masi setuidec dēchiquidtiapimbo yec cano dapa dētocquepondash. Adece dēchiadash acte

tēcocoasquequidēn cano dapa canche-canchequin tauapondash.

⁴²Adsho isash sondado, Mētaniaidtedi cuentsiashe. Cuesunenu, qesho ⁴³tantiash Pabado cuesunenushē qeshun: —iChēn! —capondash sondado chuiquidēn. Aden chuishumbic, Acten tantanec mēquiadquido tantanec nidanenubi ⁴⁴tantantiapimbocquido cano cuēsh-cuēshēdaid bedbanash noadec tantanquido tsibanec nidta, quequin chuipondash sondado chuiquidēn canon antabēdtoquido chuiquin. Aden ambi chiacpadquieci nidanec mentoadenquio yec abitedi nidaid yacno choash dēctatocuededpondash abitedi.

Madta caid yacno Pabado bēd icquido choaid

28 ¹Adec nidaid yacno choash dēctatoneshun, Nēid acte nēnantan nidaid nācnēdquid Madta caid nec, qesho tantiabēdēdpondash. ²Ambo tabadquidon abitedi bēdamboen yuedpondash. Iquen uampamboec ue sequenubi Madta caid yacno chosho isun cuēte dētsiadoshon, Cuēec cho, quequin chuipondash. ³Adnubic Pabadontsen cuēte tanunquiocquid bedtanquin tsindoquin masandopondash. Aden masandoaid nēdēnquiacnoēsh puduenquin nisin Pabado mēpepondash. ⁴Aden mēpiash ēcchiquidenquio yec mēdiadsho isashien anocquido: —Nisin piaid cuesunianquid nepanui. Mentoadenquio yec actenuēsh dēctatoacsho nisin piac unēschitequien iquec. Abi icsaid cuidtequidien nechitec.

⁵Adec onquecuedednubien Pabadon comapenen uicac nisi cuēte dētsiadoaidēn nēpaēdpondash. Adnubien Pabado abi bēdambo icpondash. ⁶Aden Pabadon uicac nisi

paëdsho isun Pabadon mëdante mëbidisquetsiashe. Isnu, quequin isbededpondash. Aden tantiaquin yuen cainquin mëbidisquenziocsho isash, Nisin mëpeboed utsibon papa cain cuënaid nepanui, quecuededpondash Madta caid yacnocquido.

⁷Madta caid yacnocquido tsusio dapan shubu anoentsëqui icpondash. Tsusio dapa Pudio cuëmëdquid icpondash. Aidëmbi aton shubu yacno canon choboedotedi yuedshun abentsëc chotsëcnuc ushquin ëbitedi bëdambo icmepondash. ⁸Adnubien Pudion papa chumbo yec pienec aton madon shubu nuntan uepondash. Adec Pudion papa uec qesho tantiash Pabado aid isec nidshun ashunquobi Nuquin Papa chuishumbic Pudion papa damishquin bëdamepondash Pabadon. ⁹Pudion papa bëdanacsho isash Madta caid yacnocquido nënquidbëd daicsaid chedo cho-chopondash. Ëbitsen bëdametsiashe, quiashe cho-chosho aidotsen bëdamepondash Pabadon. ¹⁰Adosho isun canon choquido bëdamboen tabadmepondash anocquidon. Nidnuesho tantiashun menebampondash mitsana nibëdec quequin.

Doma yacno Pabado choash tabadaid

¹¹Adashic ushë 3ted nidmiash Madta caid yacnoësh puduampondash. Madta caid yacno choash cano icbo, Iquenoampamboec icnuc nëmbo tabadnuna, quiashe tabadash: —Nidnu. Nid —quianec aton cano antabëdtosho isun Pabadobëd icquido sondado chuiquidën antabëdtomepondash. Aid cano shubu dadpen icquid Adecandedia caid yacnoësh chopondash. Cano icbon papa cain cuënaid daëd ambi tantiaidbimboecnuc cano dëdectanquin nacnenaid icpondash. Ambi papa cain

cuënaid abentsëc Castod icnuc utsi Podus icpondash. Adembidi aton cano cuëmpondash icbon. ¹²Aidën puduanec nidequi acte nënantan nidaid nacdëdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash. ¹³Ambo tabadash puduanquin aid acte nënantan nidaid nacdëdquid cuëma anoentsëqui potequi nidaid Itadia caid cuëmmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cunquequidën buanac badiad utsin shubu dadpen icquid Puteyodi caid yacno chopondash. ¹⁴Ambo choshon Pabadobëd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobëd tabadashic auëshquio puduanec podquedën nidequi shubu dadpenquo icquid Doma caid yacno chopondash Pabadobëd icquido. ¹⁵Podqued Apio caidën choec, quequin chuituidac Esuquidistu tantiaquid Doma yacnocquid utsi-utsiec Pabado bëquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsëc chotsec quequin cuënaid yacnocquido Pabado bëquedoaic nidaneoapondash. Aido cho-chosho isashien, Ëbi dayacquio icmenuen nëidtedi mimbi chomioc, Papa, quec dayacquio iquebi, quiampondash Pabado. ¹⁶Adec aido bëquedec choash aucbidi nidec Pabadobëd Doma yacno choapondash. Doma yacno choacshobien Pabado quënëen nauedenquiocquin shubun tabadmepondash sondado abentsëcshun abëd tabadquin isnubi.

Doma yacnoshon

Pabadon Esuquidistu chuibante

¹⁷Adec aton shubun tabadec 3tedec ushun isadaidbo tsusiobo chuinuequin,

Aido chome, capondash. Aido chomiacsho isun Pabadon nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid niacambo iccombi. Adoenquiocshobi Edusaden yacnoshon nuquin matsesën bedshun domanobo chuiquid meniondashi. ¹⁸Aden meniac domanobo chuiquidën, Mimbi naid chuiban, cac chuibanondambi. Aden chuibansho tantiash, Unës uainquioctiadquidi mimbi naic, quepondash domanobo chuiquid ëbi caic. ¹⁹Aden domanobo chuiquidën tantianubi nuquin matses tsusiobon, Unës uatiad, quequin chiac, Empedadod, Sesad yacno nidshun ëmbi naid chuite bunebi, quequin chuipondambi, Con matses icsambo iquec, quenquiocquin. ²⁰Ëmbi chuiboed mibi chuinuequin mibitedi chomiombi. Unësash uincuenta nec, quequin tantiaquin nuquin matsesën cainacpaden cainquid icsho mëtaniaid nebi —quepondash Pabado isadaidbo tsusiobo chiec.

²¹Adoquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoësh choquido, Pabado icsambocquid nec, quequin chienquioccosh. ²²Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec —quepondash isadaidbo Doma yacnocquido tsusiobo Pabado caic.

²³Aden Pabadon tantiaid tantianuec, Nëidted ushash padpidec choaindabi, quianec nidanepondash tsusiobo. Adec nidaniash ambi chiactedec ushash Pabado tabadacno choapondash isadaidbo tsusiobobëd utsibo dadpen. Adec cho-choash tabadsho isun: —Matses icsaquid icsho Nuquin Papan

cuidnushe quiash abided cuidadec Esuquidistu unëspaneëdash. Aid tantiaquid yec Nuquin Papabëd tabadendac, quequin Pabadon chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbëdtabi Nuquin Papan naden nanun chiaid ambi utsibo dada uamiampid chuibampondash Pabadon. Ambi dada uamiampidën chiaid Nuquin Papan madombo Esuquidistu nec, quequin badiadnubi chuiquin tauashun inchëshbudtsëqui chuiquin ëmpondash Pabadon. ²⁴Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. ²⁵Aden abentsëc tantiacbimboen tantiatiapimbo yec comapenec onquesho tantiashien Pabado nadpondash. —Nuquin Papan Mayanën Isayas dada uamequin nuquin tsusedpabo naden chuipampic:

²⁶ “Isadaidbo caid yacno nidshun naden chuita.

Mibitedishun
tantiaded-tantiadedquimbi
abimbo tantienquio iquendac;
Adembidi Ëmbi nadatiambocquin
nabanaid isted-istedquimbi
abimbo isenquio iquendac.

²⁷ Bëdamboen tantiaboedobi nëbi min matses pamumëdacbimboec tabadec; pashuacbimboen tantiec tabadoaic; ushacbimboecbidi tabadoaic.

Adec tabadenquiocquin ëmbi nabansho mimbi istsiac.
Adembidi ëmbi chiaid mimbi tantiatsiac. Aden tantiashun mibi icsaid mimbi ëntsiac.
Adquiduidi ëmbi bëdambo icmiaid nendac.”

²⁸Adesa mibi icnuc isadaidpembo Esuquidistu chuimembi. Aden aidi chuisho aidon tantiendac —quepondash

Pabado ²⁹Nuquin Papan dada
uamiampicpaden chuiquin isadaidbo
Doma yacnocquido tantiamenuc. Aden
chuisho tantiash isadaidbo
nidanepondash.

³⁰Adembidi seta daëd matamec
tabadquin Pabadon Esuquidistu
chuibampondash. Aton shubun
tabadquin abi isedec choquidtedi

Pabadon yuedpondash. ³¹Utsi, Chën,
quenuiocnobi dacuëdenquiocquin,
Nuquin Papabëd tabadte iquec, quequin
huibampondash. Adembidi Esuquidistu
tantiamenuen chuibampondash
Pabadon.

Padi. Esuquidistun, Ëbi chuibeneta,
caidon naid chuibanquin aitedi dada
uaombi, Teyopido.